

**EIGHTH LEGISLATIVE ASSEMBLY OF MIZORAM
(SEVENTH SESSION)**

LIST OF BUSINESS

FOR EIGHTH SITTING ON MONDAY, THE 8th MARCH, 2021
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

STATEMENT BY A MINISTER

2. **PU LALCHAMLIANA**, Minister to make a Statement on entry of Mizoram by refugees from Myanmar recently.

FINANCIAL BUSINESS

3. **GENERAL DISCUSSION ON THE BUDGET FOR THE YEAR 2021-2022.**
General discussion on the Budget for the year 2021-2022 (to be concluded).

H. LALRINAWMA
Commissioner & Secretary

....

SPEAKER : *Rorelna chu felna lamah a kir leh ang a, Thinlung dik takpu zawng zawng chuan chu chu an zui ang.* *Sam 94 : 15*

Awle, Zawnha leh Chhanna kan la nghal ang a, Starred Question No. 96, zawt turin Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e. Starred Question No. 96, a changtu Minister zahawm tak chhan atan:

Kum 2019 atangin Horticulture Department hian mau chin nan pawisa engzat nge a sen tawh? Chhungkaw engzatin nge ching tawh?

SPEAKER : Chhang turin a changtu, Chief Minister zahawm tak Pu Zoramthanga ka sawm e.

PU ZORAMTHANGA, CHIEF MINISTER: Pu Speaker, Member zahawm tak Pu Zodintluanga Ralte zawnha chhanna chu-

Kum 2019 atangin Horticulture Department chuan mau chin nan ₹272,60,431.00 a seng tawh a, chhungkaw 213-in an ching tawh tih a ni e.

SPEAKER : Zawh belhna zawt turin zawnha nei tu Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e. Mau chinna atan tunah hian Nuai 272 sen a nih tawh thu kan hria a, hmanni lawk khan Bairabi-ah kan naute an zuk kal a, Bairabi-ah khuan mau chi hi an lo buaipui nasa hle mai a. Mi pakhat, a thawktu, a neitu ka ni e tiin a lo awm a, chu chuan khawi mi nge a chi an lak tia zawhin, he House-a kan sawi thin Bangalore base, Bangalore atanga an chah thlen, Lengpui Airport-ah te a rawn thleng a, chuta tanga an lak anih thu a sawi a. Amaherawhchu mak deuh mai chu, a neitu inti si khan, Pu Speaker, *brandisii* nge lo *latiflorus* chin tha zawk ang tia a chingtu han zawh khan a hre ta miah lo kha, a eng brand nge a chah thlena a kui tiah a hrelo a ni. Chuvang chuan Lengte-ah farm a awm a, Lengte atanga an kui tiah kha chawp chilh deuh maiin Horticulture Department-in tender a chhuah a, a chhang theitu tlem te mi zawng zawng chhan theih loh in tender kha chhuah a ni a. Chutiang chuan Bairabi ami pawh khu sum siam nana tih a ni thei ang em tih hi Zoram mipuite an ngaihtuah dan a ni. A neitu in a thil chin a eng chi nge tih pawh hriatloh a lo ching leh teuh mai a, khungte pawh khu nakinah tender chawp chilh deuh in a rawn chhuak ang a, a supply-tu tur an ni thei mai ang em tih laia kha zawnha awm thei a ni a.

Pu Speaker, ka zawh belhna chu hei kan ramah hian keimahni chin, keimahni tualto mau tha tak mai a awm a, kan House Leader hi khawchhak lamah kum tam tak MLA a ni a, tunah hei khawpui chhungah a ni leh a. Khawchhak lamah hian mau hi a tam vak lo a ni mai thei a, ka bial khawthlang lam te min rawn enpui ve se la ka duh khawp mai a. Sawngah

sawn a mual a mual hian kan ram tualto mau a awm a, chungte chu an han that zia chu Pu Speaker, tun kumah pawh khaw tam tak chuan mau hmun an vat a, an han hal rem vek a, kum tluanin hna an han thawk a, buh leh bal, hmarcha leh chhahwchhi te an thar a, khami an kalsan hnu khan a kum lehah a rawn to khat leh vek zel mai a, hardening a ngai lo a, kui tiah a ngai lo a, sum sen a ngai lo a ni. Chung maute chu Khawthlang Tuipui-ah a kilometer-in Bangladesh-a tawlh thlak a ni a, hmar lamah Tlawng khatin mau kan tawlh chhuak a, Langkaih Lui-ah chutiangan Tuirial Lui-ah, kan rama maute hi a tha em em a, a demand hi a sang a ni. Chuvang chuan Pu Speaker, kan rama mau kan neih sa te hi tangkai zawka hetiana a thar hardening tia chin a, kui tiah a, sawrkarin sum tam tak senga in chin tir ai hian kan mau neih sate hi hman tangkai dan zawk hi sawrkar hian a ngaihtuah thei em tih ka rawn zawt e.

SPEAKER : Zawhbelhna zawt turin Dr. Z.R. Thiamsanga, Member zahawm tak ka sawm e.

DR. ZR. THIAM SANGA : Pu Speaker, ka lawm e. Ka zawh belhna chu, greenhouse hmanga thlai chin hi hmalak zel tumna a awm em? Tin, mahni bial kan hre lo thei lova, awm ni ta se Champhai leh a chhehvel ah hian hmalak tumna a awm ve em? Pu Speaker, i remtihna in tlem han sawi zau lawk ka duh a. Greenhouse hmanga thlai chin hian hun a heh lo bakah chhungkua tam tak leh thalai eizawna hmu lote tan pawh eizawna tling niin a lang ta a. Nikum chhung zawng Covid-19 hrleng avanga lockdown kan han neih chhung khan kan Chief Minister zahawm tak hmalakna in Horticulture leh Mizofed ten vegetable supply chain hlawhtling takin an buatsaih a, tah chuan Serchhip leh a chheh vel ringawtah pawh khian an lo ching nasa a, nikum lockdown chhung pawh khan ka hriat sual loh chuan Pu Speaker, Serchhip khua chhungkaw pakhat ringawt pawh khian cheng nuai 22 chuang sum an hmu chhuak a ni.

Tin, Saikhamakawn-ah pawh sawn greenhouse ti mi pakhat tha deuh mai a awm a, chu chuan 9 a nei a, nikum chhung ringawt pawh khan greenhouse atangan cheng nuai 18 a hmu chhuak a ni. Chutiangan chu a ni a, tin, Saikhamakawn ami phei chu tunah hian Progressive Farmer Award, Imphal-ah dawng turin a thang mek a ni. Chutiangan chuan department-in theih tawp a chhuah a, sawrkarin theih tawp a chhuah a, eizawna tlak a ni a, hei hi chhunzawm zel tumna a awm em tih kha kan zawt duh a.

Tin, zawhna 2-naah, Rain Water Harvesting-hi hmalak thar tumna a awm em tih kha kan zawt tel a ni e. Pu Speaker, ka lawm e.

SPEAKER : Zawhbelhna zawt turin Member zahawm tak Dr. Vanlalhlana ka sawm e.

DR. VANLALTHLANA : Pu Speaker, ka lawm e. Horticulture Department changtu Minister zahawm tak chhan atan kan CLP Leader khan a rawn sawi tawh tho a,

amaherawhchu, ka zawhna hi a dang deuh hlek a. Bairabi-a Mau Nursery kha a hmunah kan zuk en a, kan zuk tlawh kual a, Growmore supply kha a ni a, Horticulture Department hian khulaia Nursery khu a hriatpui em? National Bamboo Mission hnuaiyah Nursery duh duhin a tih theih lo a, Bamboo Nursery hi sorkarin a hriat pui a ngai a ni.

Tin, Department hian Police pahnih vengtu tur a dah nge, engtia awm nge an nih tih kha ka hre duh a. School an veng emaw ni ka ti a, a ral leh lam a ni si a. Khulai Nursery-ah khuan Police pahnih an lo duty nawlh mai a, khu khu Home Department-ah veng turin a lo ngen nge tih kha kan zawhna pahnihna a ni a.

Tin, pathumnaah chuan, Dragon Fruit kan uar chho khawp mai a, Dragon Fruit an ching ang a, a hralhna turah hian harsatna an tawh leh palh ang tih a hlauhawm a, chuang chuan sorkar hian company emaw a marketing agency emaw MoU ziah pui a nei tawh em tih kha ka zawh belhna a ni e.

SPEAKER : Aw le, Member zahawm tak a zawttuin a hriat duh, Kum 2018 tih hi 2019 a ni zawk lo maw tih lai kha, Ni 9.2.2021 khan he zawhna hi ka lo admit a, kum 2018 atangin tih a ni e. Aw le, a theih ang ang chhang turin kan Chief Minister zahawm tak Horticulture changtu ka sawm e.

PU ZORAMTHANGA, CHIEF MINISTER: Pu Speaker, zawhna neitu Member zahawm tak Pu Zodintluanga zawhna, mau tha tak tak awm te hi hman tangkai dan ngaihtuah theih a ni em tih kha, theihtawpin hei hi chu kan ngaihtuah a. Tin, a industry neite pawhin an ngaihtuah a, department lam leh sawrkar pawhin kan ngaihtuah a. A buaithlakna chu, “ramhnuaiyah sava vahrit te, ram ar te, a tam mai, ar vulh a ngai lo” tih ang deuh a ni a. Business tak taka kan tih dawn chuan sava pahnih pathum va kap mah ila chuti rengin a lo tih theih miah loh mai a. En ila Venus Bamboo te, Growmore Biotech te, Pu Ramhluna Industry siam te, Pu Chhuanga Insdustry te chuan bamboo develop turin an ti a, a tan pawh an han tan a, an ti thui viau a ni. Amaherawhchu a buaithlakna chu, mau tha kawngpuia rawn putchhuahna kha a mau hu deuhthawhin a hautak a ni. Link road nen, a nih loh leh ropeway emaw transportation nen a in connect loh chuan raw tha, mau tha tha kan lui ruam thukah a lo awm a, chumi chu put chhuaha han transfer-na tur tak tak, business level-a han kal pui dawn chuan a hlawk tham tlat lo, koin emawa motor kawnga rawn lakchhuahna kha a hautak lutuk a, chuvangin systematic plantation te pawh neih a ngai bawh a ni.

Tin, chu lovah chuan kan maute chu a tha teh meuh mai a, an mahniah fiber te pawh a awm a ni. Mahsela hlawk chu a inhlawk hleih a ni. Mau tam tak chu ban rek tiah lek emaw a lo ni a, phelh darha, hlai pana emaw chartin-a chhuah a, a nih loh leh plywood ah te chhuah a han ti tur chuan, kan mizo mau te hi chu rin aiin a buaithlak khawp mai a, tih chu a tih theih a, eng emaw zat chu an han ti a, heng industry tuna awm te pawhin, amaherawhchu an vaiin an chawl thup a ni. Engnge a chhan tih chuan, raw material supply/transport tur khan tuna ramhnuaiyah kan maute chu tam nameuh mai. Amaherawhchu, thing lera sava thlawk sup

sup ang deuh kha a ni a, duh hun hunah a lak theih loh, a putchhuah man a to lutuk tawh a. Chuvangin, heng industry zawng zawngte pawh en ila, kan sawi mek Pu Chhuanga'n a neih te, Pu Ramhluna'n a neih te, Zonun Mat Ply te, Venus Bamboo te pawh an vaim, khawl a chhia lam a ni lo, a ding vek, raw material rawn phur thlen tur tih tlak tak tak kha a tir atanga road nena connecting link a awmlh avangin ti hian a tawp ta vek a ni. Chuvangin, kan tawng mawi lo ni suh se kan Mizo hming vuah ve 'tuikuk vawk' kan tih te reuh te te te chu a tui hlei hlei an ni a lawm. Amaherawhchu, hlawk tur chuan kha aia lian Australian vawk te, broiler te vulh kan duh zawk ang chiah khan, heng kan mau, mipa pakhat ina pum 20 chuang kan put theih ang ai chuan, tun a raw lian *latiflorus* leh *brandisii*, pum khat mi pahnih ina an put zawh tur, nuamsa deuh hleka lak chhuah tur chuan a ngai a ni. A inhlawk hleih lutuk a, transportation tur leh plantation-ah pawh khan, chu chu commercial activities neih pui atan chuan a tha kan ti a.

Pahnihnaah, kan raw nal te, kan raw thla te, chung zawng zawng chu ching dawn ila a, then chu kum 40 dana rah te an ni si a, a rah kui tiah tur nghah a ngai rei lutuk dawn a, khami chhung khan business a kal tak tak thei dawn lova, chumi ti tur chuan tissue culture, a chi siam a ngai bawk ang a. A chi siam kha, tunah pawh mi thenkhatte chuan an ti ang, brandisii leh *latiflorus* chauh lo te pawh ti an awm ang a. Amaherawhchu tuna kan hmuh chinah chuan *brandisii* leh *latiflorus* hi a lian ber, a tha ber an ni a. Tin, tuna kan hmuh phak china lian ber *gigantia* hi teh kuala 29 inches te a ni a, Tlangnuam bulah a awm reng a, kan hmu a. Amaherawhchu tissue culture ti turin a protocol hmuchhuak an la awm lova, a chi siam thiam an la awm tlat lo va, a bul kar tur chuan bul sawm kar tur pawhin beih rei a ngai lutuk, loa phun tham kar ngeihna a awm lova, kar chhuah hleihtheih pawh a ni lo bawk a. Chuvangin tissue culture protocol a an rawn siam chhuah te reuh te te hardening tiha phun anih loh chuan a tih theih loh a ni. Kum 20 chuang ka buaipui tawh bawk a, a hriat pawh hi ka hre ve viau a ni. Chuvangin, tuna kan tih dan lo hi chuan kawng dang a awm lo, Govt. of India pawhin kawng dangin a ti chuang lo. Kan sawi ang te kha chu a tha teh meuh mai, lak khawm dan awm sela chuan; tuna kan khawl tawl zawng zawng hian siam an duh vek ang, mahse a put chhuah, luikama teak tum lakchhuah tum ang deuh a ni a, a hautak hlawn lutuk a, chuvangin a development hi a kal chak tha thei lo a ni.

PU ZODINTLUANGA RALTE: Pu Speaker, kan mau neih sa kha a lakchhuah a harsat zia kha ti kha a ni a, khangah te khan link road te siamin bul tan ta ila a tha mai em tih deuh kha a ni a. Amaherawhchu, tuna tissue culture-a kan chin tur hi Mizoram-ah chuan kan hre vek a, Vairengte - Tongkolong thlengin, Aizawl - Champhai lam thlengin, kan kawngpui neih sa zawng zawng hi private ram vek a ni mai a. Tunah pawh national highway a kal a, Champhai lamah, sawtah Lawngtlai lamah. tin, Silchar - Aizawl ringawt pawh sawrkar ina a mu tan lian ber chu, khang ram kaltlang ringawta compensation tam lutuk tur kha a ni a. Khatiang hmunah khan heng kan raw lian tak tak, pum khat pawh patling pathum tena put ngai kha kawngpui hnaia chinna tur hi kan hmu zo dawn em ni, a hla viau lawng maw tih kha min hrilhfiyah thei ang em le?

PU ZORAMTHANGA, CHIEF MINISTER: Sawrkarin chin kan tum lova, mimal chin tur a ni a, an mahni ramah vek chin tura tih a ni. Tun ami zawng zawng pawh hi mimal ina an chin vek a ni, sawrkar chuan khawiah mah an ching lo. Chumi a nih avang chuan, entirnan Saitual ramah khan, “khai le, in khuain...

PU LALCHHUANTHANGA: Pu Speaker, khawngaih takin. Tlangnuama mau chi tha neitu kha VLT Muana a ni a, kan chhungte a ni nghe nghe a, tissue culture ang khan a chi chu a siam thiam khawp mai, a bul kar lovin. Chu chu House-ah hian ka rawn sawi ve duh a ni e.

PU ZORAMTHANGA, CHIEF MINISTER: Pu Speaker, a siam thiam thu kha chu, kan pahnihin kan ti rei tawh khawp a, a tih dan chu, a zar leia phuna a panga tih chawr leha, chu chu uluk taka zai then leh a tih len a ni a, khaw khat chin tur siam tur chuan tih mai mai a ni lo, in khat chin tur pawh a harsa ang. Tunah pawh sawn a siam thei lo a ni a, Pu Muana sawn. Chuvangin kan pahnihnin kan ti dun tam em em mai a, khaw khata nuai tel chin tur hi tissue culture lo chuan tih chi a ni lo. Ka sawi duh laia chu, tissue culture-a tih dawn pawh khan a hautak em em mai a, tunah hian Growmore Biotech ami khu a titu awm chhun a ni si a, “Mizoramah hian i industry rawn tawlh chho mai rawh, chuti lo chuan thlawhna Hosur atangin, motorin Bangalore-ah, Bangalore atangin

Thlawhnain Kolkata, Kolkata atangin Lengpui-ah, Lengpui atangin hardening hmunah, a mortality rate a sang lutuk tawh a, a hautak em mai” kan ti a. Tunah rawn tawlh chhoh a tum a, “Mizoramah hmun min pek chuan ka industry pawh hi rawn tawlh chho ila, hmun leh hmunah Poly pot te reuh te te a phun sawn ngai lovin, a lian sain kan ti ang a kan ti thei mai ang” a ti a, tunah hian project kalpui mek a ni. Hardening hi sawrkar-in pakhat mah a ti lo a, mimal vekin an ti. Tin, tih chi pawh a ni lova, khawi lai peon-in emaw business-a tih chi pawh a ni lova, mimal tih chi vek a a ni.

Tuna ka chhanna ang khan Hmunpui area-ah khuan In 213-in bul an tan a, hmundang neuh neuh te pawh a awm tho va. Kuminah hian tih leh kan tum a, mahse Covid avangin kan buai theuh a, kan ti tam thei lova. Mahse a chi nuai chuang tal chu chin leh i tum ang kan ti a, sawrkar-in a HDP, In khatin raw chinna atan ₹1,12,761 stage khatna atan a sem a ni. A then chu nuai 3 pawhin a daih lovang, amaerawhchu hei chu kalpui kan tum a ni tih kha a pakhatna atan kan sawi duh a ni.

Tin, Bairabi lamah hardening pawh kha tih kan tum e, Lengte-a Pu Ropuia te chhungin an ti a, an tan tih sen a ni lo avangin midang ti ve turin a ti a, a zuar kual a zuar kual a. Barabi-ah tui hnai deuh khan thenkhatin an lo ti a, tih tam tumin an bei mek a, hardening titu chu a za tel tam awm a ngai ang. Chuvangin, khu khu chu nakinah hardening tiha, a chi hralh tur nei apiang khan sawrkarin a advertise-a tender a call hunah ‘ka nei’ an rawn ti ang a, an en ang a, tih tlak nia an hriat chuan, chung chu an rawn lei tur a ni a. A ti

zawng zawng pawh hi lei sak vek mah ila kan mamawh chanve chanve leh pawh a pha lo hrim hrim mai a ni. Chu chu tuna kan dinhmun a ni e.

Tin, greenhouse lamah pawh hmalak kan tum teh reng mai, mahse kan duh dan tak chuan, greenhouse kalpui tur chuan tracing kan ti phawt ang a, khata tang khan tui supply nen tang kawp ila kan ti a. Tin, *rain-water harvesting* hi tih loh chuan thlai tui pek a remchang lova, chuvangin kan tih tum dan chu, thirlen zungnih vel, a san lam ft 4 bawr vel siam an awm a, ft 12 hawlh tlang leh ft 16 hawlh tlangin a zem kha an han kual tawp a, chhuatah an ti mam tha a cement-in. A tih chak nan angle iron-in an khuap kual a. Tichuan a chhung lamah Silpauline chhah chi ang kha an zu dah tawp a, a chung lamah net tha an zar leh a. Hei hi PHE pawh hian an duh ber tur a ni a, a awlsam em em a ni. Mahnia siam mai theih a ni a, Horticulture ho tih pawh kum 10 ah a chhe teuh lo a ni. Tunah hian price tender kan ko mek a, hemi hmang hian Horticulture leh Agriculture nen PHE nen, thlai ching tur ho tan pawh hei hi a tha lutuk a ni. Chu chu tuna tih kan tum a ni a, rain-water harvest ah hian nasa taka tih kan tum a ni tih kha ka sawi leh duh a ni.

Tin, Bairabi-a nursery khu department-in a hriat pui em tih kha, mimal hriat te chuan an hriatpui ang chu. Amaerawhchu, department tih a ni lova, department pawh in hardening hi chu a tam thei ang ti rawh u, kan duh tawk supply tur in awm lo em mai an ti a. Hmun remchangah chuan an ti a, tunah pawh kan nau ten an ti anih chuan tih theih zel a tha a, a za telin kan tih loh chuan Mizoram chin khawp kan nei lovang tih a hlauhawm a ni.

DR. VANLALTHLANA : National Bamboo hnuaiyah hian mau chi tha supply a nih loh avangin nursery hi duh duha din theih a ni lova. Sawrkarin a hriatpui lo anih chuan tih tawp ava ngai awm ve, Pu Speaker?

PU ROBERT ROMAWIA ROYTE, MINISTER: Mimalin Nursery an lo din kha sawrkar tan hriatpui sen chi pawh a ni lova, nursery a pe tu tur kha sawrkar a ni lova, Growmore Biotech Ltd. Company-ah mimal hardening turin a chi an zuk la mai a, sawrkarin a tihsak pawh a ni lo. Chu chu nakinah sawrkar-in, “hemi chi hi kan lei duh e” a tih hunah an enchiang ang a, a lei tlak chuan sawrkarin a ti dawn a ni. Kha kha chu mimal business vek a ni.

Tin, Police duty khu a hriat pui em tih kha, kei ber pawh in ka hre miah lova, ramri thila duty an nih loh chuan, nursery siam te ven a tulna pawh a awm lova, police duty an awm pawh ka hre lo a ni. Bairabi lama duty hmuh remchang a nih loh chuan kha kha chu kei pawhin ka hre miah lo a ni.

Tin, dragon fruit hralhna chungchangah chuan MoU chu ala awm lova, amaherawhchu, kan thar ala tlem avangin tunah hian market kan zawng mek a ni. Mizoram hi large scale-a ching hmasa kan ni a, tun kum atangin Govt. of India-in promote a tum bawk

a, MoU ziahpui thama thar kan duh a, tunah chuan kan thar ang ang theih tawpin kan hralh char char a, a tih chi khawp chuan kan hria a ni.

SPEAKER : Starred Question No. 97, zawt turin Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Speaker, ka lawm e. Ka zawhna Starred Question No. 97, kan Minister zahawm tak chhan a tan –

Indo-Bangladesh border fencing siam nana leivung paihna hmun hi company lamin an siam em? Siam ni se, leivung paihna hmun hi sawrkarin a enpui em?

SPEAKER : Chhang turin Home Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, Member zahawm tak Pu Nihar Kanti Chakma zawhna chhanna chu -

Leivung paihna hi company-te hian an siam a, sawrkar chuan a enpui lem lo, tih a ni e.

SPEAKER : Zawhna neitu zahawm tak Pu Nihar Kanti Chakma, zawhbelhna zawt turin ka sawm e.

PU NIHAR KANTI CHAKMA: Pu Speaker, Indo-Bangladesh border fencing avangin ka bial mipui ten harsatna hrang hrang an tawk nasa a. Home Minister zahawm tak chhanna atangin ka hria a, company-in leivung paihna an siam lo tih hi; an siam an ti a, mahse khawiah mah hmuh tur a awm lo a ni. Pu Speaker, sawrkarin leivung paihna tur a enpui lo tih hi paw ka ti hle a ni. Tunah rail kawng Sairang thleng an lai mek a, leivung paihna hmun tha takin an siam a, monitoring committee tha tak pawh din a ni awm e. Kan hriat angin keini hi international boundary-a awm kan ni a, a kawng te pawh 318 kms lai a ni a. Guidelines-ah chuan, Zero Point atanga India ram yard 150 chhungah fencing siam tura tih a ni a, company-in leivung peihna bik a siamlah avangin fertile land zawng zawng an ti chhe nasa a, an duh duhnaa paih anih avangin ka bial chhunga leilet an ti chhe nasa a ni. Pu Speaker, i phalnain, Assembly Committee Report hi ka han chhiar lawk ang e. “Due to Indo-Bangladesh border fencing, many agricultural lands were destroyed, water logging problem, communication problem and even livelihood problem arises”. Ka zawhna chu Pu Speaker, he fencing vanga problem hrang hrang solve na turin sawrkar hian MLA telna committee a din theih em tih ka zawt e.

SPEAKER : Zawhna zawt turin Member zahawm tak Pu C. Lalsawivunga ka sawm e. Chumi zawhah Pu C. Ngunlianbunga lo inring se.

PU C. LALSAWIVUNGA : Pu Speaker, ka lawm e. Myanmar chungchang kan hria a, a ramin harsatna namen lo a tawk a, chutihruah chuan kan unaute Mizoram lamah sa himna zawngin an lo tlan lut a ni a, hei hi sawrkar hian eng angin nge a buaipui? Tun maih hian mi engzat nge Myanmar atanga sa himna zawnga Mizorama lo tlan lut tawh tih hi Mizoram sawrkar hian a hria/chhinchhiah em? Tin, heng mite lo dawngsawnga an himna tur atan, thlamuang taka Mizoram-a an khawsak theihna tur atan Home Ministry-ah sawrkarin hmalakna a nei tawh em?

Pu Speaker, Champhai DC tawngkam an sawi, “MP leh MLA-te bak chu lo dawnsawn theih a ni lo, Assam Rifles-te phei chuan an push back nghal zel dawn” tih hi a pawiin ka hria a. Sawrkar hian heng mi te humhim tur leh thlamuang taka an khawsakna turin eng angin nge hma a lak, heng refugees te tan hian pawisa a dah fel tawh em tih te kha ka zawh belhna a ni e.

SPEAKER : Refugee leh raltlan chungchangah hi kan business-ah kan zia hman lo a, a emergency em avangin kan Home Minister zahawm tak hian Statement siam a rawn dil a, chu chu a chhan a remloh pawhin House ka han hriattir duh che u a ni. Hemi zawh ah hian a siam dawn a, zawhna in lo neih pawh in hemi chungchang hi chu Minister zahawm tak in Statement a siam dawn e.

Zawhna zawt turin Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e. Ka zawhna hi 7-na daihah a awm a. Kan Chief Minister tui zawng takah kan lut a, darkar chanve Zawhna & Chhanna hunah kan hman a, ka zawt ve hman lo ang tih ka hlau a. A tui lutuk bawka a ni kan pu kha, kum 20 alo buaipui tawh kha a ni a, a hrechiang ropui sia. Awle, Pu Speaker, ka zawhna hi Home Minister-in a nei tho a, Starred Question 102-na vawiina chhuak tur a ni tho nain.

- a) Thingkah-a IR hmun tur sak hi engtikah nge hawn theih nih ang tih a ni a. He sawrkar a lo din 2019 kumtawp khan hawn theih beisei a ni a kan hman ta lo a. Tunah hian engnge beiseina kan neih?
- b) He hna thawktu Contractor hi tunge?
- c) IR Battallion building sak a ceiling saw plaster loh tur em ni? Engineer ho te ka zawh ve chinah chuan kha kha plan leh estimate-ah a awm vek si a, plaster a ni ta lo saw plaster loh tur a ni ta em ni?
- d) Tin, session hmasaa question ka neih kha a chhuak hman lo chiah chiah a; he hna hi a material a chhe khawp mai a, balu te pawh session hall-ah ka rawn keng a, mahse ka question a chhuah hman loh avangin kan Home Minister hnenah hian a balu hi ka pe a ni. A bang hi kuk i la a ri tuk tuk deuh vek a. A hmunah ka kal a, ka mitin ka hmu a, ka kutin ka khawih bawka a, Pu Speaker. Chuvang chuan, khitiang lutuka hna chhia khi building lian 39 lai a awm a, toilet block 3 a awm bawka a, a vaiin building 41 plaster loh vek kha a ni a, a va han hlawk dawn em ka ti a. Kha kha plan leh estimate-ah a tello nge ni dawn tih kha ka zawt belh a ni e.

SPEAKER : A theih ang ang chhang turin kan Home Minister Pu Lalchamliana ka sawm e.

PU LALCHAMLIANA, MINISTER: Pu Speaker, zawhna neitu zahawm tak khan border fencing hi a vei khawp a, a ti tha hle in ka hria. Border fencing chungchang hi thui deuh hlek sawi ta ila.

Border fencing hi state sawrkar thu a ni lo a, central sawrkar thuneihna a ni a, a guidelines te, contractor thlan te thlengin central sawrkar tih vek a ni a, a tir atangin state sawrkar hi an rawn lo a ni. Border fencing chungchangah engah mah pawimawhna kan nei ve lo emaw tih tur a ni a, mahse Pu Nihar sawi ang khan harsatna te a lo awm a, leivung paih chungchang ah te. Tin, fencing hi border atanga yard 150 chhungah, a tul anih chuan yard 500 chhunga siam tur a ni tih te pawh kha, thenkhatah chuan km 2, km 3 te a ni a. Border ven hi central sorkar hna a ni baw k a, an strict a, a hmaah khawilai khua emaw ni te ina leilet an va neihna kha fencing pawn lam a lo ni daih a, a feh hlei thei lo a ni. Harsatna kan tawh takah chuan state sawrkar hi min associate ve ta a ni. State level Co-ordination Committee on Border Fencing kha ka hriat sual loh chuan 2006 vela siam a ni a, chutah chuan Chief Secretary hovin hma an la a ni.

Leivung chungchang hi Committee in a han thlir hian thenkhatah chuan harsatna a awm lo a. Entirnan, Dampa Tiger Reserve Division huam chhungah company contractor ten tuipei hnaiah leivung an paih a, hei hian a bul hnaia chengte tan harsatna nasa tak a thlen a. An tui in tur hnar te ti bawlhhlawhin, an lo leh huan te a ti chhe nasa hle a ni. Lunglei Forest Division-ah leh Thenzawl Forest Division-ah chuan leivung paih avanga buaina report a awm lova, Tlabung Division-ah hian leivung paih avangin a bul hnaia chengte tan harsatna a thlen thu report dawn a ni. Chuvang chuan heng harsatna awmte hi State Level Co-ordination Committee thutkhawm vawi-12-na chuan CEM, Chakma Autonomous District Council chu Indo-Bangladesh border fencing avanga harsatna taw k khaw list siama, leivungin harsatna a thlen dan chu State Level Co-ordination Committee thutkhawm vawi-13-na neih a nih hunah report pe turin a ti a ni.

Zawhna neituin, MLA telna State Level Co-ordination Committee a din theih em ti a zawhna chungchangah, a din dan tur kha ka lo bih chiang hauh lo mai a, concerned MLA kha full member anga a tel a rem loh pawhin special invitee angin a tel a rem lohna tur ka hre lo va. Hei hi kan lo en zui ang e.

Member zahawm tak Pu C. Lalsawivunga zawhna kha, ngaihdan hrang hrang leh duh dan hrang hrang a awm a. Myanmar atanga raltlan lo lut te hi a detail-a publicity pek a tha nge tha lo ang tih zawhna pawh a awm a. Ngaihdan tam zawkah chuan, an kalsan tak an chhungte pawhin an tuar thei a, chuvangin, detail taka report pek hi a tha lo ang tih a awm avangin, 'ka sawi thui lo mai ang e' tih kha ka chhanna ni ta se la.

Pu Ngunlianchunga Thingkah-a IR hmun tur hi vawi khat chauh ka la tlawh a, engtikah nge luah a nih ang tih chungchangah chuan, March thla chhung hian zawh hman tak tak kan in beisei a, a hawn hun tur erawh chu sawi khawm a la ni lo a ni. Contractor chu North East Consultancy Services te an ni. Plan and estimate-ah a ceiling hi plaster loh tur a ruahman em ni tih zawhna kha, a plan and estimate hi ka la hmu miah lo va, chuvang chuan tih tur a nih leh nih loh kha ka hre lo a ni. Hetia han ngaih mai hi chuan plaster tur ni awm tak chu a ni a, plaster a nih loh erawh chuan ka hre lo le.

PU C. NGUNLIANCHUNGA: Plaster tur ni awm tak chu a ni a; plaster ni lo ta se eng tia tih tur nge maw ni dawn le?

PU LALCHAMLIANA, MINISTER: Bangladesh Parliament pawh khu an plaster miah lo asin.

PU C. NGUNLIANCHUNGA: A plaster loh tura tih a nih chuan a dik mai a, mahse Plan and Estimate a awm a nih si chuan tih tur a ni dawn lo em ni?

SPEAKER : ‘Kan lo en ang e’ a tih kha aw.

PU LALCHAMLIANA, MINISTER: Material a chhia tih chungchang kha ka kal ve lai kha chuan (kal thuak ka ni bawk a) a material a chhiat em em pawh ka hre lo va. Pu Speaker, i thutnaa ka thut lai khan ka ding lama Minister zahawm tak hian, ‘hei, buhfai chhia’ a rawn ti a, khawi lam atanga a lak nge ka hre chiah lo a, a rawn phawrh kha chu a chhe ngei a, mahse khawi atang takin nge a lak tih zawhna kha chu a awm ve thei a. Chuvang chuan Pu Nguna material chhia pawh kha khawi laia mi tak nge ni ang aw tih pawh kha ngaihtuah tham tak chu a awm ve a.

PU C. NGUNLIANCHUNGA: Kha lai kha ka han sawi law law lawk ang a. Kan Home Minister hian min lo hrethiam se la. Chhimtuipui balu, fur lai pawha an dah mai mai, mimal pawhin an hman duh loh saw an hmang ta a ni. Lawngtlai velah chuan tui chhunga mi balu la chhuakin an hmang thin a, Thingkah IR sakna atana an balu hman saw a vanduaithlak ka ti a. Contractor te hnenah pawh ka sawi a, kan sawrkar lai pawh khan Minister ka nihna ang pawhin ka va tlawh ve a ni. Balu kha an duh chhiat lutuk avangin a plaster-ah sawn a lang a, hman nia ka va kala a thawktute sawi chu, “a structure hi chu a tha, mahse balu a chhiat avangin plaster hi chu a chhuanawm thlawt lo a ni” tih kha an supervisor te tawngkam ngei pawh a ni e.

SPEAKER : Buhfai chhia te leh khatiang kha chu, “Thil hlui chu a ral ta, ngai teh, a thar ta” i ti mai ang aw.

PU LALCHAMLIANA, MINISTER: Eng pawh ni sela, a vil pawl hi an awm ve reng a, miin diklo taka hna an thawh duh chuan vil sen tak tak a lo ni chiah lova, mihring leh

mihring hi chu inbum awl tak a ni a. Eng pawh ni sela, hawn theih tur chuan an peih tep tawh a, hawn hunah pawh a bialtu te chu tel ve ngei turin kan beisei tih kha ka chhanna a ni e.

SPEAKER : Starred Question No.98, zawt turin Member zahawm tak Pu H. Biakzaua ka sawm e.

PU H. BIAKZAUA : Pu Speaker, DM&R Minister zahawm tak hnena ka zawhna chu-

District Hospital Lawngtlai bula leimin nasa tak avanga Hospital building a chhiat mai loh nan venhimna tur hmalakna a awm em, tih a ni e.

SPEAKER : Chhang turin a changtu Minister zahawm tak Pu Lalchamliaana ka sawm leh e.

PU LALCHAMLIANA, MINISTER: Pu Speaker, Member zahawm tak Pu H. Biakzaua zawhna chhanna chu-

Hmalakna a awm e. A theih chin chinah kum 2020 July thla atang khan hmalak a ni a, Plan and estimate, PWD siam pawh dawn tawh a ni. Amaherawhchu, Ministry of Home Affairs atanga phalna leh inkaihhruaina la dawn loh avangin mitigation work hi kan la thawk thei lo a ni.

Pu Speaker, hetah hian tlem han sawi belh ka duh chu, mitigation pawisa hi Central Union Home Ministry lamin guidelines thar kan rawn siam dawn an ti a, chu chu tunah hian an buaipui mek a, state hrang hrang zawhna leh ngaihndan te pawh an la a. Mahse vawiin thlengin guidelines an la peih loh avangin kan pawisa neih chhun tam vak lo pawh hi kan la hmang thei rih lo a ni.

SPEAKER : Zawh belhna zawt turin Pu L. Thangmawia, Member zahawm tak ka sawm e.

PU L. THANGMAWIA : Pu Speaker, ka lawm e. A hmasa in ka bial chhung Hliappui chhiat tawhnaah DM&R atangin nuai 30-a min tanpuinaah lawmthu ka han sawi hmasa duh a. Mimbung leh Ngopa-ah hian lei khi kan nei a, Geology & Mining pawh ka ngenna angin an kal tawh a. Nikum, kum tir khan DM&R lamah detailed project report an rawn theh pheih tawh ka ring a, kha kha tuna mitigation fund atang hian min tihsak thei ang em tih kha ka rawn zawt a ni e.

SPEAKER : Zawhbelhna zawt turin Dr. Vanlaltanpuia, Member zahawm tak ka sawm e. A dawtah a zawhna neitu aw.

Dr. VANLALTANPUIA : Pu Speaker, ka lawm e. Ka bial Lunglei North lama chhiatna awm ve thin chungchang zawh ka duh a. Session hmasaah pawh ka zawt tawh a. Lunglei Zotlang a leimin hi a nasa riau mai a, a khi nasa em em a. A tlang chhipah hian tourist lodge a awm a, a bulah petrol pump a awm a. Chhim lam kawng zawng zawng kalna anih avangin he lai hmun hi a pawimawh hlein ka hria a. Hei hi session hmasa lama ka zawh tawh ang khan hmalakna a awm em tih ka zawt leh a.

Tin, Pu Speaker, Department chanah hian Geology & Mineral Resources hi Commerce & Industries hnuai a awm daih a, Anni hian Scientific Research leh Studies te an ti a, MIRSAC hi Science & Technology hnuai a awm a. Ka zawhna chu, DM&R hian research leh zirchianna, mitigation an tih dawn hian an nei thin em, Geology zirchianna hi min neih sak tawh em, Highway hmun pawimawh lai tak a ni si a, tih ka zawt a.

Tin, he House-ah hian ka sawi duh chu, mithiam te pawh ka phak tawkin ka rawn a, he lai hmun hi sedimentary rocks-ah pawh hian a thawhleng ber chi 'shell' kan tih awmna hmun a ni a, chuvang chuan lei tla heuh heuh a awm reng a ni. A cemented wall-ah hian 'tlak lei' kan tih te mai chauh kha anih avangin ruah a tlaka cemented wall tleuh a nih khan min nasa tak a ni nghal mai zel a. Chuvang chuan, a tlang chhipah hian tourist lodge-te, a bulah petrol pump te a nih deuh nuai avangin leh tunah tak phei chuan mimalin ram te an neih avangin a hmun kha an duh duh danin an lai tawp mai bawk si a. Hei hi a serious ka ti khawp mai a, kan Minister pawh hian special attention min pek sak theih se tih hi ka zawt duh a. Chulai ka zawhna ah chuan hmalakna a awm em helai hmunah hian, tih leh scientific research-te hi an nei tawh em tih te hi ka zawhna a ni e. Ka lawm e.

SPEAKER : Zawhna neitu Pu H. Biakzaua, Member zahawm tak ka sawm e.

PU H. BIAKZAUA : Pu Speaker, ka lawm e. DM&R changtu Minister zahawm tak hnenah lawmthu ka sawi hmasa duh a. Hma a lo la reng tawh mai a, mahse a la fel loh thuin min chhang a. Kan hriat tawh angin District Hospital, Lawngtlai bul hi KMMPPP Road an laihna avangin a min nasa tawh mai a, Hospital building a min thla tep tawh tih tur deuhthawin a awm tawh a, a manganthlak khawp mai a. Hospital thar a ni a, nuai 400 chuang man laia a building sak a ni a. Chuvangin chhan vat ngai a ni a, hmanhmawh zawka he building a chhiat mai loh nana han chhan theih chu ni se building thar chhe loa tih theih tur kha a niin a lang bawk si a. Chuvangin, mitigation atanga kan state sum neih sa hmang a tih theih te a ni mai lo maw tih leh, a theihloh anih pawhin central lamah chak zawka hma lak theih a ni ang em, tih hi ka zawh belhna leh ka ngen duh a ni e.

SPEAKER : A theih ang anga chhang turin Minister zahawm tak, Pu Lalchamliaana ka awm e.

PU LALCHAMLIANA, MINISTER: Pu Speaker, zawhna neitu zawh belhna kha, ka sawi tawh angin Central lamin guidelines an la siam fel loh avangin he District Hospital, Lawngtlai bul leimin siamthatna tur crore 1,37,71,900 (vaibelchhe khat, nuai sawmthum pasarih, sing sarih, sang khat za kua) zet estimate siam chu khawih a la rem rih lo a. Theih tawp chhuahin kan lo en zui dawn nia tih kha ka chhanna ni ta se la.

Tin, Pu L. Thangmawia zawhna, Ngopa leh Mimbung-ah leimin a awm tih a ni a, chu lo pawh chu a tam mai a, Khawzawl ah te, Phullen ah te pawh khan a awm a ni a. Hengah te hian kan theih ang angin kan mithiam te chu kan han tir ve a, amaherawhchu a bul thum berah chuan a pawisa lai te hi kan harsatna ani fo mai a. Department chuan theihtawp chhuahin chak taka hmalak hi kan duh ngawih ngawih a. Mahse central lamin pawisa min pek a tlem si a, project hran angin han siam ila an uikawm leh angreng viau bawk si a, chuvang chuan tun maiah chuan hma kan la thei rih lo tih kha kan sawi duh a.

Tin, Lunglei North bialtu zahawm tak Dr. Vanlaltanpuia zawhna kha, central-a project 14 (sawm leh pali) concept paper kan thehluh zingah, construction of diversion road to Tourist Lodge, Zotlang tih leh, construction of gabion wall, Thenzawl - Lunglei road below Tourist Lodge tih te hi kan thehthlak tawh zingah an tel a., crore 2 dawn lai a pahnih hi chuan a ni nghe nghe a ni tih kha ka chhanna ni ta se la. A theih chin chinah tunlai chuan MIRSAC thiamna hi hman tha kan ti a, an remchan dan ang zelin kan in associate zel a, helai bikah hian an tel leh tel loh erawh chu tunmaiah hian ka sawi thei bik lo tih kha ka chhanna a ni e.

SPEAKER : Zawhna kan la la leh thei a, Starred Question No. 99 zawt turin Member zahawm tak Dr. Vanlalhlana ka sawm e.

DR. VANLALTHLANA : Pu Speaker, ka lawm e. Home Department changtu Minister zahawm tak chhan atan -

- a) Ministry of Home Affairs-in ramri chungchanga Mizoram sawrkar ngaihndan a rawn zawhna kha chhan a ni tawh em?
- b) Zophai 1st IR Police ho awmna building sak that tura tih kha siam a ni tawh em?
- c) Kum 2019-20 leh 2020-21 chhungin SEDP Allocation pum pui atanga tehin Home Department hian engzat nge a dawn (a percentage-in)?
- d) Mizoram ramri chin map kha siam fel a ni tawh em?
- e) Special Task Force Committee for Dectection, Detention and Deportation of Illegal Bangladeshi Immigrants hian kum 2019 leh kum 2020 chhungin mi engzat nge a man tawh?

SPEAKER : Chhang turin a changtu Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, Member zahawm tak Dr. Vanlalthlana zawhna chhana -

- a) Ministry of Home Affairs-in ramri chungchanga Mizoram sawrkar ngaihndan a rawn zawhna kha chhan ani tawh e. Nikum October Ni 16 khan Mizoram sawrkarin chhanna a thawn tawh a ni.
- b) Zophai-a 1st IR Police ho awmnaa building sak that tura tih kha thil chi hnihin a sawi theih ang. Pakhat chu, Zophai 1st IR Police ho awmna building hi siam/thawm that mek a ni tih a ni a. Hei hi a rei deuh hlek tawh a, a zo tawh ngei turah ka ngai a ni.
- c) Home Department-in sum a dawn zat chu SEDP Allocation pumpui atangin 0.40% a ni.
- d) Mizoram ramri chin map hi, Inner Line of the Lushai Hills Notification No.2106 A.P. Dated 9th March, 1933 behchhanna Survey of India-in map an siam chu a awm a, boundary dang ang chuan final map buatsaih a la ni lo. Survey of India in he map a siamah hian a ram leilung (ground) a state sawrkar pahnih te remtihna ve vea tihchian tun thlengin a la awm lo.

SPEAKER : Zawhna leh Chhanna hun a tawp a, kan chhan zawh tir law law mai dawn em? Awle, chhang zo law law rawh le.

PU LALCHAMLIANA, MINISTER: Pu Speaker, zawh belhna a awm dawn loh avangin

PU VANLALHLANA : Pu Speaker, a chhan hma khan ka lo zawh belh lawk teh ang, chhan nghal law law atan.

Ramri chungchang kan sawrkarin central ministry a chhanna copy kha min pe thei ang em? Confidential a ni nge, kan hmu ve thei em?

SPEAKER : Ngawi rawh aw, ala chhang zo lo deuh a, original question hi chhang zo phawt sela aw.

PU LALCHAMLIANA, MINISTER: Pu Speaker, Chief Secretary hova Committee, MZP te, JAC te leh midang dang thukhawm hian theihtawp chhuahin document an ching a, Toposheet an nei fel deuhthaw tawh a, an toposheet-ah hian, 'Hei hi Ground survey la neih loh a ni' tih kha a inziak deuh zel a ni. Chu chu ka sawifiah duhna chhan a ni.

- e) Special Task Force Committee on Detection, Detention and Deportation of Illegal Bangladeshi Immigrants te hian kum 2019 - 2020 chhungin dan bawhchhia man an nei lo.

Helaia Special Task Force chungchang hi Pu Speaker, member zahawm tak tak ten an hriatfiah theih nan tawngkam khat lekin ka han sawibelh ang a. State level-ah Chief Secretary hovin Task Force siam a ni a, District level-ah DC hovin leh Sub-Division level-ah siam ani bawh a. Mahse 2019-2020 chhungin man an awmlo anih chu. Ka lawm e.

SPEAKER : Awle, Zawhna leh Chhanna hun a zo a, tunah Pu Lalchamliaana Home Minister zahawm takin, kan Dan 60-na angin kan thenawm ram Myanmar atanga raltlan lo lutte chungchangah statement siam a rawn dil a, phalsak a ni a. Tunah Pu Lalchamliaana statement sawi turin i lo sawm ang.

PU LALCHAMLIANA, MINISTER: Pu Speaker, nichina member zahawm tak pakhatin a zawhna detail-a sawi hi a remlo ang a, a thalo zawk ang e a tih avangin, kan statement draft sa pawh hi kan han ti danglam leh a. Tawi deuh tek tawkin a tlangpui zawr zawrin kan han siam a, Pu Speaker, hei hi ka statement chu a ni.

February Ni 1, 2021 khan kan hriat theuh angin kan thenawm ram Myanmar Army te'n mipui thlan sawrkar dinglai sipai chakna hmanga paihthlain anmahni thuneihna an inpe a. Tin, hemi ni atang hian national emergency an puang nghal bawk a. Hetianga democracy palzuta sipaite'n thuneihna inpe chung a rorelna an kalpui mek avangin Myanmar ram chhung hmun hrang hrangah dodalna leh duhlohna mipui ten an kalpui mek a. He thila Myanmar Army leh anmahni dodaltu mipui, civilian-te inbeihnaah thi leh hliam eng emaw zat an awm tawh hi a pawl takzet a, an ramah boruak tha leh muanawm awm thuai se a duhawm hle a ni.

Hetiang dinhmuna an awm avangin Mizoram chhungah Myanmar atanga raltlan lo lut an awm tan a, hnamdang mi (foreigner) chungchang hi central sawrkar thu liau liau anih avangin India sawrkar thu ngaihchan mek a ni a. Chutih rualin thuneitute thu pawh ngaichang hman lova humanitarian crisis avanga India ram, Mizoram-a lo lutte chu an nihna leh tul dangte fel taka record a, a tul dan anga chhawmdawl anni ang. Hetianga raltlan lo lutte chhawmdawl zel dan tur chu central sawrkar kaihhraina anga kalpui tur a ni ang.

India ramah hian Mizoram bakah Myanmar nena ramri nei state dang pathum, Manipur, Nagaland leh Arunachal Pradesh te an awm a, India leh Myanmar inrina boundary hi kilometre 1643 a thui a ni a. Mizoram nen 510 kms, Manipur nen 398 kms, Nagaland nen 215 kms, Arunachal Pradesh nen 520 kms a ni a. India hian 1951 United Nations Refugee Convention leh he convention kaihruaitu, 1967 protocol te hi a join ve loh avangin he convention leh protocol hian refugee chungchangah India hi a phuar lova. Hei vang hian raltlan te hi tunlai a Myanmar rama thilthleng avanga an awm zel dawn anih chuan Mizoram chauh nilovin heng state 3 Myanmar ri ve tu ah tepawh hian an awm ve ngei turah ngaihtheih anih avangin central sawrkar Ministry of Home Affairs thu ngaichang chung a kal a ngai ang. Ka lawm e.

SPEAKER : Awle, kan hriat angin hetiang hi sawi zawm ngai a ni lova. Kan Minister ten an department kaihhranawih thil pawimawh House an rawn hriattir thin hi a lawmawm hle ani.

Tin, vawiin hian member zahawm tak Pu H. Lalzirliana, a biala In sarih lai mai kang ralin harsatna an tawh a, bial mipuite thlamuan turin a kal a, Leave a rawn dil angin kan phalsak ani.

Awle, Financial business-ah kan kal leh tawh ang a, Chief Minister zahawm tak leh Finance changtu ni bawh, Pu Zoramthanga'n 01.03.2021 (Thawhtanni) a budget a pharh, "The Annual Budget for the year 2021 - 2022 with allied papers" kha sawihona kan neih chhunzawm ang a. Kan tih tawh ang khan minute 10 kha kan ti leh mai dawn lawm ni? House-in tha kan ti maw? Kar hmasa lam khan member 13-in an sawi tawh a, tunah tunge sawi hmasa ber ang? Awle, Pu L. Thangmawia ka sawm e.

PU L. THANGMAWIA : Pu Speaker, ka lawm e. Covid-19-in nikum chhung zawng leh tun thlengin min nuai a, Governor speech ka lo chan dan ang tho khan kan budget pawh hi eng ang takin lo chhuak ang maw ka lo ti a. Kan Budget speech atang hian budget chapo lo tak a ni tih a lang a, kan Chief Minister zahawm tak Finance Minister ni bawh leh Finance lama thawktute pawh he hun harsa laia sum enkawl na kawng leh kum thar pawisa tur ruahmanna-ah pawh hian an rim viauin ka ring a, an chungah lawmthu ka sawi hmasa a ni.

Pu Speaker, point 3-naa kan hmuh - mamawh tul zual dah thiama, chumi phuhruk theih ngawt pawh chu chona lian tham tak a tling a ni tiin kan Finance Minister zahawm tak hian a sawi a. Hei hian tun tuma kan budget hi eng emaw chen chu a tichiang viauin ka hria a. Chutih rual chuan Pu Speaker, 14th Finance Commission alo liam a, 15th Finance Commission-ah kan lut a, kan hriatthiam phak ang chuan 15th ai hian 14th kha a tha zawk emaw ni chu aw a tih theih a. Tin, sawrkar hmasa vanneihna chu Zu chhiah a maka maka tam kha an hmu a, chuti chung chuan kan kawngpui dinhmun te kan hre vek a. Hun harsa ah nikum lamah pawh interim report hmangin kan kal a, kan share te tihhniam a ni a, tin, state insem te pawh tihpun a ni a. Chhiah a tam si lova, a kal pangngai tho, a lei an tama chhiah lut tam kha a ni tho mai si a. Hun harsa, chhiah lakna tur dang tam si lovah kan kal ve zel a ni tih chu kan hriat theuh a ni a. Pu Speaker, chutih lai chuan mawhphurhna la tu Finance lam ten hah takin hma an la a, kan Chief Minister zahawm tak kaihhruai hi hun hmasa lamah pawh kan hmu tawh a. Khatih lai khan inremchemna kawngah sawrkar motor kawh thei chin te tihdanglam a niin ka hria a. Tunah pawh hian Pu Speaker, Vehicle Outsourcing Policy, 2019 kan hmu leh a, kan budget speech-ah erawh hi chuan a lang lova. Covid-19 len hma pawhin he sawrkar hian inrenchem turin hmalakna awmze neiin a kal chho a ni. Tute sawrkar emaw, a tui bottle tih tet ang chauh nilo khan awmze neiin hma a la a ni tih alangin ka hria a, a lawmawm ka ti hle a ni.

Pu Speaker, kan sawi tawh ang khan Covid-19 hripuiin min nuai a, Mizoram chauh ni lo, India ram mai pawh ni lo khawvel pum kan buai chho a ni a. Chuan, kumin 2021 - 2022 budget pawh nasa takin a nghawng dawn tih chu kan hre theuhin a rinawm a. Amaherawhchu, a lawmawm lampang han sawi ve thung ila Pu Speaker, i remtihain.

Tunah chuan vaccine-te siam chhuak tawhin, hei Mizoram-ah pawh a la engemaw zat kan awm tawh a. Member zahawm tak tak zingah pawh kum upa lampang chuan hmanni ah khan an la nualin ka hria a. Kumin chhoah hian he hriina min kiansana alo ziaawm chuan kan economy pawh hi nikuma kan mangang em em ai chuan a zia awm mai awm mange aw ka ti a.

Tin, Mizoram hi vanneihna tak Pu Speaker, kan neiin ka hria a. Mi ramte angin thil siamchhuahna lian pui pui migrant worker-ho haw ruih ruih tur awm ang chi kha kan ngah lo deuhin ka hria a. Kan economy-in nghahna sawrkar hnathawk leh thil sumdawna lam ang chi te pawh hi covid-in a tihbuai deuh chu awm mahse, mi thenkhat hlawkpui hial zawk te pawh awmin ka hria a, sumdawngah pawh. Chuvang chu anih ka ring a, kan sum hmuh hi chu ti tehchiamin nikum khan a tlachhe lem lo a ni, kan Supplementary Demand leh Finance minister-in a document hrang hrang a han en pawh hian. State dangah erawh chuan migrant worker an haw sung sung a, thil siamchhuah alo tlem a, an state bihchiang ngat ila chuan kan state aia tuar fe fe an awm ka ring a ni.

Pu Speaker, India ram hi tlem sawi tel loh chuan Pu Speaker, hei, covid vaccine atan hian tun union budget February-a an pharh takah khan crore 35,000 dah a ni a, hei bak hi chu a tul angin Union Finance Minister-in kan ti zel ang a ti a, a lawmawm khawpin ka hria a. Chuvangin, Mizoram puma Mizo mipuite pawhin Mizoram-a cheng ten kan lak theih hun pawh a nghahhlelhwam hle a ni. Tichuan, covid-19 avanga kan buaina te tirehin kan khawtlang nunphung pawh hun reiloteah pangngai chho turin beisei ta ila. Hei, India ram ang pawhin GDP tlemna a contruction pawh nikum first quarter, April to June, 2020-ah hian 23.9% anih lain, 2nd quarter (covid vanglai aniang chu) July to September, 2020-ah chuan 7.5%-ah a tlahniam tlat mai a, a lawmawm khawp mai a. Economic survey-a alan danin kum 2020-21 atan 7.7% turin an han chhutlawk chhin kha a ni a. Tichuan, 2021-2022 hian GDP thatna hi 11% vel ni turin an chhut a, hei hian nikuma central atanga kan sum hmuh tur kan beisei kan hmuh loh budget speech-ah pawh lo lang crore 1,185.03 hi kuminah chuan awm tawhlo tura beisei theih a, a chhan chu GDP hi 11%-anga project-a alan tawh chuan. Chuvangin, a lawmawm zawng te pawhin Pathian rinchanin a thlir theihin ka hria a. Tam takin heti zawng hian tiin sawisel tum hrim hrimte pawh a awm thei a, a welcome awm vek a. Achhan chu budget hi *fact and figure* a ni lova, ruahman lawkna, base neia kan tih anih avangin khang ruahman lawkna kha kan beiseina te a rawn hlawhtlin loh chuan, nikumah ngei pawh crore sang telin kan beisei ang kan pha ta lo kha a ni a. Chuvang chuan, tunah erawh chuan covid han zo zelah hian Pu Speaker, kei ka beiseina a sang khawp mai a.

Tin, kan sawi tak ang khan, 2020-21-a central atanga sum kan dawn tur kan beisei zat kha crore 1,185.03-in kan phak loh bakah khan, 15th Finance Commission-in special grant cheng vaibelchhe 546 min recommend sak tawh pawh kha kan hmulo zui a ni a. Heti chunga kan kawngpuite tam tak siam a ni thei te, tin, buhfai leh thildang chatlak awm miah lova a kal chho te hi a ropui khawpin ka hria a Pu Speaker, a thawktute chu an hah viau turah ka ngai a. Chuvangin, khami kan dawn kim loh ringawt pawh kha keini ang state lian

lem lo tan chuan harsatpui tham tak a ni. Kuminah erawh chuan central atanga kan hmuh tur kan beisei zat ang hi kan hmuh theih chuan kan state lakluhah hian han tang hret bawh ila; mipuite tawiamna te pawh he House zahawm tak kaltlang hian Pu Speaker, ka ngen duh a. Central ringawtah inngat pumhlum lo hian, keimahni thawh ve theih ang chi hi chu kan thawh ve a ngai a ni. Tin, central-ah chuan income tax-te an pe zawk a, keini hian kan pe lova, chuvangin, a neilo chu kan chhawmdawl ang a. Amaherawhchu, tih ve theih si sawrkar-a sum luh theihna deuh kha chu kan ngaihtuah a ngai a. Department lam pawh hian tan an la a, hei procurement, GEM an ti mai a, hengte pawh hi hman tangkai chhoh tum ila, DPAD-te kan tih ngai lovin tlawm zawkin tikhan a awm thei ang a. Local market engemaw chen chu effect mahsela, kan local mi te pawh an in register ve thei vek tho bawh a. Chutiang tur chuan Pu Speaker, khawngaih takin hun reilo te kan sawibelh lawk ang a, ka sawi zo tep tawh e. Chuti zawnga tan kan lak thiam deuh chu angai ang a.

Tin, 15th Finance Commission rawt dan ang phei chuan central atanga kan sum hmuh hi a zuih zawngin a kal hret hret dawn a ni. Chumi tura kan lo inpuahchah loh chuan tun atanga hun rei vak lo, kum 2 kum 3 a kal chuan a tuar tur chu mipuite tho kan ni. Chutiang tur chuan sawrkar lam pawh kan theih tawp chhuaha, mipui lam pawhin min tawiam kha a ngaiin ka hria a. Kan ngaithla tawh nualin ka ring a, vertical devolution 42 ni thin 41-ah tihhniam a ni a, tin, revenue deficit grant pawh state 14 atangin state 17-lai pek tur alo ni leh ta a, a pek zat tur ngai reng si, a pek tur tam ta si a kha kan tawn tlemna tur anih hmel a. Kumin 2021-22 hian state 17 tan cheng vaibelchhe nuai 1,18,452 ni turin central lam chuan an han project a ni a, chhiah an hmuh that dan azirin. Engpawhnisela Pu Speaker, kan state thawhchhuah tur state own tax atanga sum hmuh tura kan beisei cheng vaibelchhe 719.56 hi Pathian hruainain leh mipuite tawiamna zarah khum theih tumin kan rilru awm ta sela. Tichuan, nikum budget estimate (BE) aia a punna chu 8.75% lai ni mah sela, kan tan tlan chuan kan ti theiin ka ring a. Tin, non-tax revenue atanga hmu tura kan inbeisei kan Finance Minister-in budget pharh nia a sawi vaibelchhe 852.26 pawh hi kan hmu thei turah beisei ila. Heng a niha Covid-te a rawn ziaawm chhoh chuan harsa lutuk loin kumin hi chu a kal theiin ka ring a.

Engpawhnisela Pu Speaker, a tawp nana kan sawi duh chu, kan budget hi Covid hunlai, hripui lenlaia pharhah chuan a lawmawmin ka hria a. Amaherawhchu, a budget a hlawhtlin theih nan hian sawrkar hnathawkte, mipuite, tin, keini sawrkar, a a dan siamtu lam leh a sawrkar hruaitute kan tan tlan a tul tak zet dawnin ka hria a ni. Ka lawm e.

SPEAKER : Tunge sawi leh ang? Member zahawm tak Pu H. Biakzaua ka sawm e.

PU H. BIAKZAUA : Pu Speaker, ka lawm e. Khawvel leh India ram pum huap Covid-19 hripui leng avanga harsatna Mizoram pawhin nasa tak kan tawh mek laia 2021-22 budget estimate kan Chief Minister zahawm takin a rawn pharh thei hi lawmawm ka ti takzet a. Hripuiin sawrkar sum nasa takin a ei huau huau mek a, chutih mek laiin a

thawkhhuak tute lam pawh nikum atang khan thawkhhuak tawh lovin an ngawi thuap baw a, indaih taka awm leh khawsak thil harsa tak ni pawhin a lang a. Kan budget-hi duhthusam diak diak angin sector hrang hrangah tamlo mahse a tlangpui thuin a tha thawkhat ve chuan kei chuan ka hria a. Central budget a tlakhniam laia kan state budget a pung thei te pawh hi tehkhawng chi khat atang chuan budget tha a ni kan ti thei mai awm e. State disaster management fund kan dawn turte pawh tlahniam lovin, central lam sum a tlakhniam laia dinhmun pangngaia kan han ding pha leh te pawh hi a lawmawm hlein ka hria a ni.

Tin, kum kal mek BE atanga cheng vaibelchhe 1,185 leh special grant vaibelchhe 540 sawrkar laipui atanga kan beisei kan hmu lo chung pawhin hlawh lak theihloh tih emaw, treasury khar hial ngaia kan awmlo hi kan Chief Minister zahawm tak Finance Minister ni baw financial management a thiam vang a ni kan ti lo theilo a, a lawmawm pawh ka ti khawp mai.

Kum kal mek aiin kuminah GSDP 19.97% laiin a thangchho dawn niin a lang a, a lawmawm in ka hria a. Tin, BE atanga kan State Revenue Receipt pawh 16.05% thleng thei tura beiseina kan nei thei pawh hi a lawmawm hlein ka hria a. Tin, Revenue Surplus cheng vaibelchhe 579.42 kan beisei thei pawh hi a lawmawm hlein ka hre baw a. BE hi kan hriat angin beiseinaa kal kan ni a, mahse kan beisei ang kha kan achieve ngei dawn em tih kan hre lawk thei lo nain chutiang ngaihtuahna, ruahmanna leh beiseina sawrkarin kan han nei chho thei hi a lawmawm ka ti a. Tin, kum kal mek aiin sawrkar leiba BE tharah a tlahniam thei dawn te pawh hi a lawmawm ka ti a. A tlakhniamna tur hi tam lo mahse 0.90% velin kum kal lai ai hian a tlahniam thei dawn niin a lang a, a lawmawm hle in ka hria a ni.

Tin, Pu Speaker, revenue receipt-ah state-owned tax leh non-state-owned tax ah kumhlui aiin kumthar BE chu nasa takin a pung chho dawn niin a lang a, 26.27% in a sang zawk dawn niin a lang a. Kan Chief Minister, Finance changtu zahawm tak hian thiam taka sum tihpun dan tur te pawh a ngaihtuah niin ka hria a, a lawmawm hle in ka hria a ni.

Tin, Post Devolution Revenue Deficit Grant pawh kum kal meka kan sum hmuh tur aiin BE tharah a sang zawk dawn niin a lang a. Kan budget hi a felfai lohna tur emaw helai hi tia han sawi tur ang chi a awm pawhin ka hre lova. Kan sum hmuh dan mil taw a ruahmanna siam a nih avangin a tha thawkhat hlein ka hria a ni.

Expenditure lam han en hian Revenue Expenditure BE tharah hian 82.67% dah a ni a, BE tuna kan hman mek aiin a sang a, mahse RE kan hmuh tur leh kan beisei aiin a hniam leh thung a. Helai hi indaihlohna leh harsatna emaw lo awm palh thei a awm a nih pawhin kan Finance Minister leh Chief Minister zahawm takin helai harsatna hi chu a solve thei turah ngai ta ila, a thlamuanthlakin ka hria. Central atanga kan sum beisei kan hmuhloh tam tak a awm chung pawhin kan CM zahawm tak hmalakna zarah kum kal mekah tumah hlawh la theilo emaw kan awm chuang hleinem tih te ngaihtuahna min neih tir a. Chuvang chuan

a management lam hi kan neihchhun leh kan hmuh ang chhun manage thiam a tul dawn ni pawhin a lang a.

Tin, Pu Speaker, Capital Expenditure hi BE atanga 17.33% a ni a, kum kal mek BE aiin cheng vaibelchhe 239.35 velin a pung dawn hi a lawmawm hlein ka hria a ni.

Tin, Sectoral Allocation pawh sum dinhmun mila siam niin a lang a. Hei ai hian economic sector-ah tam se han tih ngawt ang chi te, social sector-ah pawh ni se a theihlohna lai kha a awm ve tho dawn a ni. Kan sum mil tawka helai sectoral allocation te pawh hi duanchhuah a niin ka hria a, a lawmawm hlein ka hria a ni.

Tin, SEDP-ah crore 400 leh MNF returnee te thiam that leh enkawlna tur crore 5 leh MLA LAD Fund a han awm leh te pawh hi a tha hlein ka hria a. Covid hrileng avanga MP-te pawhin kum 2 chhung MP fund an neih theih loh laia keini MLA-te, kan state revenue-te a la tam vak loh teh lul nen MLA fund te pawh kan bialte tan pek theihna tur kan Finance Minister zahawm takin a han buatsaih leh te pawh hi thil lawmawm tak a niin ka hria a ni.

Tin, Pu Speaker ADC pathumte budget same size-a duan tur niin a lang a, hei hi ADC-te tana kumin kan BE kal laia budget punna kha 12.47% a ni a. Kan CM zahawm tak Pu Zoramthanga kaihhruai Mizoram sawrkar hian ADC-te hi a ngaihven hle thin a, a tul chuan sum pek belh leh an indaihlohna phuhruk sak hi kan CM zahawm tak hian harsa a tih ka ring lo a. Tunah same size-in kal mahse BE-a kan tih ang khan ruahmanna leh beiseinaa kal kan nih avangin, heng hi kan sum hmuh a tam chuan ADC-te pawh pek belh leh an indaihlohna hi chhunkhah sak kan CM zahawm tak hian a tum ka ring a ni.

Pu Speaker, tawite kam hnih khat leka ka sawibelh duh chu, khawngaihin. Kan state-in chhiah lakna tur sector kan ngah lo hle a, chhiah lakna tur zinga hlawk berte zinga mi zu kan zuar duh si lo a kan sawrkar hi chuan. Chuvangin, zu chhiah tel loin kan budget hi a lo pung ve thei tho dawn ta mai niin a lang a, a lawmawm khawpin ka hria a.

Tin, hripui leng karah kawngpui chhia siamthat mek zel a ni a, buhfai, gas, tui, electric leh nitin mamawh harsa loin kan awm hi a lawmawm tak zet a. Covid-19 hrileng kan dona kawngah pawh sawrkar a ti tha em em mai a, kan hotute, sawrkar hruaitute an thawk tha a, hetiang dinhmun kan han thlengte hi a lawmawm hle a ni.

Tin, Sports lamah, kan thalaite dinhmun chawikan theihna turin sport infrastructure-te pawh tha takin tunah buaipui chhoh, hmalak chhoh a ni mek bawk a. Hripui leng avanga khawvelin harsatna kan tawh mek lai hian mipui lam pawhin thawhchhuah neih kan tum ve a tul hlein ka hria. Sawrkar hmalaknate tawiam thiam, tax te pawh tha taka kan peka hna kan thawha, thawhchhuah kan neih ve leh keimahni ina intodelhna kawng kan zawn ve hi,

mipui pawhin sawrkar atanga thil tha kan hmuh ang chiahin mipuiin sawrkar hnenah thil tha kan tih ve pawh hi a tul tak zet niin ka hria a ni.

Kum kal mek BE aia cheng vaibelchhe 433.89-a tam vaibelchhe 11,148.89 belh BE kan han nei tur hi lawmawm ka ti a. Duhthusam ni vek lo mahse budget tha tak tehna pakhat nia ka hriat ve chu, kan budget a pung thei hrim hrim hi budget tha chu a ni ve mai lawm ni tih ngaihtuahnate min neih tir a ni. Pu Speaker, ka lawm e.

SPEAKER : Veilama mite hi an va ding lo ve, ding ve tawh u la. Awle, Member zahawm tak, Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e. Kan budget tharte kan han en a, budget ropui tak leh duhthusam chu a ni lo a, amaherawhchu tun ang hunah chuan budget duhawm tak niin ka hria a. Pu Speaker, hun harsa leh khirh karah hetiang budget kan han pharh thei leh hi a ropui hlein ka hria a. Nichina ka sawi ang khan budget duhawm leh ropui tak nilo mahse tuna kan han pharh chin hi chu a duhawm tawh hle a. Kan ram tan, kan hnam tan kan kal chhohpuina turah pawh hei hian hma nasa takin min sawnpui thei ang tih ka ring a.

Kan hre theuh ang a, khawvel ram pumpui, Mizoram leh India-ah mai ni lo khawvel ram pumpui economy a tlahniam em em mai a, chutiang karah chuan kan Finance Minister zahawm takte kan official lam ten remruatna neiin tun kum kal chho tur 2021-2022-a kan GSDP thanna turah 19.97% anga a figure an rawn la dah thei te hi a lawmawmin a ropui ka ti a. Hetiang anga ngaihtuahna seng hotu kan nei hi a lawmawm hlein ka hria a ni.

Pu Speaker, kum 2020-21 financial year kal lai mekah sawrkar laipui atanga kan hmuh tura kan beisei cheng vaibelchhe 1,185 lai mai kan hmu lo kha a pawh hle in ka hria a. Kha kha a tam tham khawp mai a keini ang State te tan phei chuan hmasawmna tham a niin ka hria a. Tin, chumai ni lo in 15th Finance Commission in Interim Report a Special Grant atana min recommend tawh vaibelchhe 546 kan han dawng lo bawh a. A vaiin vaibelchhe 1731 lai mai tunah khan kan han dawng lo a ni a tun Financial Year kal chhoah. A uihawm tham hle mai in ka hria a. Tuna kan Capital Expenditure tura chhut vaibelchhe 1731 lai mai kha kan han dawng lo kha a ni a. Ram hmasawmna hna tam tak a kal thei lo tih kan hria a. Tin, khawvelah, India ramah, Zoramah natna hri avangin buaina namen lo kan tawh bawh a. Chutiang karah chuan vawin min thlen chho a. Sawrkar hnathawk ten an hlawh pangngai la la chho thei tura ruahmanna te siama sawrkar kalphung pangngai anga kal thei tura min hruai thei tu kan Chief Minister leh Finance Minister zahawm tak ten remruatna an nei te hi ropui ka ti a. He kan sum neih ang ang te hi nuam tawl nan emaw sawrkara sum a ni lo lama hmang lo va, a nihna tur ang thlapa hmang thin mi, ngaihtuahna seng Finance Minister kan nei niin ka hria a, a lawmawm hlein ka hria. Tin, hun harsa leh hun khirh Zoram in a tawh a, chumi hun harsa leh hun khirh a tawha Zoram mipuite

khaichhuak thei tura Pathian bel ruat hruaitu Chief Minister kan nei niin ka hria a, ka lawm tak zet a ni tih kha kan sawi leh duh baw k a.

Tin, Pu Speaker, kan sawi tawh ang khan tun financial year kal lai mekah hian khatiang khawp a pawisa tam kan dawn tura beisei kan dawnglo chung pawhin he sawrkar hian hmalakna nasa tak a nei a. Kan hre vek a, Covid-ah harsatna tam tak kan taw k a, chutiang chung chuan ei leh in, gas-ah te, oil-ah te harsatna em em taw k lovin kan ram kan kal chho thei a. Tin, chutih mek laiin Assam nen kan inri naah ramri buai kan han nei chho char char mai a, a hahthlak viau mai a, sawrkar lu pawh a hai viauin ka ring a. Amaherawhchu, helaia ka sawiduh chu, hetiang anga sum leh paiah pawh tun financial year chhunga pawisa kan tlakchham em em emaw, pawisa kan duh ang taw k kan hmu lo chung pawha ram venhimna tur te, ramri hmasawna tura kan Finance Minister inpekna leh a remruatna neih te hi a ropui ka ti a, tlema zawng han sawichhuah ka duh a.

Hei, thil lawmawm deuh mai chu, tun MNF Ministry a rawn din hian Vairengte-ah khuan tunhna zawng, sawrkar hmasa lama ramri anga kan lo neih thin chu Police check-gate awmna khu a ni thin a. Chumi thlang lamah chuan civil hian hma an la ngam thin lo a ni. Amaherawhchu, tun Ministry a rawn din atanga kum 2 chhung hian km 1 in ramriah khuan hma kan sawn thla a ni tih hi ka sawi duh a. Harsatna leh buaina a rawn awmin eng tin nge kan ramin hlawkna kan neih ve ang tiin kan hotute'n ngaihtuahna an seng a. Tunah khuan Vairengte side lamah 1 km laiin ramriah hma kan sawn thla a. Tin, ramri humhalhna tur chuan a ramri khuate kha hmasawna pek an ngai a ni tih hi kan hotute ngaihdan a nih ka ring a, chutiang chuan ruahmanna an rawn siam thin a. Engtik lai maha khulai ramri bawra la awm ngai lo Buarchep kawng te PWD atangin PCC flooring min siamthat sak a. Tin, Saihapui-V kawng pawh tunhnai lawk khan kan Finance Minister zahawm takin min tih chhuah sak a. Nimin lam atang khan bungrua an indah a, tun karah hna an thaw k chho mawlh mawlh dawn a. Khulai kawngchhe kumhlun eng sawrkar mahin an khawih ngailoh kha kan sawrkar thar hian min khawih sak dawn a ni tih kha ka sawi duh a, kan lawm tak zet a ni.

Tin, mak ve em em mai chu, Vairengte khu khaw lian tak mai vote 7,000 chuang awmna a ni a, bawlhhlawh paihna mumal hi an lo nei ngai reng reng lo a, ngaihsak an lo hlawh ngai lo a. Tun sawrkar tharah kan Dy. Chief Minister zahawm takin ruahmanna a siam a, sum neilo chung chungin SEDP atangin min han pawh sak a, tunah khuan bawlhhlawh paihna hmun tha tak an nei ta a. A hma chuan kan hre theuh a, highway kawng anah an lo paih thin a, chulaiah chuan hmannah bawlhhlawh paihna thar kan zu hawng a, kan joint YMA hruaitu pakhat chuan, "Sawrkar hmasa lamah te ruah hmanna beisei kan nei thin a, min tihsak thei silo a, churang chuan helai kawng anah hian ramri venhim nan bawlhhlawh kan lo paih thin a ni," a ti a, ka rilru a na le mai a, ka rilru a khawih khawp mai a, kan hawnaa ka thusawiah pawh, "Tun sawrkar thar atang hi chuan bawlhhlawh chu a paihna hmunah in paih tawh ang a, ramri chu sipaiin an rawn veng tawh ang," ka ti a ni. Chutiang chiah chuan kan Home Minister, kan Chief Minister leh Finance Minister ten theih tawp

chhuahin tunah khuan a dai dengah sipai min han dahsak ta a, tunah chuan mipui an thlamuang a, tunhma atanga engtik lai maha an khawih ngam loh auto rickshaw stand ah khuan he House zahawm taka sawi ka duh a chu, VC-I ten tukinah mipui an ko khawm a, engtik lai maha civil-in an lo zu awm ngam ngai lohnaah khan sipai venna hnuaiah tunah khuan ram kan theh dawn a ni. Chutah chuan chhungkaw 79 vel In sak tir an tum a, sa nghala lua nghal thei turte pek an tum a ni. Chu chu a lawmawm hlein ka hria a, heng zawng zawng kan tih theihna hi kan Finance Minister leh kan hotute'n he natna hripui leng karah ruahhmanna an siam a, kan ram tan ngaituahna kil tinah an seng a ni tih hi a langin ka hria a, ka lawm takzet a ni tih kha ka sawi duh baw k a.

Tin, Vairengte-ah Fire sub-Station te min han dahsak a, tun hma zawng zawng chuan Dholai atang tein min thelh sak thin a, a ram mualphona, State mualphona a ni. Sum indaihlo karah kan hotute'n ruah hmanna siamin Fire sub-Station min han pe a, kan lawm takzet a ni tih kha kan sawi duh baw k a. Tin, Saihapui 'V'-ah Health Clinic Centre kan sa tan mek a, tunah an sakna hmun tur kawng an han lai zo a, tunkar chhoah hian a building tur te an han sa chho dawn a, khang ka han sawi deuh duahna chhan chu, he sawrkar hian buaina leh harsatna natna hripui pawh taw k mahse a tih tur dik tak ti zelin, ngaituahna fim tak hmangtu kan Chief Minister zahawmtak leh kan Finance Minister kan nei hi a ropui hlein ka hria a ni.

Tin, Pu Speaker, helaiah kan budget ka han en a thil lawmawm deuh mai ka hmu a, "Tun tum chu SEDP sum kan dah theilo ang a, kum kal mekah vaibelchhe 1700 chuang kan hmu thei lo a, tun kum hi a nghawng ngei dawn a ni" tia rilru kan siam laiin, vaibelchhe 400 lai mai an rawn dah leh thei hi a ropui ka ti a, hetiang ang ngaituahna siam theitu kan Chief Minister leh kan Finance Minister ni baw k leh kan official-te chungah hian lawmthu kan sawi duh a. Tin, he SEDP vaibelchhe 400 kan dah hi kan hotupa in a sawi ang khan, a chi tur, central lama pawh chhuah nana hman tur kan tih kha a ni a, chuvang chuan beiseina nen tun kum kal chho turah hian helaia kan ruahhmanna te pawh hi la pung chho deuh deuh turah ka ngai a.

Tin, lawmawm deuh a ka hmuh chu Pu Speaker, Returnees, kan hnam pasalthate he ram leh hnam khawvel hriata chawi chhuak tute tan vawibelchhe 5 daha bul an tan chho hi lawmawm hlein ka hria a, hei hi kan ngaih pawimawha, he ram in leh hnam in khawvel hriat kan hlawh theihna tura kan hnam pasalthate lo thawh tawhna, an tana malsawmna tura kan luan chhuah leh theihna turah hian Pu Speaker, hei aia tam pawh hi la pawh chhuah theih ni se thain ka hria a ni. Tin, Pu Speaker, tun kum chu MLA fund pawh hi kan nei bik lo ang a, India ramah pawh financial year hnih chung MP ten fund an nei thei lova, mahse tun kum a harsat em em lai pawhin keini min pe a, a dawt hi chu min pe lo mahse vui thei kan ni lo ka ti a, kan lo sawi thin a. Amaherawhchu kan Finance Minister zahawmtakin he House a kan thutpui kan Member zahawm tak takte, bial chhung development khawih theihna tura MLA fund pangai a rawn dah leh te hi a ngaituah kim hle in ka hria, he House zahawm taka

ka Member pui te pawh hian Finance Minister hnenah hian lawmthu sawi mawlh mawlh tur kan ni tih hi ka sawi duh bawka ni.

A tawp berah chuan, Pu Speaker, tuna kan budget hi sawi tawh ang khan kan duhthusama tha leh ropui nilo mahse he kan pawisa neih ang ang hi ram tan, hnam tan, tih takzeta rilru pea kan hotute'n ruahmanna an rawn siam hi pawm thiamin, chutiang tur chuan a hmanna lamah pawh fimkhur thiam ila, theihtawp chhuahin kan ram chuan hmasawn puina nasa tak kan hmu tho ang tih ka ring a ni. Ka lawm e.

SPEAKER : Tunge sawi leh ang? Awle, Member zahawm tak Pu KT Rokhaw ka sawm e.

PU K.T. ROKHAW : Pu Speaker, ka lawm e. Vawiin hi Budget General Discussion a ni a, tlem han sawi ka duh chu, kan Speaker hnenah hian lawmthu MLA-te hian sawi kan bain ka hria a. A chhan chu Pathian zarah he House-ah hian kum 20 kal ta atang khan member ka lo ni ve tawh a, opposition lam phei hi chuan Pu Hlana leh kei hi a senior ber kan ni tawh awm e. Pu Speaker, Mizoram hian India ram khawpuiah House kan nei nual a. Tunhma kha chuan MLA-te hi kan zinnaah motor vehicle hi provide kan ni ngai lo reng reng a Speaker, i nih hnu hian i remhriatna leh theihpatawpa hma i lakna a zarah khawiah pawh kal ila, Mizoram House apiangah MLA-te a tul anga motor provide kan ni hi i thawhrah leh i experience kan chhawr a ni tih ka sawi duh a, kan lawm viau a ni. (*SPEAKER: Chief Minister leh Deputy Chief Minister vang a ni e.*) Chief Minister chungah pawh ka lawm hle a ni.

Pu Speaker, he budget hi Finance Minister-ina budget speech a sawi atang khan sum leh paiah kan dinhmun a that loh zia chu a langchiang khawp a. Ka hriatthiam loh chu, chhiah lak belh tumna a awm lo ti siin tax leh non-tax revenue atanga hmuh belh tum kha a tam hle mai a, chu chuan mipuite kawng hrang hrangin min sawrfu chho dawn ni hian ka hria a ni. A chhan chu sum hmuh belh ngai zat hi nuai 7,963 a ni a, revenue tax atangin sum hmuh belh ngai zat hi nuai 5,773 lai a ni a, nikum budget revise estimate atanga a landanin. Chhiah hmuhbelh tumnaah hian... (*Dy. Speaker-in chair a la*) Chair in inthlaka hun kha min pek belh la ka lawm khawp ang. Chuvang chuan, mipuiin kan tuar leh ka ring tlat a ni. Finance Minister khan khawngaihni hei hi min hrilhfiah se ka duh khawp mai a. Tin, fiscal deficit hi kan GSDP atanga tehin 6.87% a ni a, Finance Commission danah chuan 3% aiin sang lo se tih a ni a, kan revenue expenditure a sang tual tual a, central atanga revenue deficit grant kan hmuh tur hi a tlem tual tual mai si a, engtinngge kum 2024 leh 2025 budget fiscal deficit hi 3%-in kan dahhniam leh theih ang tih hi min ngaihtuah tir a. Hengte hi kan Finance Minister-in nakinah khawngaihni min hrilhfiah sela ka lawm ngawt ang.

Tin, Pu Dy. Speaker, kan budget-ah Parking Houses Support Scheme (PAHOSS) atana pawisa chengkhat pawh dah a ni ta lo hi a mak ka lo ti khawp mai a, PAHOSS hi tha ka ti khawp mai a, a chhan chu Aizawl city hi traffic a tawt tawh lutuk a, vehicle lah hi a

pung chak em em mai a, tun atanga ruahmanna tha leh fel tak kan siam a ngai reng a, kan Chief Minister-in hetiang a lo ngaihtuah chhuak hi a ropui ka ti a, a tha ka ti bawk a. Mahse 2020-2021-ah khan PAHOSS atan hian cheng nuai 1,003 dah a ni a, mi 430 hnenah tanpuina kha pek a ni a, lirthei pawh 13,758 dah theihna tur siam a ni hi mipui pawh an lawm em em a, beiseina sang tak an neih laiin tun kumah hian PAHOSS-ah pawisa chengkhat mah dah a ni ta lo a ni. Tin, kan Chief Minister pawhin “Aizawl khawpui hi traffic jam lohna khawpuiah kan siam dawn a ni” te a ti a, a hmalakna hmasa chu PAHOSS hi a ni. Vawiina pawisa chengkhat mah a dah loh atang hian Aizawl khawpui hi traffic jam lohna khawpuia siam a tum tawh lo nge, engnge ni a chhan khawngaihmin min hrilhfiah sela ka duh khawp mai.

Tin, Pu Dy. Speaker, SEDP hi MNF flagship programme a ni a, SEDP avanga sawrkarna siam a mipuiin rorelnaa thuttir an ni. Mipuiin an vote-na chhan chu chhungkaw tin mai hnenah sum kan pe ang che u an tih vang a ni, chumi avanga vote tlin an ni. An sem leh sem loh chu nakinah kan Chief Minister-in min hrilhfiah sela ka lawm viau ang.

Tin, SEDP hnuaia pawisa dah hi kum tinin a tlem telh telh mai a, 2019-2020 budgetah khan vaibelchhe 750 dah a ni a, 2020-2021 ah vaibelchhe 513 dah a ni a, a inthlauhna chu vaibelchhe 237 a ni. Tin, 2021-2022-ah phei chuan vaibelchhe 400 chauh dah a ni a, nikum nen a inthlauhna chu vaibelchhe 113 a ni, a tlahniam tulh tulh mai a ni. He sawrkar flagship programme hi a hlawhtling dawn lo a ni tih hi SEDP-a sum an dah atang hian a langin ka hria.

Pu Dy. Speaker, tuialhthei chungchangah hian nikum June thla vel a niin ka hria a, covid-19 avang khan VAT tihpun a ni a, petrol 5% in a sang a, diesel 2.5%-in, petrol chhiah 20% lak thin chu 25% a tihsan a ni a, diesel-ah 12% atanga 14.15%-a tihsan a ni bawk a ni. State dangah pawh covid-19 avangin petrol leh diesel man an tipung ve a, mahse mipui hmakhua an ngaih avangin tunah hian an tihnam leh mek a ni. Chuvang chuan, VAT bik chu state sawrkar thuneihna anih avangin petrol leh diesel man hi tihnam leh hram ni rawh se. Diesel leh petrol man a san avangin vawiinah hian thil man zawng zawng a sang em em a ni, ei leh bar man pawh a sang em em a, miretheite tan khawsak ngaihna a awmla a ni. Chuvang chuan kan sawrkar hian petrol leh diesel man hi tihnam thuai se tih hi ka ngenna a ni.

Tin, Pu Dy. Speaker, boundary chungchangah hian tlem sawi ka duh bawk a. Nikum November, December pawh khan Assam nen kan buai khawp mai a. MLA zahawm tak Pu Andrew H. Thangliana zawhna ziaka kan Home Minister chhanna kha tlem han sawi lan ka duh a. Mizoram-in a ramria a pawm chin boundary pillar 46 phun niin ziaka document a awm thu a tarlang a. Tin, he boundary pillar 46 te hi December, 1984-ah pawh khan tha taka a la awm thu a sawi a ni. Tunah erawh chuan boundary pillar te chu a la awm leh awm loh thu tarlan a ni lova. Pu Deputy Speaker, kan hrulaitu hmasa te'n boundary-ah pillar 46 an lo phun tawh a ni. Hetah hian 1984-ah pawh boundary pillar hi a la tha vek a ni tih kan Home

Minister khan min hrilh tawh a. Kan sawrkar hian boundary hi an ngai pawimawh tak tak a nih chuan, a hmaa kan hruiatu hmasa ten boundary a pillar an phun te kha zawn chhuaha theihpatawpa hma an la turah ka lo ngai a, hei hi sawrkar tih mak mawh niin ka hria a, chu chu ka rawn sawi duh a ni, Ka lawm e.

DEPUTY SPEAKER : Pu Lalrintluanga Sailo, Member zahawm tak i lo sawm ang.

PU LALRINTLUANGA SAILO: Pu Deputy Speaker, ka lawm e. Awle, kan Chief Minister zahawm takin tahrik Ni 1-a Mizoram Budget 2021-2022 a pharh tak ngaihnawm taka a sawi, mi hawi zau lo leh mi mawl zawkte pawhina kan hriatthiam ve theih mai tura a sawi hi a chhuanawm hlein ka hria a. Kan ram sum leh pai enkawltu a tan a tlin zia pawh hi a thusawi atang hian a lang chiangin ka hria a, chu chu kan sawi hmasa duh a.

Hei, kan hriat angin Covid 19-in khawvel ram pumpui mai a tuam mek lai leh, a bik takin kan ramah Covid 19-in harsatna tam tak min siam mek bakah, Mizoram-a la awm ngai reng reng lo, thenawm state-in a rualin hmun 5 ngawt-ah harsatna min siama, kan state highway min pin sak lai leh hetiang khawpa harsatna kan tawh laia kan Finance Minister, kan Chief Minister ni bawh ina budget puitling mithiam zawkte leh kan Finance Minister hmasate pawh ina TV ah comment tha tak mai an pek hial khawp budget min pharhsak avangin lawmawm ka ti a. Kan Chief Minister zahawm tak Pu Zoramthanga hi chawimawi tlak a ni tih ka sawi duh a. Pu Deputy Speaker, ka sawi tawh angin kan Chief Minister zahawm takin kan ram a kaihruainaah hian point tam tak zingah vawiin hian point hnih/khat lek han tarlan duh ka nei ve a.

Pakhatnaah chuan Covid-19 khawvel leh India ramin kan hmachhawn lai mekin tute sawrkar emaw anga thuneihna pum hmawm hauh lova, thawh hoa, he hripui donaah hian a cabinet-te ringtawkin thuneihna pumhlum a pe a, a chhuanawm hlein ka hria a. Hetah hian ‘decentralization of powers’ tia political mi zawng zawngina kan sawi thin hi a mahah hian a takin a lo langin ka hria a, churang chuan a ropui ka tiin, fak tlak a ni tih ka tarlang duh a. Hei hian Covid 19-in Mizoram a runnaah pawh nasa takin harsatna karah kan ding chhuak theih a ni tih a ti lang a, a lawmawm hlein ka hria a ni.

A pahnihnaah chuan, kan thenawm state ten kan ramri hmun 5 ngawtah harsatna leh buaina min siam chungchangah hian sawi tur tam tak zingah han tarlan duh ka nei a chu, he sawrkar hian hemi chungchanga harsatna a hmachhawn danah hian a ni a, vawiin-ah hian Mizoram sawrkar kal tawh ina a la luah ngai reng reng loh kan police force ten vawiina an luah tak, electric supply chungchangah te leh tui supply chungchangah te rang leh mak khawpa in-charge Minister ten hma an la nghal a, vawiinah a taka kan hmang nghal thei te hi a lawmawmin ka hria a, tin, Mizoram pawh engemaw chen kan zauh a ni tih hi ka sawi darh duh a. Chuvangin, he House zahawm takah hian kan House Leader zahawm tak hmalakna hi a fak tlak mai bakah, a mak a ni tih hi ka tarlang tel duh bawh a ni.

Tin, chu mai bakah Assam lama harsatna kan tawh a vanga hmalakna ropui tak tak kan sorkarin a kalpui danah hian, kan state thenawm, a bikin Manipur leh Tripura lama kan Mizo unaute harhchhuaka, he sawrkar an tanna leh harsatna laka ta an theih ang tawka tanpui an duh zia an rawn au chhuak te hi kan in-unauna tinghet tu a lo ni ta zel tih te a langin ka hria a. Chubakah chuan International Boundary-ina min daidan tawh hnu Myanmar leh Bangladesh thlenga hmalakna avanga POL te, buhfai thlenga Mizoram-in harsatna kan tawh laia lo luang lutte hi kan Chief Minister zahawm tak kaihhraina avanga lo thleng a ni tih a takin kan hmu a, a lawmawm hlein ka hria a. Chubakah Bangladesh leh Myanmar lama Zofa-te in-unauna atana inpawhna thatak Pathianin a hawn sakna a ni ang tih te pawh a rin theihin ka hria a ni.

Awle, Pu Deputy Speaker, kha lam kha ka sawi thui lo ang a, sawitur a tam hle mai a, mahse budget lama han luh ve zawk ka duh a.

Vawiin-ah hian kan budget hi mi tamtakin han sawisel thin mahsela ka hriatrenga chu, MNF General Secretary kal chhuak ta, kum 1993-a Bilkhawthlir biala official candidate Pu Lalduhoma thusawi hi a ni thin a. Chuta a sawiah chuan, “Mi tute emawin Pu Zoramthanga hi mi huaisen leh fing a ni lo ti thin mahsela, kei chuan kan naupan lai atanga ka hriat chian a ni a, chuvangin a thil tih turah a Chiang a, a naupan lai pawha zirna kawngah te kan tluk loh leh, hmahlir fel tak nei, mi tumruh tak a ni” a tih hi he Covid-19 kan hmachhawn chungchang budget speech-ah hian a langin ka hria a. Vawinah hian he budget a pharh taka hi harsatna karah pawh nise a lawmawm hlein ka hria a. Kan hmuh leh kan hriat angin, khawvel sawrkar zawng zawngin harsatna kan tawh a ni a, economy lamah pawh kan tlachhe vek a, India sawrkar laipui pawh 8% ngawta a tlakhniam laiah pawh keini Mizoram state budget hniam hauh lova min hruaitu Pu Zoramthanga hi ropui ka ti a. Chuvangin, amaha Pathian atihna pawh lang hial thin, hmuh theih loh chu hmu chungin Mizoram hi a kaihruai a ni tih Pu Deputy Speaker, ka hria a. Chuta point pahnih/khat lek han tarlan ka duh chu, harsatna tam tak karah kan budget SEDP atan a vbc 400 lo lang te hi a tha hlein ka hria a. Hei hian hripui karah pawh kut hnathawktute hi sawrkarin a ngaipawimawh a chawikan a tum zia a lo langin ka hria a ni.

Tin, a pahnihnaah chuan, MNF returnee-te tan vaibelchhe 5 ngawt mai budget speecha lo lang te hi a lawmawm hlein ka hria a. He sawrkarin a taka ram leh hnam tana thawk tute la chhawmdawl loh chhawmdawl ngaite chhawm dawlna tura sum a dah te hi a ropui hlein ka hria a ni.

Tin, a pathumnaah chuan khuarel chhiatna lo thleng thei laka inenkawlina atana vaibelchhe 47 ngawt mai dah nawn a ni leh te hi a ropui hlein ka hria a. Hei hian ram enkawlina kawngah Nu leh Pa anih zia a tarlang bawkin ka hria a ni.

Tin a palinaah chuan, sawrkar laipui meuh pawh ina an MP-te Covid-19 natna avanga Area Development Fund kum 2 atana a pawh let sak vek laia kan Chief Minister

zahawm takin MLA Area Development Fund atana vaibelchhe 60 ngawt mai budget-a min han dahsak ta te ropui ka tiin, ram rorelnaah tumah thlei bik lova a enkawl zia Pu Deputy Speaker, a lang chiangin ka hria a. I ding leh veilama mite hian vawiinah hian lawmthu kan sawi a pawimawh hlein ka hria a. Chuvangin, heng hi chhuanawm ka ti tak zet tih ka tarlang duh a.

Tin, a panganaah chuan, Local Body Grant-a vaibelchhe 103 ngawt mai a lo lang hi lawmawm hlein ka hria a. Hei hian Democracy a ngaih pawimawh zia pawh a tarlangin ka hria a. Local Body thlengin hun harsa em em karah pawh theihngihlhi ni loa hetiang budget-a a lo lang hi lawmawm ka ti a. Chutih rual erawh chuan, kan hriat leh kan hmuh tawh thin angin kan Local Body hi a hun taka pawisa pek ngai thin te a ni a. Ka hriat sual loh chuan sawrkar hmasa khan AMC-ah te sum pek tlai avangin nuai 80 chuang a pung awma pek ngai te a ni thin a, khatiang ni lovin a hun taka pek ni sela tih te vawiinah hian ka rawt duhin ka sawilang duh a.

A paruknaah chuan, hetiang dinhmun harsa tak kara kan awm a, a neitupa a nihna State Pa ber a nihna rawn tarlanna economic measures-ah hian a ropui hlein ka hria a. Inrenchemna nasa taka hman a tul thute a rawn tarlang a ni a. Pu Deputy Speaker, helaia speech ngai ang hian ka rawn tarlang duh a i remtihhain, “State sorkarpuiin inrenchemna heng budget-a awmsa tihhnamte a tul viau a, a nih loh chuan post siam thar loh leh direct-a hna lak lohte, State sawrkar sum hmanga foreign zin, motor repair nan annual maintenance contract system leh thildang a kalpui mekte hi kan sum dinhmun a that leh hma chuan kalpui chhunzawm rih a ngai dawn a. Tin, tax leh non-tax atanga kan sum hmuh tihpun dan kawng zawn chu tih makmawh a ni tih thu a rawn tarlang te hian Pu Deputy Speaker, kan State Pa ber a nihzia a rawn tarlangin ka hria a. Tul lo leh pawimawh em em ni lo a sum leh pai kan hman nasat thin avanga kan State-in harsatna sorkar hmasa kal tawhte, kan tawh thin dan hre reng chung a puitling tak mai a mahni sawrkar hnuaiah pawh mahni inhrek ngam hruaitu thusawi lo lang hi ropui ka ti a.

A tawp berah chuan Pu Deputy Speaker, vawiinah kum 2021-2022 budget duh ang thala, beisei leh kan dream ang te ni chiah lo mahsela, vawiina renchem taka budget a rawn tarlan te hi kan hmang ang a, kan ram tana tih tak zeta enkawl thatna nei chung a kan ti a nih chuan kan ramin hma a sawn ngei ang tih hi ka beisei a. Chuvang chuan, vawiina he budget kan Finance Minister zahawm takin a rawn pharh hi i pass-pui ang u tiin ka rawn thlawp a ni e. Ka lawm e.

DEPUTY SPEAKER : Hun i hmang thiam hle mai. Tunge kan han sawm leh ang le? Pu Lalmuanpuia, Member zahawm tak i lo sawm ang.

PU C. LALMUANPUIA : Pu Deputy Speaker, ka lawm e. Kum 2021-2022 budget kan Chief Minister zahawm tak, kan Finance Minister-ina March Ni 1-a a rawn pharh tak hi a lawmawm hlein ka hria a. Ka lo ngaihtuah ka lo ngaihtuah thin a, nikum lam boruak

te kan hria a, khawvel kan buai a, Covid-19 pandemic hrileng avangin. Tin, India ram te, Mizoram te pawh kan buai dan a inang tlang vek mai a. Engtin nge kumin budget hi ni ang aw tih ngaihtuahna rilruah a lo lang thin a. Amaherawhchu, budget mumal tak pharh a ni te, tin huaisen taka a nihna lang tlang taka kan Finance Minister zahawm takina a rawn pharh ngam hi a hlu hlein ka hria a. Budget tha tak a ni dawn a ni tih hi Pu Deputy Speaker, ka sawi duh a ni. Kan hriat angin Covid-19 hrilengin min tibuai a kawng engkimah. Nikum kum kal ta kha ka sawi lo thei lo a, Covid-19 hri dona avangin dan leh inkhuahkhirhna te, inkharkhipna nasa tak avang khan kan economic activity pawh nasa takin a nghawng buai a. Sumdawnggho pawh an che thei lo a, bungraw lakluh leh hralh chungchangah pawh harsatna kan tawk nasa em em a. Tin, heng hrileng dona atan hian sum tam tak pawh sen a ngai hial a ni a. Chu mai a ni lo a, nunphung a ti khaihlak nasa em em a, kan sawrkar laipui ngeiah pawh kan chhiah tling khawm/lak khawm tur pawh duh angin a kal khawm tha thei lo a. Chumi a nih avang chuan sawrkar laipui central atanga State-tena kan chan ve tur pawh nasa taka a kiam a lo ngai ta a. Nichina member zahawm tak takte'n an sawi ang khan, nikum budget-a tarlan vek tawh, kan budget estimate-a lang vek tawh cheng vaibelchhe 1,185 lai mai kan han dawng kim lo te, 15th Finance Commission-in interim report-a special branch atana ruahmanna a siamsa tawh cheng vaibelchhe 546 zet mai kan han hmu theilo te kha a pawh hle a, a percent-a han lak phei chuan 29.86% lai a ni a, 30 a kai tep a ni. Chuti chung chungin nikum chhunga kan hun hman leh tun kum kal meka kan sorkar kal dan te hmuh hian Pu Deputy Speaker, kan Finance changtu, kan Chief Minister zahawm tak hian sum leh pai dinhmunte hre chiangin he sawrkar min kaihhruainaah hian a lawmawm ka ti a. Vawiiinah hetiang budget lang tlang leh a nihna ang tak maia ruahmanna a siam a rawn pharh ngam hi a lawmawm hlein ka hria a ni.

Tin, thil lawmawm tak tak mai a awm a, sawi tur a tam khawp mai. Finance Commission recommendation hi keini Mizoram, kan ram, State te ang chiah hi chuan a pawimawh em em mai a. Chumi zul zui chuan ruahmanna State pawhina budget a rawn siam, union budget pawh siam thin a ni a. Chutah chuan kum 2021-2026 report te pawh theh luha chumi denchhen chuan union budget-te pawh ruahman a ni a. Kan hman mek chhiah tling khawm atanga 41% chu State hrang hrang 28-tena kan han insem ve tur a ni a. Kan state-ina kan chan ve tur horizontal share chu 0.500 a ni a, 14th Finance Commission-in a recommend ai chuan a sang hret a ni. A chhan chu tam tak han tih theih a ni lo a, nichina kan sawi tawh ang khan hriin min tibuai em em a, heti chung chung a la sang hret theite pawh hi a mak ka ti zawk a. Hei hi inrenchem taka, thiam taka kan hman chuan kan State tan hian tangkai tak leh hmasawna te pawh awm thei turah kei chuan ka la ngai cheu a ni. Amaherawhchu, Pu Deputy Speaker, kan Finance Minister zahawm takin he budget a pharha a rawn sawi inrenchem a tulzia te kha a ropui hlein ka hria a, a phen a awm miah lo a, a lang tlangin he budget hi a rawn pharh a, chungte chu a ropui ka tihna a ni a.

Tin, mipui phurrit zawngin chhiah thar lakna tur engmah kan hmulo te hi a lawmawm ka ti a. “Revenue surplus cheng vaibelchhe 579.42 neih kan han tum dawn a” a tih te hi chona nasa tak niin ka hria a, a lawmawm khawp mai, Pu Deputy Speaker. State

Disaster Risk Management Fund (SDRMF) ah cheng vaibelchhe 47 zet mai kan la dah thei te hi a hlu hlein ka hria a. Mizoram kan dinhmun kan hria a, kan leilung a che nasa khawp mai a, Pu Deputy Speaker, hetah hian 20% chu a invenna lam mitigation lama dah tur a ni a, 80% chu chhiatrupna thlengte chhawmdawlina tur atana ruahman kha a ni a, a lawmawm hlein ka hria a. Ka bial chhungah Hunthar Vengte a lo lang thin a, heng han ngaihtuah hi chuan Pu Deputy Speaker, a lawmawm hlein ka hria a. Khu khu kan life line, kan ei leh bar lakluhna ber a ni a, hun rei tawh tak atangin khulai hmun khu kan buai thin a. In leh lo tam tak chan an awm a, mi tam takin an tahpui a ni. A chang pheii chuan kawngpuite pawh dan hial ngai khawpin a awm thin a. Kan Chief Minister zahawm tak kaihhrainain tunah hian hmalak mek a ni a, a lawmawm kan ti khawp mai a. Tunah hian eng emaw chen kal tawhin, zawh tep a ni a. Engpawhnise, a dam tak takna hi chu Pathian thu thu a ni a, Pu Zoramthanga kaihhruai, he sawrkar zahawm tak hian hma a la a ni khulaiah khuan tih hi mipui hriat a ni.

Tin, chu mai a ni lo a, ka bial chhung hi han luh chilh deuh ka duh a, Electric Veng mawngah khuan hetiang leimin hlauhawm tak mai hi a awm a, tunah hian hmlak mek a ni a. Disaster mitigation atangin bul tan a ni a, an dawm chho mek a. Tin, UD&PA atangin nuai 60-a belh a ni leh te hi Pu Deputy Speaker, a thlamuan thlak hlein ka hria a, khungte pawh khu kan sawrkar hian a ngaihsak a, chhiat rupna thleng tur hi a ngaihsak a ni tih hi vawiinah hian ka sawi duh a. Tin, Edenthah-ah hetiang bawh hi a awm a, Disaster atangin ruahmanna an siam a, tunah hian an thawk zo tawh a, chungte pawh chu a kal a, tunah hian a la kal mek turte pawh a awm a ni tih te pawh ka sawi duh a. Kan sawrkar hian Disaster lampang hi a ngaihtuah em em a, amaherawhchu, wawi leh khatah tih vek theih loh thil hma chhawp awm thei te a ni a, chung ang chi te pawh hmachhawp lian tak tak Mizoram chhungah hian a awm mek bawh a ni.

Tin, hei lawmawm deuh chu, heti khawpa harsatna kan tawh karah pawh kan GSDP 19.97% a la awm thei fan te hi han sang thur lo mahsela a lawmawm hlein ka hria. (DY. SPEAKER: Minute 1 i la nei e). Aw le, Pu Deputy Speaker ka zo tep e. Harsatna chi hrang hrang karah State Budget atangin SEDP Vaibelchhe 400 lai a rawn lang leh thei te hi a lawmawm ka ti khawp mai. Kawng hrang hrangin mi harsa zawkte chhanchhuahna tur te, lei rual rem an rah theihna tur atana sawrkar flagship pawimawh tak mai hlamchhiah miah lo a vaibelchhe 400 lai mai ruahmanna a awm te hi a thlamuan thlak khawp mai, Pu Deputy Speaker. Tin, MNF Returnee-te thum that nana vaibelchhe 5 lai dah a ni te hi a lawmawm khawp mai.

Pu Deputy Speaker, a tawp berah chuan kanti tawh mai ang e, kan budget Kum 2021-2022 hi he Ram he State hian tangkai taka a hmanna tur leh hlawhtling taka mipuite tana hlawk zawka hman theiha a awm zawk nan Member zahawm tak tak te he budget-hi thahnem ngai taka pass turin kan ngen a ni e. Ka lawm e.

DEPUTY SPEAKER : Pu Lalrindika Ralte, Member zahawm tak i lo sawm ang.

PU LALRINDIKA RALTE : Pu Deputy Speaker, ka lawm e. Kan budget han en hian, miin, “in khawsak tunlai eng nge in an” min ti ta se, “dam chuan a khawsak loh theih loh a, kan khawsa ve tawk tawk a ni” ti a chhan ang vel kha a niin ka hria a. Ni e, dam hi chuan a khawsak loh theih loh a, sawrkar pawh hi kan dam si hi chuan a kal lo thei lo a ni a. Tin, kan state dinhmun kan hria a, hre reng chung a thudik deuh lo han sawi chiam emaw han innawr chiam emaw lam kha ka rilruah a awm lova, kan state harsat dan tur hi chu hmu vein ka inhria a, chuti chung erawh chuan kan hotute hian mut mawh hnar mawhah an nei lo deuh em aw tih te thahnem ngaih thilah ka rilruah a lo awm ve thin a. A chhan chu kan hria a, kan state hi thawhchhuah kan nei lem lo, GSDP kan sawi kan chhuan thin pawh hi sawrkar hnathawkte avang a ni tih kan sawi thin a, agriculture sector lam chu an dinhmun a ngai reng a ni tih kan sawi thin a ni. Chuvang chuan kan ngaihtuah chian deuh hi chu a thain ka hria a. Hei, state kan nihna atang pawhin kum 35 dawn a lo ni ve ta a, kan dinhmun chu tuna kan dinhmun a hi a ni a, mahniah pawh intekkhin ila, kum 35 mi niin he sawrkar dinhmun ang hi ni ta la i lung a awi a ngem? Chuvang chuan, Kum 35 kan nih tawh chuan mihring puitling chhungkaw tan pawh a chhen fakawm chhungkua pawh din chhuah pui thei tawh tur niah ka inngai a. Chuvang chuan, wawinah hian state kan nihna atang pawhin kum 35 vel dawn a ni tawh a, kan dinhmun hi kan bih chian te pawh thain ka hria a, thahnem te pawh kan ngaih thar a thain ka hria a ni.

Duhthu sam chuan kan phak tawk leh kan tlin tawk a awm ve a, chu chu mipui chuan kan hriat tlan pawh ka ring a. Kan State pachhiat zia kan hria a, a pachhiat zia kan hria ti ngawt lo hian eng tin nge kan dinhmun hi kan siam that ang tih hi kan ngaih pawimawh a thain ka hria, budget chhung zuk sawi lam ai mahin. Chu chuan ka rilru a luah deuh a, chuti zawng chu ka sawi tum dan pawh a ni zawk a ni.

Sum a tam hi a tha a, amaherawchu a management hi a pawimawhin ka hria a, chhungkua pawh en ila sum ngah ngah hi an dingchhuak bik lo khawp mai tih a Chiang a. Chuvang chuan, sum hi a tam kan duh rualin ruahmanna fel leh tha a awmluh chuan a tam pawh hi kan ramin a thatpui chuang lo thei a ni. Tin, ka rilru a awm leh chu, sawrkar sum kan tih hi mimal ten din chhuah nan an hmang a, company ten emaw, mimal ten emaw din chhuah nan an hmang thin a, kan hmu a. Chuti chung chuan sawrkar ber a pachhe reng a nih chuan kan inennawn pawh a ngaiin ka hria a ni. Leiba kan ti a kan ngah em em reng a, hetia kan kal reng chung hian tute emaw chuan an rut awk awk a ni tih kan hria a, chuvang chuan hetiang thil hi kan insum deuh a thain kan hria a. Sum hi a nihna tur ang tak a hman chuan cheng nuai khat hian thil hi a ti thei khawp mai.

MLA fund te pawh kan han hmang ve a, thil kan ti ve thei khawpin ka hria a, MLA fund pawh hi tangkai takin kan hmang a, tunah khan 15% nge 15 lakhs cut kha an rawn sawi a, khangte kha ka ui khawp mai a, kan bial mipuite ka ui pui khawp mai a. Eng pawh ni se kan ram leh hnam tana inpe kan ni a, ram leh hnam sawrkar a harsat chuan a puitu tur leh a thawktu tur kan ni a, chutiangah chuan rinawm taka kan ram leh hnam tan pawha kan thawh a thain ka hria a ni.

Tin, sum ren chem chungchang hi kan sawi thin a, ka rilrua ka vei em em kan hotute pawhin lo ngai pawimawh ve se ka tih a chu, kan bufai lei leh a chheh vela hi ngun deuh hleka zir chian hi a tha em aw tih ngaihtuahna ka nei a. Buhfai chu a tel lova kan awm theihloh a ni a, kan lei reng tur pawh a ni, amaherawhchu, a chheh vel hi zir chian deuh, en chian deuh a thain ka hria a. Tin, a buhfai leina piah lamah a phurh kualna hi a to uchuak em em deuh hian ka hria a. Zuangtui - Lawngtlai hi 249 km a ni a, a phurh man hi ₹390/- a ni. Tin, Zuangtui - Saiha hi 324 km a ni a, a phurh man ₹516/- a ni a, Sangau - Lungtlan hi 40 km a ni a, qtl 1 phurh man hi ₹330/- a ni. Tin, Thenzawl - Chhipphir hi 32 km a ni a, ₹200/- a phurh man a ni. Kawlchaw - Lungpuk hi 83 km a ni a, a phurh man hi ₹530/- a ni. Guwahati hi 500 km chuang a ni a, thil phurh man hi tunah hian a to ber lai a ni a, quintal ah ₹300/- in phurh a ni a, ₹255, 265 te chutiang bawr vel chu a ni reng thin a ni, Guwahati leh Aizawl inkar hi. Chuvang chuan hengte hi sum renchem kan sawi a nih chuan kan buhfai phurh kual vel nana sawrkar sum hman hi enchian deuh te a tha lawm ni tih te rawtna ang deuhin kan thlen duh a.

Tin, rilrua awm ve thin chu thahnem ngaih thilah ngaihpawimawh zawng te kan han sawi ve thin a, amaherawhchu a sawrkar berin leh a changtu Minister ten emaw ngai pawimawh lem chuang loa mamuli taka inchhan ang chi leh haw vak lo anga kan nem liam mai mai thin hi chu kei chuan dik hian ka hre lo a. Ram leh hnam tan kan inpe a kan thawk tlang a, a diklo te pawh kan zawng kual a, a tha te pawh kan hria a kan infak a, a diklo te pawh kan hria a kan zawng kual a. Chung angah chuan thahnem ngaih thila eng emaw rawtna ka han neih ve te pawh ngaipawimawh mang loa inchhan thin hi a pawi ka ti a, chu chuan thahnem ngaihna pawh hi ram leh hnam tan mi a ti hnual ve thei a ni tih te pawh kan hriat a thain ka hria a. Kan member ten thil tha tawk lo leh kan ram leh hnam tana pawi thei thil an hria anih chuan action te pawh kan la dawn lawm ni, tih te ka rilruah a awm a, chungte chu kan sawi tel duh a.

Pu Dy. Speaker, ka ngaih pawimawh ber, a tawpa ka rawn sawi duh chu sawrkar kan siam thin a, party kaltlangin sawrkar a lo ding thin a, sum hi mipui sum a ni tih hi hriat nawn a thain ka hria a. Kan party dinhmun sawh ngheh nan te emaw, sawrkar leh kan duh vang hrim hrima mipui sum hi kan hmang thin anih chuan chu chu a fair lo hleah ka ngai a. Mimal dinhmun siam tumna te hi a hnawkin ka hria a, chutiang angah chuan insum pawh a thain ka hria a, chutiang tur chuan infuih thar ang u tih kha ka rawn sawi ve duh a ni. Ka lawm e.

DEPUTY SPEAKER : A lawmawm e. Kan Minister zahawm tak Pu Robert Romawia Royte i lo sawm ang.

PU ROBERT ROMAWIA ROYTE, MINISTER: Pu Dy. Speaker, ka lawm e. Thu tam tak sawia hun hman pelh ka tum lo a, thu tawite sawi ve chak ka nei a.

Pakhatnaa ka sawi duh chu kumina kan budget CM zahawm tak Finance Minister-in a rawn pharh laia kan ramin a harsatna a tawh dan leh a rawn pharh hma kum 2020-2021

chhunga engmah economic activities pawh awm thei lo va kan inkhuah khirha, kan inkhapa, bungrawrawn lutte mi state dang zawng zawng aiin kan inkhap rei a, economic activities han chet velna tur pawh health sector lama dam khawchhuahna kan priority anih avangin State dang zawng zawng aiin kan inkhuahkhirh rei bik em aw tih turin kan fimkhur rei a a lawmawm a, chu chuan rah tha pawh a chhuah a. Mipui zawng zawngte pawh kan tangrual a, kohhran leh NGO lam te pawhin theihtawp an chhuah a, Sawrkar pawhin theihtawp kan chhuah vek a, a lawmawm a. Mahse he hripui leh a related problems kan ti dawn em ni ang, harsatna sawrkar kalphungah leh kan sum leh pai dinhmunah a tawrh nasat zia hi kan lo chhuta kan lo ngaihtuah ai hian a lo nasa a ni tih tun kumthar tur atana kan CM-in a kan sum ruahmanna a rawn pharhna a statement-ah te khan a lo lang ta a. Mipuiin hei hi kan chhinchhiah reng pawh a tulin ka hria a, kan sum hmuhna tur atana he House ngeiin, central sawrkar pawhin kan tihdan phung pangaiia ‘heti zat hi chu chu mi head atang chuan kan rawn pe che u a ng a, hemi zat hi chu hemi head atang chuan in budget ah lo dah ve ula’ tia instruction fel tak ziaka rawn ti milin, kum kalta budget he House zahawm taka kan pharh leh kan pass pawh nichina Member zahawm tak Pu C. Lalmuanpuia sawi ang khan, 29% laia kan hmu kim lo chung leh chung budget chhung mai ni lo budget pawn lamah pawh harsatna tam tak kan tawrh laia, he budget kan sawiho hi rawn duan chhuah a ni a. Chutiang situation, chutiang context-a budget duan chhuahah chuan ka en ka en ve a, a ropui mang e ka ti a. A situation en chuan he budget Finance Minister leh a thawhpui ten an rawn buatsaih lai a kan ram dinhmun economy en chuan hetiang budget hei aia tam tumahin an siam chhuak thei lovang tih hi kan chiang vekin ka ring a. Chuvang chuan kan, CM zahawm tak kan Finance Minister ni bawh chungah pawh lawmthu sawi ve hrim hrim ka duh a. Budget siam hun lai hun khirh zia hre chung mipuite harsatna siam belh lo zawnga sum harsatna chitin reng kara tax te lak belh lo a, budget tlahniam chuang siloa a rawn duang chhuak hi a lawmawm tak zetin ka hria a, a point khatnaah chuan chu chu ka rawn sawi duh a ni.

Point hnihnaah chuan, he budget hi han thlek han thlek ila, department dang danga sum ruahmanna han dah danah hian kan Finance Minister zahawm tak hian kan ram dinhmun thlirin ruahmanna a siam thiam hlein ka hria a. He budget hi sap tawngin han sawi ila, a ‘flexible’ a, he budget hian mobility fel tak a nei a ni tih a chiang khawp mai a. Department mal mala sum dah piah lamah Finance department-a hmasawna sum capital head hnuaiia sum tam tak dah a ni te hian he budget hian ram mamawh mila, a tul ang zela siksawia siamrem a, kan mamawh mila chet lak rem zawnga siam a ni tih a chiang a ni.

Ka ngaihpaui mawh em em he budget-in a rawn tin zawn chu, Union Budget a ni a, a lawmawm em em a ni. Sawrkar hmasa lam sawiselna pawh nilovin NLUP kum 10 bawr vel implement-na budget-ah pawh sum tam tak kan dah a. Khati khawpa kawngpui a chhiat laiin kawngpui inchi khat pawh NLUP atangin siam a ni lova. Tun kan budget tharah chuan a tul chuan state share-ah te pawh ACDP a ni emaw Finance Department-a kan sum dahkhawm te kan hmang ang a, a tul dan ang zelin works department pawh ni chiah lo Finance Department-ah sum tam tak capital head hnuaiia han dah te hian tin zawn a nei a,

chan a nei a, a chang fuh ngei ang tih pawh ka ring a, tin zawn nei budget a ni tih ka sawi duh a ni.

Hun hmasa lam General Discussion-ah hian member tam takin kan sawi tawh a, thusawitu hrang hrang thusawi te ka lo chhinchhiah ve zel a. Hmasawna tura sum ruahman chu chu mi lek chu a ni han tih ngawt te hi, mipuite kan hruai sual palh ang tih te pawh a hlauhawm em em a ni. Revenue expenditure khan hmasawna lam hawi miah lo anga han chhuah te pawh hi a dik chiah lova. A nihna takah chuan Mizoram te ang frusture lian nei ve lem lo manufacturing-ah emaw industry-a income sang tak nei lo chuan revenue hi kan inngahna a ni. Salary economy angah hian kan awm avangin, hetianga sum hman ral vek chu a diklo tih chu kan hre vek mai a, mahse engmah lo ang deuh thoa he House ngeiah pawh sawi a awm thin hi dik lovin ka hria a ni. Revenue expenditure pawh hi kan ram hmasawna nana chhungkaw tam tak siam liantu leh dinhmun thaa siam tu a ni ve tho a ni tih kha ka sawi duh a ni.

Tin, Capital expenditure lam ang chi infrastructure development lama sum hman theih te chu kan chak vek mai a, mahse Mizoram chang a ni lo, state hrang hrang budget te pawh hi han en ula, keini aia an kan bikna a awm lo a ni. Chuvang chuan kan hotute'n ngun takin an ngaihtuah zel ang a, beidawng zawngin he budget hi thlir lo ila a thain ka hria a. Development hna pawh hi a kal zel ang tih ka ring a, a tak takah chuan hriin min nuai chung pawha kan Chief Minister leh Finance Minister te ruahmanaa Mizoram hmun hrang hranga infrastructure development kal tur leh kal mek hi a theu neu lo viau a ni. Chu chuan kan Chief Minister fiscal management a thiam zia a tilang a ni. Covid hri len hma kum 10 leh hri a len kum chhunga in duh ber kum kha rawn thlang chhuak ula, hripui len kum leh harsatna MNF sawrkarin a tawha hmasawna hi i buk teh ang tih pawh hian, Pu Deputy Speaker, i dinglama mite hi chuan kan ngam khawp mai. Pathian zarah hri te pawh a reh chho ang a, hmasawna hi a lang ang tih ka ring tlat a ni.

Tin, supplementary Demand chungchang ah hian, social media lamah sum indaih loh dil belh tih chungchang lo langa hi a dikloin ka hria a. Sum hmuh belh-te regularized-na tih hian a dik zawk mah mah a. Supplementary Demand-a khawi department-in emaw sum an han neih belh te pawh department dang atanga lo lut te pawh a ni a kan hre vek mai a.

A pahnihna-ah chuan kan Pu ruahmanaa *main* zawk chu Mizoram chhunga budget kan pass ni lo, budget kan passed tawh hnu si a development sum lo luh belh zawk supplementary demand kha House-ah pharh ve a ngai a, chu chu a ni a. Kan han sawisel chiam thin a hi thil diklo tak a ni tih kha wawinah hian ka sawifiah duh a. Department hrang hrangte pawh kha han en ila, entirnan kan budget system-ah budget flexible a ngaih avang leh kan duh avangin Finance Department-ah te sum kan lo dah khawm a, tihdan phung te pawh a ni a, sawrkar hmasa lam pawhin an tih dan a ni tho a. Finance Department atang sum khawiah emaw a kalna tur ruahmanaa a chhuah khan, department a cross avang khan

supplementary demand-a alo luh ve a ngai a. Khami avang khan, tute emaw sum pawt tura ngaia media-ah te sawi a awm thin hi a dik lo a. Supplementary Demand avang khan khawi department mah kha an hek chuang lova, mahse kan sum awm sa a tul dan anga siam rem kha a ni mai a, siam remna kha House-ah lay a ngaih avangin supplementary demand angin a lo lut a ni. Tin, a *main* ber a thatna em em zawk a chu, he House a kan passed ni lo, central sawrkar atangin emaw agencies atangin emaw kan budget pawn lam atanga hmasawna tur sum State Govt-in kan hmuha kha, Supplementary Demand anga House-a dah lan ve a ngai a, chu chu a ni mai a ni. Sport Department-ah pawh hian state budget-a kan budget let tam tak supplementary demand-ah kan han lay thei te hi, kan officers te pawhin min lawmpui vea, inlawmpui chi zawk hi kan sawi bawrh bang lek lek emaw ni tih kha ka sawi duh a ni e. Ka lawm e.

DEPUTY SPEAKER : Kan hun a tawp a, kan chawl ang a, dar 2:00 PM-ah kan lut leh dawn nia.

2:00 P.M.

DEPUTY SPEAKER : Kan rorel kan tan leh ang a. Tunge kan sawm leh ang, sawi tur kan awm tawh lo nge? Pu Lalchhuanthanga, Member zahawm tak i lo sawm ang.

PU LALCHHUANTHANGA: Pu Dy Speaker, ka lawm e. Budget-a luh hmian nizan Doordarshan Chanchinthar-ah khan Inrinni zana LPS Fight Night-a Feather Weight Title Fight-a chak te an awmna bial MLA ten ₹1,00,000 an pek tur thu kha kan Sports Minister zahawm tak khan a sawi a. Hei hi kan Finance Minister zahawm tak hian a hriatpui em aw? Lo ni ta se, khawi atanga pek tur nge tih kha a hmasain zawhna ka siam a ni.

Budget-ah lut ta i la. Kan budget chu nikum aiin tlem chuan a size a lian deuh a, a hmanna tur hi a pawimawh lai tak chu a ni ta a. Kan budget mipui sum te hi anihna dik taka hman ni thei se, lang tlang taka mipui ten kan hriat hi a paiwimawh a. Supplementary Demand-ah khan nuai 3,058 kan pharh belh a, khang kan pharh belhah khan kan demand tamtak lang lo kha an awl ta a ni. Entirnan, SEDP board management atan vaibelchhe 3 aia tam dil belh/hman belh te a lo ni a. Kan budget hi a tam emaw a tlem emaw a hmanna tur dik taka mipuite sum anihna anga a hman dan tur hi kan chhep fel a tul hlein ka hria a. Kan budget-a a lan danah chuan, revenue expenditure-ah pawh cheng vaibelchhe tam tak kan hmang a, kan budget atanga 82% vel a ni a, nikum aiin tlem a tlahniam deuh a mahse hetah pawh hian sawi tur tam tak a awmin ka hria a. Heng ah hian vaibelchhe 82 aia tam kan hman hmel tlat mai a, a chhan chu pension hlawh a kal tur pawh 2019-2020 a cheng vaibelchhe 130 chuang a nih laia tunah cheng vaibelchhe 112 a ni a. Tam tak an pension belh tawh a, chu lai kara pension atana kan hman tur pawisa lo awm tlem ta hi kei ka hrethiam lo a. Chutiang bawk chuan salary te pawh a ni a, khangah khan kan fund kan tite ta ringawt a, amah erawh chu hmanna tur a tam dawn tih a chiang reng a. Tunah mi tam tak

pension hlawh pek theihloh a nih laiin leh tam tak an pension belh laia pension atana kan pawisa dah lo tlem ta hi hriatthiam harsa ka ti khawp mai.

Kan Capital Expenditure lam te pawh hi sawi ta ila. Capital expenditure hi tlem chuan kan han ti tam ve deuh a, 15-17%-in kan han ti pung ve a, amaherawh chu kan hmanna turah khan kan leiba vaibelchhe 514 kha kan han paih leh chuan kan capital expenditure kha 12%-in a tla leh nghal ta ringawt a. Khang kha a nihna tur ang tak kha tarlan nghal ni thei se chuan a tha viauin ka hria a. Tin, capital expenditure-ah hian kan hmanna tur hrang hrangte kan han enchian hian kut hnathawktu/loneitu te Mizoram mipui 60% chuangte tana hamthatna tur ang chi hi a lang miah lo a, pawu ka ti khawp mai a.

Tin, thalai te tan a eizawna bul fuk, eizawna ngialnghet han siamna tur ang chi hi a lang lo reng reng a ni. Tun hmam lehkhathiamte an lo chhuak a sawrkarah hna a hmuh theih mai a, amaherawh chu khatiang chance kha a awm tawh si lo a. Tunah hian kan thalaite hi an awm mai mai a, an hnathawh tur awm ang chi hi kan ngaihtuah chhuak thiamlo nge nia kan ngaihak lo hrim hrim tih hi kan ngaihtuah chian tulin ka hria. Entirnan, mautuai te kan ngah em em mai a, kan mautuai te hi Mizo-in kan chawhmeh mal neihah chuan a aia kan ei tam hi a awmin ka hre lo a. Chutih rual chuan kan mautuai ei hi chu tlem te a ni, kan rama mautuai tam dan ngaihtuah chuan. Hengte hi a process dan kan sawrkar hian ngaihtuah se kan economy dinhmun nasa taka tihkan theih anih bakah kan thalaite tan hnathawh tur tam tak min siamsak thei dawn a. Heng lam te pawh hi kan sawrkar, kan budget buatsaitute hian min hriatpui ve ta se a pawimawh khawpin ka hria. Kan thalaite hnathawh tur hre lovin an awm a, chu lai karah chuan sports kan buaipui a, asset tha tak takte pawh kan siam a ni. Amaherawhchu hengte pawh hi nakin lawkah chuan kan revenue expenditure ti sang thei tu turte an ni a, economy lama generate lo tur ang chi te kha an ni. A tha lo chu kan ti lova, a tha lutuk a, mahse veng tinah thalai sawma pakhat pawh hi sports lama tui an ni lem lo, hmeichhia phei chu tlem te an ni. (DEPUTY SPEAKER : Minute khat kan la nei e) Chuvang chuan kan budget hi hetiang lam hawi zawng te hian siam ve ta sela tih kha ka han sawi duh a ni.

Pu Deputy Speaker, SEDP bawh hi ka han sawi leh ang a. Vawithum budget kan pharh tawhah SEDP hi a tlahniam tawlh tawlh mai a, budget vawihnih kan pharh leh turah te hi chuan a zuih ral tawh mai awm mang e ka ti deuh a. Ka bialah pawh hian SEDP nuai 3 beisei hi an la tam khawp mai a, hengho thawi dam dan turte hi kan hotute hian inhriat loh phei chuan an beidawng lutuk dawn. Chuvang chuan SEDP-a kan pawisa dah hi a zuih ral hma hian a theih ang ang sem theih a ni lo maw tih ka sawi a ni e. Pu Deputy Speaker, ka lawm e.

DEPUTY SPEAKER : Hun i hmang tawh thiam hle mai. Member zahawm tak Dr. K. Pachhunga ilo sawm.

DR. K. PACHHUNGA : Pu Deputy Speaker, ka lawm e. Kan budget, kan Finance Minister zahawm takin a pharh tak pheh hmasa bera pathumnaah khan chiang takin, *challenging* takin a rawn sawi a. Hun harsa tak kan hmachhawn a, hma lam hun thlir thiam pawh a harsa hle a. Mamawh tul zual dah thiam a, chumi phuhruk theih ngawt pawh chu chona lian tham tak a tling a ni tih khan thil thui tak a a sawiin ka hria a. Mi pangngai chuan kan hre theuh a, Mizoram chauh nilo khawvel pumin hun khirh leh hun thim kan tawk a. Nikumah Budget Session-ah kan sawi a, kan sum ruahman te, kan beisei te kan sawi a. Hei a kal mek zel a, Union Finance atanga kan sum hmuh tur ang chi, Indian Government atanga kan hmuh tur ang te kan hmuh kim loh zia kan hria a. Vaibelchhia hlir 1,500 chuang a ni a. Khang kha hmuin SEDP-ah han sem tai la, chhungkaw 60,000 deuh thaw a daih dawn a ni tih kha mipui pawhin kan hriat ve angai a. Chutih lai chuan lockdown te leh Covid avangin miin hna kan thawk tha thei lo a, sumdawna, business activities kan tih ang chi te a kal hleithei lo a. Chhiah kan lak tur, mipuiin kan thawhchhuah tur pawh 20% dawn lain kan phalo a. Kan hmuh tur leh kan laklul tur khati khawpa kan tlakchhiat avang khan engtin nge sawrkar hi a kal theih zawk a, engtin nge sawrkar hnathawk hlawhte hi kan la pek theih zawk le, tih hi mi pangngai chuan an ngaihtuah zawk thin a. Kan sawrkar hotute, kan Finance Minister te leh department hrang hranga kan Minister-te theihtawp an chhuah a, tihtakzeta he ram hi an enkawl avang zawkin tun dinhmun hi kan thleng thei zawk a ni.

Mipuie kan intodelh tawh lo va. Han inpuh em em tur pawh kan awm bik lo. Kan sawrkar kal tawh te leh UT atangin tute nge sawrkar tawh thin kan hria a, wawiina kan intodelh loh chhan hi wawiina sawrkar te an ni ngawt bik lo va, hman atanga lo awm chho a ni tih pawh kan hria a. Chung karah chuan kan ei leh bar, buhfai te pawh a thlawn leh man tlawm zawka sem a ni a, kan harsa lo a, mipui thla a muang a, gas supply-ah te pawh nasa takin hma kan sawn a, kan buai lo bawk a, POL-ah kan buai lo bawk a, essential commodities services-ah kan sawrkar hotute hi an fakawm hle in ka hria a, kan thiante leh mi pangngai inti chinte pawhin tha an ti a ni. Kan hriat angin healthcare scheme-ah pawh nuai 2 a takin an dawng zel a, a hlu tak zet a ni. Hmanniah ka biala mi cancer-in damdawi inah rei tak a awm a, a thi a. An chawi zat turte ka ngaihtuahin ka lo huphurhpui em em a. Mahse healthcare an lo ti hlah mai a, kha khan nasa takin a pui a. Mi harsa leh mi retheite tan a tha takzet a ni tih kha ka han sawi duh a.

Kan hriat angin harsatna kan tawh laiin kan kawngpuite an dang a, kan boundary-ah Assam nen buaina nasa tak a awm a, kan sawrkar, a bikin Home Department-a kan sipaite leh a chheh vel ramria kan Mizo khuate an fakawm takzet a. Uar deuh a sawi duh tan phei chuan Assam-in kan ram min chhuh, min awp behsak tawh km engemawzat hi Zophai-ah te, Vairengte via Silchar Dholai kan tihah te ram kan la let a, hmanniah pawh a hmunah politician engemawzatin kan tlawh a. Kan inhniat thin tak nain, a tak takah chuan tun sawrkarah hian ramri lamah pawh kan ram kan chhuh let nasa a, Home Department leh mipuie an fakzawm takzet a.

Mipui mamawh power supply pawh Pathian zarah kan nei tha a ni. Heng hun harsa karah hian kan ram hruaitute, kan department hrang hrangte pawhin theihtawp an chhuah a, kan thalaite khawvel eng hmu turin he hripui donaah hian rilru leh thinlung te pawh a bawh bet zo a. Chumi kaiharh turin Sports-ah te pawh infrastructure development atan budget pawn lamah nuai sing engemaw zat hailuh a ni te hi mi pangngai chuan tha an ti a. Chutih lai chuan a sawiseltute'n sport hliir mai, ei leh bar pawh kan intodelh lo an ti a. Mahse kan budget pawn ami a ni a. Sport infrastructure kan lakluh hian Mizoram-ah hnathawh tur kan pe a, chhiah engemaw zat kan chhung bawh a, ram tan a hlu takzet a. Kan han sawi lai te khan a duhlo bialte an awm deuh niin a lang a, kan bial chuan kan duh khawp mai a ni tih kha ka sawi tel duh bawh a. He harsatna hian kan ram leh hnam a bawhbeh mai sawrkarin a phal lo a, zirna lamah pawh ram siamtha turin sikul engemawzat kan repair tawh a, ka bialah ngei pawh a takin kan hmu a. Kan hriat angin zirtirtu indaihlohna a nasa a, a sang tel kan hotute'n MR teacher lain Hindi Teacher kuang nena kawng zawh te, a chhanna chu vawiinah Hindi Teacher te kan la a, a ropui takzet a ni. Chutiengin higher studies kan tih, UGC-in a tum 'academic excellence' kan tih te pawh RUSA sumin Professor leh Asst. Professor engemaw zat lak an ni a. Mi pangai chin chuan he sawrkar hmalakna hi tha an ti a, harsatna karah pawh a neitu, a ram neitu a phurin an phur a, thlantui farin hna an thawk a ni tih hi mi pangaita sawi dan a ni a. Tin, zu avangin kan thih hnem zia te pawh kan hria a, kan khawlai a ralti a, harsatna chitin reng kan hmu a. Vawiinah chuan zu kan khap avangin chhiah tamtak chu chan mah ila he ram hian a takin a hlawkna kan hmu a ni tih te pawh kha mi pangai chin chuan tha an ti a ni.

Pu Deputy Speaker, sawi tur tam tak a awm, chutiang chuan mi tam takin mipuite ngaihtuahna hruaikawi zawngin leiba te pawh an sawi uar thin a. Ni e, he leiba hi tun sawrkar bat pawh a ni bik lo a, sawrkar kal tawh atanga inchhek khawl a ni a. A hahdam zawngin sawi ta ila, sawrkar kumsang tel awm turah ngai ta ila, tuna kan leiba hi chu kan kumkhat budget ang deuh chauh a ni. Crore sing tel a ni a, a hahdam zawngin, 'a tam lo e' te pawh a tih theih a. Chutih lai chuan kan sawrkar hotute'n inrenchem takin kan leiba tihzia nan theihtawp an chhuah a, tun financial year tawpah phei chuan 90% deuhthawin a tlahniam dawn tih te pawh kan hmu a, a lawmawm takzet a ni. Mitam takin a bawplawkah lain revenue expenditure... (*Dy. SPEAKER: Minute khat i la nei e.*) ... sawrkar inrelbawlina a tam lutuk, 82% an ti a, sawrkar lai sawichhiat nan a rem ve a. Mahse revenue expenditure kha kan en zel chuan sawrkar hnathawk leh pension atan te, sport infrastructure leh education te leh chutiang chuan department hrang hrangin kan hmang tlang a. Sawrkar hnathawkte pawh mipui an ni ve tho a, mipui development a ni. Sawrkar hnathawkin chhungkua engzat nge a chawma, chawhmeh engzat nge a lei, chutiengin taxi driver-ah te kan in eitawn vek a. Sawrkar hnathawk leh sawrkar expenditure hi mipui expenditure a ni ve tho a, mipui budget a ni ve tho a ni tih kha kan sawi leh duh a.

Tin, Pu Deputy Speaker, kan sawrkarin harsatna karah kuthnathawktu tan engmah a dah na nge tih te kha, an enchiang lo emaw ni chu aw ka ti a. SEDP hi intodelhna, kuthnathawkte tana hamthatna a ni a, Agriculture leh Horticulture Department-te a awm

baw k a. Dik taka sawi chuan tun kum hnih thum lekah hian agriculture ... (*Dy. SPEAKER: I hun a tawp e.*) ... product te hi a sang chho a, tomato pawh Mizo thar kan ngah ve ta a, dragon fruit te. Nasa takin kuthnathawktute pawh hi kan thang a ni tih hi he House pawh hian kan hriat ve a ngaiin ka hria a. Khatiang khan sawi tur tam tak a awm a. Tin, Priority Sector-ah khan SEDP mipuite intodelhna, kuthnathawktute hamthatna a awm a, chutianging politics khelh nan returnee-te kan inhmangaih siak a. Mahse a hmangaih bertu chuan an chanpual he budget-ah a dah hi a ropui ka ti a, a lawmawm ka ti takzet a ni. Pu Deputy Speaker, ka lawm e.

DEPUTY SPEAKER : Tu nge sawi leh ang? Awle, Member zahawm tak Dr. Vanlalhlana i lo sawm ang.

DR. VANLALTHLANA : Pu Deputy Speaker, ka lawm e. Ka thusawiah hian number a tam thin lutuk an ti a, i dinglama mite hian. Number lo deuh te sawi kan tum ang a, number a lo tel anih pawhin pawilo turah ngai ta ila.

A hmasa berah chuan Covid-19 hripuiin harsatna namenlo a rawn thlen a, chuvang chuan pawisa pawh kan harsa a, kan hmang der der a ni tih kha kan hriat tam a ni a. Ka bial chhung Aizawl North-II ah sawn, Ramhlun North Community Hall saw 2019-ah cheng nuai 20-a siamthat a ni a. 2019-20-ah khan UD&PA hnuaiah tho a sak thatna tur nuai 200 an sanction leh a, kha kha kan la hmang chiah lo nge ni sawrkar hian, sum hi a ngaihtuah lo deuh nge ni chu aw, hetiang te chu a tih kha rilruah a awm a, nuai 200 pekbelh leh tur ang te khan tih a lo ni a. Tunah sawn in pakhat zawnah footpath siam a ni a, an siam zo tawhin ka hria a. In pakhat zawna footpath siam man kha nuai 6 te a lo ni a, kan hmang der der lo nge ni aw tih te kha rilruah a lo awm a. Tin, kan venga kawng pakhat saw nikum December-ah khan PWD-in kawng tha deuh maiin an rawn siam a, a lawmawm khawp mai a. Amaherawhchu tun February-ah khan UD&PA lam, SIPMIU atang khan an rawn lai chhe leh a, tunah sawn siam lohin ala awm a, a then lai chu. A kawng chhuk laiah te chuan two-wheeler an tlu an tlu a ni. Pawisa hi a uihawm thin mang e aw, kan hmang der der lo nge, a minister-te an lo inbe tha lo deuh nge ni tih te rilruah a awm a. Pakhat zawk te kha han hmasa ta se, kawng te kha siam ngai lo se tih te, a hmutu tur chiang saa tender koh te hi sum kan hmang der der lo deuh nge ni tih te rilruah a lo awm a. Thil tam tak sawi tur a awm a, ka kalsan tawh mai ang a.

Hei, sum hmuhchhuah lampangah hian tan lak a ngai khawp mai a. Tax Revenue-a kan state-in kan hmuhchhuah ve atan cheng vaibelchhe 790.05 dah a ni a, Non-tax Revenue-ah hian vaibelchhe 52 kha hmuh tura tih a ni baw k a. Power lampang a kan hmuh tur kha a kang ve leh awk a, thla thar vel atang chuan, nge ka hre lo a, kan power bill hi 70% chuang velin a rawn to chho dawn a, kan GSDP pawh a ti kang awk ang a. Pu Dy. Speaker, i dinglama mite pawhin GSDP a thang e an ti a, an lawm em emna chhan kha kuthnathawktute thawhchhuah a pun vang nilovin sawrkar hnathawk hlawhte pawh a ni ang, service sector lama thil a pun awk awk thin vang a ni tih kha lo hria se ka duh khawp a ni.

Tin, Wood based Industry din phal a ni tawh a, chumiin a ken tel teak te pawh a ni ang chu, a thing bung (round log) an tih ang hian phal tawh loh tura tih a ni. PCCF-in 'tih tawp ni rawh se' a ti a, pawl ka tih em em chu, kan Chief Minister zahawm takin 'lo hralh tir leh phawt mai teh u' tiin a lo sawipui a. Rail wagon khatah hian cubic metre 2,000 chuang dah theih a ni a, wagon khatah hian state hian ₹2,00,000/- vel dawn GST-ah kan hmu thei dawn a, chu chu zai tawh hnuah a ni. Tunah hian Mizorama kan industry ten an zai thei tawh a, zai tir ila chu GST-ah kan hmu teuh ang. Tunah chuan vai hovin tlawm te tein an rawn lei a, wagon tam tak daih tur tunah hian a inchhek khawl a ni. Helamah hian tan kan lak ava ngai em. Income generation-ah tan kan la dawn anih chuan Mizoram chhunga a hlutna kan siam belh theihah hian tan kan lak a ngai a ni. Kan thil neih a hauvin kan hralh a, vai hovin a tlawm thei ang berin an rawn la a, chu chu tihtawp tumin kan bei tur a ni a, chutiang ni lova hriatthiamna nena kan lo ti kha a pawl ka ti khawp mai.

Tin, budget estimate-ah thil lawmawm deuh chu MLA fund vaibelchhe 60 kha a rawn lang leh a. MLA fund kan nei leh ngei dawn a, a lawmawm ka ti em em a ni. Revised Estimate ah khan vaibelchhe 60 tho kha a rawn lang a, 10% min cut sak avangin vaibelchhe 54 tura ka ngaih laiin vaibelchhe 60 tho kha a rawn lang a, 10% kha nuai 15 a ni a, a rawn lan leh si avangin hei pawh hi kan la dawng leh thei dawn anih hi ka ti rilru a, revised estimate-ah pawh a ngai chiahin dah alo la ni hi a lawmawm ka ti hle a ni.

15th Finance Commission-ah khan 'State's specific needs' chungchang kha sawi leh ka duh a. Kan mamawh zual te 15th Finance Commission-ah dil a ni thin a. Tum 3 lai kan dil a, Congress hun laiin dil a ni a, tun sawrkarah vawi 2 dil a ni a. Vaibelchhe 700 min rawn pe a, chu chu Horticulture leh Tourism Department-ah 75% a kal vek mai kha chu ka lo ui khawp mai a. Thildangah kan mamawh tehlu nen aw, Tourism pawh hian dilpuitu a nei tha ani ang e, vaibelchhe 200 a dawng dawn a. Supplementary memorandum thehluhah khan vaibelchhe 86 leh nuaih 95 kha kan dil a, vaibelchhe 200 kha a nei thei bik a, thian neih that man te pawh ani ang e te ka ti a ni.

Pu Deputy Speaker, SEDP hi sawiloh theihloh a ni a, inthlan hma campaign naah vaibelchhe 1,500 kan dah ang an ti a, an sawrkar ta a, vaibelchhe 750 an dah a. Chu chu chhungkaw tin tan ₹3 lakh chuan cheng 25,000/- vel chan theihna tur a ni a. A kum hnihnaah vaibelchhe 513-ah a tla thla a, chu pawh chu vaibelchhe 82 vel kan sem thei a, kuminah vaibelchhe 400. SEDP-a sum hi ka en thin a, mi harsa zawk, kuthnathawktute chanpual hi ava tlem em! Tun financial year, 2020-2021 chhung hian PWD-ah ava luanglut hnem em! Mipuite hian nuai 3 beiseiin an lo nghak a, vote pawh an vote nasa a, nuai 3 sem kha a lar a ni. Engtikah nge mipui ten hei hi an dawn dawn? Hotupa berin December thleng khan 63% a hauh a, department dangte pawh hian an beisei asin. Agriculture Department-ah phei chuan 1% pawh a tlinglo, a kum zawn leh nghalin. 2019-2020-ah hian Agriculture-ah 1% dah theilo khan engatinge kum thar thuchahah khan, 'ei leh barah intodelh kan ngai pawimawh dawn' tih hi an la sawi theih? A mak hi ka ti a ni. Chuvang chuan ei leh bara kan intodelh nan te, thalaite anmahni kut kawih ngeia an intodelhna turah hian tuna vaibelchhe

400 la awm hi khawngaih takin kan Finance Minister, Chief Minister ni bawk hian helamah hian hma min lakpui rawh se tih hi ka ngen duh a ni.

Tin, SEDP document hi ka chhiar thin a, tih tur ava la tam tak em ka ti a. Human Rights Commission te, Lok Ayukta te hi thuam that a ngai em em mai a, tunah hian a ngheta hnathawk pawh hi an awm mang lo a ni. Thuam that an ngai, tih chak an ngai a ni. Tih chak te hi kan hlau zawk emaw ni tih te hi ka rilruah a awm hial a. Land reforms-ah ‘progressive taxing kan ti ang’ tih a ni a, chu chu khawiah nge a awm? Mi tam takin ram an nei a, a pangana velah kha chuan chhiah kha tih tam tawh mai tur, income generation-ah kan tang a ni lawm ni. Hei hi chu hmuh theih ngei ka beisei khawp mai.

Pu Deputy Speaker, tlem ka han sawi leh lawk ang a. Administrative Reforms-ah hian mipuite hmuh theih turin file kalna chin hriat theihna turin hmalak a ni ang tih te a ni a, ka va nghakhlel tak em, *transparency* kan mawmawh a, kan hmuh ngei pawh ka beisei a ni. Tin, SEDP hi grants te, subsidy te, price support leh loan anga hman a ni ang tih a ni a, thenkhatah chuan grant te chu an pe vein ka hria, mahse khawnge price support, khawnge loan, khawnge subsidy? Engtinge kan tih dawn? Entrepreneurs, mahni kea din duh tan guarantor-ah kan tang dawn tih te a awm, engtikah nge kan tan dawn?

Pu Deputy Speaker, sawi tur a tam hle mai. Mizoram Institute of Fashion Technology te, Directorate of Manpower Development tih te, Circuit/Race Track tih te, Mizoram Techno-Park tih te, sawi tur a tam mai. Chungcho chu din a hun tawh a ni. Tun bak hi budget vawihnih pharh tur ala awm dawn a, Pu Deputy Speaker, hun tlem min pek belh la, ka sawi zo tep e. SEDP Board enkawlina senso pawh budget-a dah ala ni lo hi a fuhlo ka ti; supplementary demand-a tih leh ringawt thin hi a fuhlo. In thiat dawn lova kan hmang dawn anih chuan budget-ah hian dah tur a ni. Hetia kal hi chu a fuh theilo.

Tin, kuhva chungchang kan sawi thin, Kuhva hi lakluh theih a ni lova, DGFT Notification, 2018-ah kuhva hi ₹251/- aia to hian India ramah lakluh phal a ni; a aia tlawm chu a theihloh reng reng. Tunah hian ₹40/- rate-in GST kan la a, a rawn lut theilo tawp a, a tawp nghal tur a ni tih hi ka sawi duh a ni. Electric bill ba kan pe hlei thei lova, mipuiin thla khat kan pekloh chuan connection tih tawpah kan invau thin a ni. Hengte hi a hun takah pek ni se. Mizoram sawrkar sum vaibelchhe za tel kan sen belha hi a hek lo deuh tura tih ni se tih kha ka sawi duh a.

A tawpna ber atan, Pu Dy. Speaker, helai hmunah hian kan House zahawm takah kan hotupa hian, “Central-ah hian vaibelchhe 100 North-East tan a awm a ni” a rawn ti leh thin a, a sawi apiangin ka dingchhuak zel dawn. North-East area tan tunah hian vaibelchhe 68,020 dah a ni a kumin budget-ah, nikumah khan vaibelchhe 60,112 a ni a, revised estimate-ah 51,000-ah a tla thla a ni a. Tin, kan budget, Union budget hi vaibelchhe 20 atanga 30 ti a han hisap mai lo khan, vaibelchhe nuai 34, 83, 232 a ni a, hei hi chu Finance Department atang pawhin awlsam tein a hmuh theih awm e. He thil hi chu ri tawh lo se ka

duh khawp mai. Thil kal tawh hnu hmuh mai theih, awlsam taka hmuh theih a kha hetiangah hotupa berina, ‘han hisap ila’ ti a sawi thin hi thalai rilru hi alo na deuh thin a. He House zahawmna avang te, a dinhmun hi a san em avang te hian budget chungchangah North-East-in pawisa kan neih hi chu data en hram tawh se tih ka ngen a ni e. Ka lawm e.

DEPUTY SPEAKER : Tunge kan han sawm leh ang le? Awle, Member zahawm tak Pu C. Ngunlianchunga ilo sawm ang.

PU C. NGUNLIANCHUNGA: Pu Dy. Speaker, ka lawm e. Hei, vawiin ah Mizoram budget kan sawi a, budget general discussion-a minute 10 hi chu a tlem a ni. Dik tak chuan mu mang loa kan ngaihtuah te a awm ve a.

Hei, kan budget kan han sawi a, pakhatnaa kan sawi duh lawk chu ‘State Disaster Management Fund’ kan tihah hian kan state sawrkar in a dah ang te khan kan han sawi a, a ni lova, hei hi chu central atanga kan hmuh tura beisei a ni a. Tin, Local Body Grant cheng nuai 103 te kha kan hmuh tura central atanga kan beisei helai kan sawrkar ina a dah lam ni lovin, kha kha chu central-in min pek, min rawn bithliah sak a ni tih te kha kan sawi hmasa mai mai duh a ni.

Pu Dy. Speaker, hei a vanduaithlak ka ti a, Pathian leh mipui zarah helai hian kum 7 kum 8 vel ka thu ve tawh a. Budget session hi kum tin kan nei a, Finance Minister-in budget a han pharh a, a present zo hi chu dawhkan hi a ri deuh dar dar thin a. Tun tumah chuan thehhmeh ang thapin ruling pawh, ruling lo pawh budget-ah khan lawmna tur a awmla a ni tih a chiang a, a reh thuap mai a, khawhar-Ina thu ang deuh maiin. Pu Dy. Speaker, tichuan a chhung thu kan han en a, nikum lamah te kan hmuh tur ang kan hmuh loh nasat zia pawh chiang takin alang a. Tin, helai hian hei tuna ka hmaa miin a sawi ang deuh khan kan budget session apiang hian SEDP hi, ‘a chi tur’ tih hi a ni a. Hei, tun hi budget kum 3 present-na ani tawh a, Bingtaii lo feh ang deuh khan a chi tur hi a ei zo zela tiak hi a awm talo nge ni? Kan budget nise SEDP pawh a zuih lam zel a ni a. Nichina kan ngaihthlak tak ang khan 750 atangin 513-ah, 513 atangin Covid avangin vaibelchhe 84.45-ah a han tla thla a, kuminah hian vaibelchhe 400 chu kan han dah leh naa. (*Pu H. Biakzaau, Chairman-in Chair a la*) Awle, Chairman hi ka thianpa a ni a, a rei theih viau ang. Pu Chairman, a rei tawlh tawlh a, a zuih tawlh tawlh ang mai hian kan sawrkar hi a rei tawlh tawlh a, a tawpah pheih hi chuan awm mumal pawh hi a awm tawhlo ang tih a hlauhawm hlein ka hria; chu chu thuhmaah ka sawi duh a ni.

Pu Chairman, Annual Financial Statement, 2020-21 phok 3-naah State-owned Tax-a Non-tax Revenue tihah hian social service-ah water supply and sanitation tihah hian nikumah nuai 6,000 a ni a, kuminah hian nuai 6,500-a dah chhoh a ni a, tui bill hi a sang dawn hlein session zawhah hi chuan a ni awlh dawn a ang hle mai a.

Tin, chutiang chuan, phek 4-na, Power-ah hian 2019-20 actual-ah khan nuai 37,361.22 a ni a, budget estimate 2020-21-ah khan nuai 33,000-ah a rawn chho a. Kan hriat theuh angin kan session zo a, kan tui bill pawh a sang chho viau a, tunah hian cheng nuai 13,255 dawrhin a rawn pung dawn niin a lang ta a. 2020-21-ah khan nuai 49,245.19 a ni a, Kumina kan budget estimate-ah chuan nuai 62,500 a ni a, nuai 13,255-in a rawn chho dawrh dawn a ni. Session zawhah hian power bill-te a rawn sang hle dawn niin a lang a. Chutiang anih loh chuan khawi atangin nge kha kha, a rawn sanna tur laia kha keini ang duang tan chuan hriatthiam a har a. Hei hi kan budget-a kan hmuh dan a ni a.

Tichuan, phek 6-na, physical services-ah hian ‘taxes on vehicle’ tih a awm leh a. Hetah hian 2019-20 actual-ah chuan nuai 1,320.55 a ni a, tichuan, budget estimate 2020-21-ah khan nuai 1,497.65-ah a rawn chho a. Tichuan, nikum revised estimate hnuah khan RE hnuah nuai 1,500.65-ah dah chhoh a ni a, kumin budget estimate 2021-22-ah chuan nuai 2,769.97 a ni a, nuai 1,269.32-in a sang dawn niin a lang a. Kan vehicle tax-te tihsan a ni dawn a ang hle mai a. Hei, tun hunah pawh hian, kha chawhma lamah an sawi tawh a, oil man an han tihsan vak atang te hian zoram mipui, a bik takin kut hnathawktute, miretheite a nghawng nasa em em mai a. Hmanniah khan kan nu bazar-ah a kal a, Bungkawng atang sawn taxi-in alo hawng a. Nidanga cheng 100 a chawi thinnaah khan taxi pute khan cheng 200 lo chuan a theih loh an rawn ti a, kan nu a phun deuh a, E, phun suh, oil man a sang em alawm, tun sawrkar hian tax a lak belh nasa a, chuvang chuan taxi driver ho tan pawh san loh theih a ni lo ka ti a. Kha khan mirethei harsate a nghawng nasa em em a ni. Tunah pawh hian kan electric bill a han sang leh ang a, kan tui bill a han sang leh ang a, a manganthlak hle dawn a ni tih hi a langchiang hlein ka hria a.

Tin, Pu Chairman, hei, kan pu hian, ‘Delhi tlawn ngailo turin theih chin chinah chuan intodelh kan tum ang’ a ti a, Delhi hi kan tlawn tha lo deuh nge ni, kan budget hi a hniam zawngin a kal zel mai a. Nikumah kha chuan hripui vang a ni tih kan hria a, cheng vaibelchhe 1,000 leh tih lain kan pha lo a. Chutih rual chuan kuminah pawh beisei kan pha lo hle a ni tih kan hria a. Hei, ‘Delhi sum kan hnukchhuak ruih ruih dawn a ni’ tiin kan CM hian Ni 23.5.2019 khan Thenzawl leh Serchhip a tlawh tum khan a sawi a, chanchinbu ah te a chhuak a. Pu Chairman, i phalna in ka han chhiar lawk teh ang. “Kan budget hi cheng vaibelchhe sing chuang a ni hrim hrim a, kan duh chuan kan kang thei a, kan duh chuan kan chhum thei a, kan bai thei bawk a. Maian bai thing ei pawlah tang lo hram ula” a han ti a. Kan budget hi kan duha kan bai theih emaw, kan duh a kan chhum theih emaw anih loh dan chu tunah pawh hian kan Finance Minister leh House Leader Speech-ah ngei pawh hian chiang takin a lang a. Kan Budget-a kan hmuh angin Revenue Expenditure-ah 82% chuang a kal a, Capital Expenditure-ah 17% chauh kan han nei thei a ni a, kan duha kan bai emaw, kan chhum emaw, kan kan emaw anih theihloh dan kha chiang takin a lang a ni. Tawng pawh hi kan fimkhur deuh a tha awm mang e aw, tih hi Pu Chairman, ka sawi duh a ni.

Tichuan, hei ACDP ah cheng vaibelchhe 400 dah a ni a, MNF returnee te thumthat nan cheng vaibelchhe 5 dah a ni bawk a. Nikumah khan vaibelchhe 5 kan dah tawh a, kan

lo pe lo anih ka ring a. Kuminah hian vaibelchhe 5 an han dahsak leh a, kan pe thei ang nge thei lovang chu ka hre lova, hetiang a ngaihpaawimawhna a han awm pawh hi a lawmawm thawkhatah ngai ila.

Tin, chutih rual chuan Pu Chairman, pensioner ho pension-na tur sum leh pai chungchangah keimah ngei pawhin zawhna ka zawt a, pensioner-te'n kum 30 chuang zet rim taka hna an lo thawha, an pawisa lo dah khawl ve an GP fund te leh engemaw hrang hrang an lak ve tur ang chi te la thei lovin mi engemaw zat an awm a. Chutih lai chuan kan budget-ah hian a hniam zawng hliir mai a pawisa kan han dah te hi engnge ni a awmzia, pension chu an pung zel bawk si a, tih lai te kha ka han sawi duh leh bawk a.

Tin, Pu Chairman, kumin kan budget 2020-2021-a kan harsatzia thu te, kan Finance Minister-in hna lakah te pawh insum hram hram a tul zia thu te a sawi a. Kan Finance Minister hi kawng lehlamah chuan a khawngaihthlak ka ti a, tun huna Finance Minister han nih chu a manganthlak dawn hle a ni, hripui leng karah sum lamah ni bawk. Chutih mek lai chuan tunah hian High School zirtirtu 150 vel zet la thar turin a kal leh ni tein ka lo hria a. Tin, chumi piah lamah he Session-ah ngei pawh hian 2019 SEDP chungchang kan sawinaah doctor leh nurse lak belh tur te, hna thar siam vak vak mai te kha nakinah pawisa kumtina pek ngai anih avangin harsatna kan la tawk ang a, kan revenue expenditure hi a tipung dawn a ni. Chuvang chuan, a theih chinah chuan insum hram hram ang u tih ka han sawi ve a ni.

Pu Chairman, khawngaihtakin, a laklawh em mai. Chuvang chuan he kan sawrkar thar, he sawrkar kum hnih kal tawh hi financial management-ah hian a hlawhchham a ni. A hlawhchham lailet der a, a chhan leh a vang chu tv leh video clip-ah te pawh kan hmu a. Kan Finance Minister-in khawi khaw pakhat a tlawhnaah nge ni sum an lo dil a, "E khai! In dil tlem lutuk a nih hi, hei aia tam pawh dil u la, kan pe ang che u" a han tihte kha, kan sum leh pai dinhmun chhiatzia te, sawrkar hnathawk pensioner-ten anmahni pawisa GP fund-a an dah ngawih ngawih, damloh nikhua pawha lak theih loh khawpa a harsat lain, sum bawm enkawltupa berin khatianga a han ti mai te kha sawrkar liam ta a kan Finance Minister kha a fakawm ka ti lo thei lo a. Sum leh pai chungchangah thahnem ngai takin inrenchem takin a enkawl a, chu chuan Mizoram sawrkar sum leh pai dinhmun pawh nasa takin a siamtha a, a thawka te pawh an hahdam a. Chutianga anga sum leh pai tha taka a enkawl chhan leh avang chu khang hun laia kan Finance Minister kha, kei pheih chuan ka tih dan chuan ama mimal aiin sawrkar sum hi a ren zawk a ni ti khawpin a minister-puite pawhin kha kha kan hmuh dan leh kan hriat dan a ni. Chutianga taka a ren avang chuan Mizoram sawrkar sum leh pai dinhmun a lo tha a, chu sawrkar dinhmun tha taka chu tun sawrkar hian dim baksak lovin a pal hnawk a, a palhnawkah a tang leh ta ni hian a lang a ni. Chuvangin Pu Chairman, he kan sawrkar kal chhohnaah hian vawiina budget kan han pharhah te pawh hri kan chhuanlam a, a dik, kan chhuanlam mek laiin helam, i ding lama mite chuan, 'kan development nasa takin a luang hum hum' kan han ti te hi, a tak ram hi vawiinah hian i sawi ang u, tih hi Pu Chairman ka sawi duh a ni e. Ka lawm e.

CHAIRMAN : Tunge sawi leh ang le? Sawi tur in awm tawh lo em ni? Sawi tur an awm loh chuan Leader kan sawm mai dawn a. Awle, Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e. General Discussion nihnihna kan hmang a, member-te pawh kan hah ve viau tawh ang a, hun a tlem a, duhthawna pawh a nasa a. Budget hi tuna kan sawrkar-ah hian vawithum pharhna a ni ta a, state dang leh central sawrkar budget-te kan han en a, kan han chhiar ve a, vawiin kan budget pharhah hian sawiho tur vak a awm tlat lo a ni. A chhan chu, nikum kan budget nen han en ila, a thu ngai, a figure inthlak a ni deuh ringawt mai a, point hrang hrang pakhatna atanga a tawp thleng hian nikuma mi copy/paste deuh tawp kha a ni mai a. Chuvang chuan, nikuma kan thusawi leh vawiina kan thusawi pawh hi a danglam vak em em thei lo a. State dangah chuan Pu Chairman, budget an han pharh hian a ram mipuite'n an lo thlir a, an lo en a, he budget hian engtin nge min nghawng ang, kan ram kalsiam kan sawrkar kal dan tur engtin nge ni ang tiin uluk takin an lo thlir thin a ni. Budget Speech kan Finance Minister zahawm takin a pharh ni atang khan thil thar hmuh tur a awm lo reng reng a ni. Mipuite tan beisei tur a awm lo a, loneitute tan beisei tur a awm lo a ni. Kan hmuh chu mipuite hrekna, mipui harsa tak leh rethei takte sawr fu lehzualna tur hliir a ni kan hmuh ni. Chuvang chuan, vawiina kan budget hi 'budget tha' han tihna tur hi a vang khawp mai.

Pu Chairman, i dinglama thu ten kar hmasa lam te, vawiin lamah te an thusawi tlangpuiah pawh an budget a chhuanawm loh thu an sawi a. Amaherawh chu, mak ka tih em em chu Covid vanga harsatna kan tawh nasat zia an sawi rualin 'Covid karah pawh development hi a kal ngaiin a kal reng a, chak takin a kal reng a' an han ti leh a, anmahni leh anmahni pawhin a khawi zawk hi nge an thusawia awi tur pawh an hre lo a ni.

Chuvang chuan, Pu Chairman, vawiin kan budget en hian keini ina kan lo beisei chu, kan ram tana hmasawna tur election hmaa an lo sawite sawrkarna an chan tawh hnua flagship program ami tihhlawhtlinna te a ni a, chu chu hmuh tur a vang khawp mai.

Hei, SEDP hi kan sawi a, nikum Budget Speech-ah chuan hei hi 'kan flagship programme' a ni a, an ti a. A SEDP-a an sum dah vaibelchhe 513 kha a hmanna tur chi hrang hrangte an rawn zia a ni, a fel fai khawp mai. Hetianga budget-a a hmanna tur an rawn ziah hian Supplementary Demand-ah pawh khan a ti tam lo a ni. Mahse vawiinah chuan Pu Chairman, kan Budget Speech ka han en let leh a, 'allocation on priority sectors' an ti a, thil pawimawh, kan sawrkarin a ngaih pawimawh point panga tarlan a ni a, kan ram hmasawna tur a vang khawp mai. SEDP-ah vaibelchhe 400 hna hrang hrang thawh nana ruahman a ni an ti a, Pu Chairman, hetia dah ringawt hi kan sawrkar hian vision a neihloh zia, he pawisa hian chu chu kan siam dawn a, chu chu chu kan ti dawn a, chu ti zah chu agriculture sector-ah hian kan pe dawn a tih ang chi te a awm lova, "vaibelchhe 400 hi SEDP hnuaia hna hrang hrang thawh nan ruahman a ni" a ti tawp mai a ni. He vaibelchhe 400 hi eng atan nge an hman dawn? vawiina member zahawm tak tak te'n kan sawi hoa kan pass

ni lo, ‘khawi hmunah nge’ tih lai kha. Hei hi PWD-ah a kal leh vek dawn nge a fachuam Minister-te hnenah a vaiin a kal leh vek dawn? Minister dangte engmah ti thei loa an awm laiin duh duha sem turin a awm leh ringawt mai a ni. Heng te hi sawrkar kalphung a ni lo a, nakinah Budget Session lehah Supplementary Demand-ah tam tak a rawn kal leh ang a, kan ang leh luai luai dawn a ni.

Chuvang chuan, sawrkarin a priority tur pawh hi tun budget-ah hian hriat kan nei lova, hna hrang hrang thawh nan tih a ni tawp mai a ni. Eng thawh nan nge, kawng chhawng Vaivakawn field atanga ban lian tak phun nan nge tih te hi han ziak se la chuan kan hrethiam ang a, kut benna tur pawh a awm tur a ni a, mahse khatiang kha a awm lova. Sawrkar priority berah chuan MNF Returnee te chei that nan vaibelchhe 5, MLA fund-ah vaibelchhe 60 kan dah leh Cooperative atan vaibelchhe 10, chungte chu tun sawrkar kan budget-a kan hmuh, kan ram hmasawna tur atana kan hmuh chu a ni tlat mai a ni. A beidawn thlak khawp mai. Thil thar hmuh tur a awmlo hian tun kum chhung hi chu ti hian sawrkar a kal bek bek ang a, a hnathawh tur eng eng nge ni tih pawh hre loin budget hi kan han pass leh dawn chu a ni a. Kan lo beiseiah chuan Pu Chairman, sawrkar in a ngaih pawimawh em em Aizawl khawpui chhung traffic jam awm lohna tur atana kawng chhawng siamna tur ang chi te kha an budget pharh kum thumnaah hian a tel hi kan beisei tawh tlat a ni. Kawng chhawng siam nan chuti zat pawisa chu kan dah e, Bawngkawn junction te, Vaivakawn junction-ah te hian heti zat hi kan dah an tih hi kan lo beisei a, mahse chutiang chu kan hmu ta lo reng reng a ni.

Tin, ‘PAHOSS’ kan ti a, hei hi kan tuipui khawp a, keini pawhin. Amaherawhchu tun kum budget-ah PAHOSS atana ruahmanna tur pakhatmah sawi rik leh lam rik a ni lo hian he PAHOSS Scheme hi anmahni party mi an duhsak zawng, milian Aizawl khawpui chhunga in leh lo neite an an pe zo tawh a, dah belh a ngai tawh lo a ni tihnaah kan ngai a ni. A chhan chu, he PAHOSS hi Aizawl khawpui chhung chep lutuk traffic jam rehna tur atana programme tha tak, kan House Leader zahawm tak duanchhuah ngei kha a ni. Amaherawhchu, an thlana te kan han en a, sawtah Zemabawk Lungbial Veng daihah te PAHOSS Scheme hnuaih In an han sa a nih chu maw le! Helai Kulikawn leh Chanmari inkar traffic jam nasa em em te kha sawtah Lungbial Veng-ah kan va park daih dawn em ni? Chuvang chuan, heng PAHOSS Scheme tha tak te hi party induhsakna tur atana ruahmanna mai mai a ni tih hi Pu Chairman, a rawn lang chho tan a.

Tin, kan lo beisei leh em em pawh sawrkar flagship programme, “SEDP atangin chhungkaw tin, NLUP dawng tawh zawng zawng pawh tiamin nuai thum kan pe ang che u,” an tih te kha hmuh tur a awm lo a ni. Chutianga mipuite hmaa an thutiam pawh tihhlawhtlin anih loh ai mah chuan, kan budget-ah hian thingtlang loneimite hamthatna tur hmuh tur a awm lova, thingtlang loneimite hi kan population-ah hian a tam zawk an ni si a. Vawiin hian kan budget tam zawk chu sawrkar hnathawk hlawah a kal ringawt a, hmasawna tur atana kan ruahman chu 17.33 % chauh hi a ni. Chutih mek lai chuan member tam tak ten an sawi tawh a, kan leiba tam zia, state leiba tam zia te an sawi a ni. Mahse ka

rawn sawi ve duh chu, Pu Chairman, kan state leiba ni lo, tukinah Finance Department-a ka zawhna alo chhuak a, kan sawrkar hian contractor leh supplier te, contractor hna zo tawh te leh supplier ten an supply tawh, an tih tur zawng zawng an tih tawh, amaherawhchu sawrkarin January 2021 thlenga pawisa a pek theihloh zat ka zawt a, a tam a mai, nuai hlira chhiarin cheng nuai 74,455 a tling a ni. Hei hi deficit kan tih te, kan leiba te ni loin, hei ringawt pawh hi supplier leh contractor-te kan pek theihloh K-Deposit-a tling khawm a ni. Sawrkar tan chuan a luhai thlak khawpin ka ring. Pu Chairman, heng bill han pe chhuak leh tur hian 15th Finance Commission ina pawisa quarterly-a min rawn pek leh turte hi han semzai ta ila, hmasawna thar, bultanna thar nei turin. Han en ila, heng kan leiba ringawt pekna turah pawh hian Finance a thawkte tan chuan a luhai thlak ngawtin ka ring a ni.

Tin, Pu Chairman, kan hria a, kan sawrkar sum neihloh lutuk avangin, nichina kan sawi tawh ang khan chhiah a rawn pung chho em em a, petrol-ah 5%, Diesel-ah 2.5 %, heti em em maia sawrkar harsat avanga mipuite harsatna tur chhiah kan pek ngai ta hi, kan sawrkar hi financial management-ah hian kal ngaihna a hre lo a ni. Sawrkar tha chuan mipuite harsatna sutkianna tur atan a subsidize zawk thin a ni. Hei, sawrkarna an chhan atanga kum hnih velah ringawt, heti khawpa financial crisis-ah kan ram hi min hnuk lut tawh a, chumi ina hrin chhoh mek chu, mipuite a harsat zawnga, a sawrfu zawnga sawrkar kal hi a ni tlat tawh mai a ni. Chuvang chuan kan hria a, petrol man, diesel man alo to chuan, thingtlang atanga kan bungraw rawn lakna turte, thingtlang atanga thlai thar Aizawl leh khawpuia an lakluhna tur te a to chho vek dawn a ni. Chung zawng zawng nghawng, a tuar nasa ber tur chu miretheite an ni.

Tin, electric bill sang turah mipui kan buai em em tawh a, mipuite hi a sawrfu theih ang angin financial management an thiamloh lutuk avangin, kum hnih chhung chu a sawrfu theih ang angin min sawrfu reng a ni. Kum khat dang a kal leh chuan Pu Deputy Speaker, sawrkar hi kal thei loin a awm ang tih hi ka hlau khawp mai. Tin, pawl ka tih em em chu, hei kum thumna kan hmang a, kan Rural Local Bodies te, Urban Local Bodies te fund kha kan state sawrkar dah emaw kan tih kha central sawrkar atanga rawn kal a ni a. Chumi nilo chu State Finance Commission hian kan Rural Local Bodies te, Urban Local Bodies te leh State Budget atanga kan pek tur hi a ruahman ve thin a. Hun reitak State Finance Commissioner nei lovin kan awm a, hemi ina lantir chu, State Finance Commission kan neih chuan Finance Commission-in a ruahman tur hi kan zo lovang, kan budget an pawhhek hi kan hlau a ni tihna lam a hawi tlat tawh mai a ni. A chhan chu vawiiinah pawh an la din loh chuan Finance Commission an han thu ang a, kumkhat te, kumhnih te an ruahman chhung kha a kal ve leh dawn a ni, chutih hunah chuan inthlan a lo ni tawh ang a, State Finance Commission ina kan ram, kan state budget mumal taka ruahmanna a rawn siam hi hmang hmanlo tur anga hisapna a ang riauvin ka hria a ni.

Tin, Pu Speaker, a tawp ber atan chuan zu chungchang hi kan sawi kan sawi a, memberte thenkhatte an din apiangin ‘revenue tam vang’ an ti a. Ka rawn sawi tum zawk chu, total prohibition kan ti a, kan budget kan han en a, Excise Department tih chakna tur

awm hi pakhatmah a lang lo a ni. Inrinni khan Kolasib-ah ka zuk kal a, Sairang lam atangin karawn haw a, Rangvamual chu kal harsa khawpin kan thalaite an lut thla a ni. Chutih rualin Excise motor pakhat hian khung veng zawng zawng khu a cover zo lo tih a chiang reng mai a, hetiang khawpa sorkarina hma a lakna total prohibition a tih laia, a ti rehtu, a ti chaktu tur kan State Excise Department tihchak a tum leh si lo hian, a thu maia khapa, zu leh drug chu free takin kal sela tih hi sawrkar tum a ni tih hi a lang a. Chuvang chuan hengte pawh hi rilru leh tih takzeta tih rem kan tum a nih chuan Excise Department pawh hi tihchak an ngai a ni. Drone te kha an han leisak ve a, Drone ringawt maia zu check leh zu zuar ru te man hi a har hmelin ka hria; kan Minister khan a zuk hawngin ka hria a, Drone kha. Amaherawhchu, khatiang mai loa force tak tak sipaite pek belha hna thawk thei tura kan Excise Department hi siam a tha e tih kha karawn sawibelh a ni e. Pu Dy. Speaker, ka lawm e.

DEPUTY SPEAKER : Tunah chuan kan Opposition Group Leader, Pu Vanlalhlana ka sawm ang a, Group Leader nih manah minute 15 hun a nei a ni.

PU VANLALHLANA : Pu Dy. Speaker, ka lawm e. Mizote hi kan mak a, tihdan tha deuh te pawh hi kan nei a, Assembly-ah te ro kan han rel tlang a, Opposition te, Treasury Bench te kan ti a, mahse kan induhsak tlang a ni. Vawiinah pawh Pu Lawmawma Tochwawng, MLA zahawm tak hnen atangin Artui kan dawng a, Parliament-ah te, Karnataka ah te, Tamil Nadu ah te khuan an in present hian ka ringlo, a lawmawm riau a, lawmthu kan sawi a ni. Tin, Minister dangte hnen atang pawh hian silpouline leh thildang eng eng emaw hi kan dawng a, kan inunauna hi a tha a, kan vawn nun zel pawh a thain ka hria. Ram tan ngaihdan inanglo chinte chu a awm lo thei lova, chu chu ka han sawi hmasa duh a ni.

Pu Dy. Speaker, kan Prime Minister hian kum 2022 lo thleng tur hi a vei khawp mai a, 2022 lo thlengah hian India ram hi kum 75-a upa a ni dawn a, chutah chuan New India siam a tum a ni. 'New India' a tih chu clean India, poverty free India, corruption free India, communalism free India, caste free India, khang India hmai tibaltu zawng zawng lak atang khan New India hi ka siam dawn a ti a ni. Chumi tihlawhtling tur chuan scheme hrang hrang a duang ta a, tunah hian central-ah 118 lai programme leh scheme vaibelchhe singa thuum vek a awm a ni. Kan House Leader-in, 'central-ah pawisa a tam a ni, project siam ila hai chhuah theih a ni' a tih hi a dik chiah a ni. Amaherawhchu, chung project lakchhuah tur a chu guidelines nei vek a ni a, a tui tui, a duh duh, a phur phur ina zuk lakchhuah mai chi a ni lova, khawih lam a nei vek a, zir chian erawh a ngai viau thung a ni.

Entirnan han sawi ta ila, scheme pakhat Pradhan Mantri Jan Vikash Karyankama Vikash Yojana (PMJKVY) a awm a, chumi ina tum chu minority te chawikan a ni. Mizoramah chuan Mamit te, Lawngtlai te, Lunglei te kha minority area-ah minrawn pawm sak a, chungte tih hmasawna atan project siamin sum a dil theih a ni. District dang tana beisei ve rikngawt kha a thiang vak lo, kan Chief Minister-in Pu Muktar Abas Natvi, Minority Minister hnena concept note siama pawisa a zuk dil ve kha a ni vak lo, a chhan

chu a bial kha minority area a ni tlat lo a ni. Amaherawhchu, kan sawi duh tak zawk a chu, PMJKY hian education te, health te, skill development te chawikanna tur a ni a, engatinge Sports Department-in crore tam tak a haichhuah laiin department concern zawk health department, te education department te, skill development atan te hian pawisa hi haichhuah anih ve loh hi ka ti zawka chu, chu chu ka rilrua zawhna pawh ka pek a ni. Mipuiin kan mamawh zawkte pawh a ni a, heng atan hian sum haichhuah a ni lova, minister concern tan hriat vek a harsa ang, amaherawhchu a hria minister hian a share ve turah ka ngai a. Chutianga in finchhuah tur chuan miniter-te hi an thu tlang ngailo em ni, an lungualna hi a tha tawklo em ni tihte pawh hi question kan pe deuh a ni.

A dawt leh a ka sawi duh chu, Thangrang chungchang hi - Thangrang hi Karimganj District, Assam State hnuai a awm a ni a, Mizoram khua Thinghlun hmar lamah valley pahnih Shimla valley leh Langkai valley ruama awm an ni a, zofa thlangtla hmasate zinga mi an ni. Chawrai te, Sakechek te, Hrangkhawl te, Rawnglang te, Kaipeng te an ni a, tuna an awmnaah hian kum 200 vel awm tawhah an inngai a. Shimla Valley-ah hian khaw sawm an awm a chungte chu - Zaite, Zailian, Chinzawl, Tlangmawi, Rawnkur, Khawthar, Cherebi, Kungpui, Dialdawkdum te an ni a. Tin, Langkai Valley ah hian khaw sawmpali lai an awm a chungte chu - Chhimluang, Ramati, Manitbawng, Sateldum, Dakzai, Murka, Zairal, Lakhankhawng, Phuklicherra, Kadawmtala, Magura, Sopri leh Jubicherra chung khaw 14 te chu an chenna a ni hlawm a ni.

Mizoram chu British hunlaiin Assam hnuaiiah Lushai District niin kan awm a, chutih lai chuan kan unauhte hi Syhlet District, tunah chuan Bangladesh-ah an awm a ni. Engemaw hun a tang khan Zo-hnahthlak te zingah inpumkhat duhna a lo lian a, ZORO lo pian atang phei chuan nasa takin boruak a siam a. Zoram chhehvel a Zo-hnahthlak Myanmar a mi te, Manipur a mi te, Bangladesh a mi te, Assam a mite inunauna leh lungualna, inpumkhatna avangin rorelna pakhat hnuaiia awm duhna a lo lian hle a.

Chung chuan *thlangram* unauhte pawh a rawn man chho zel a, thlangram awmzia chu thlang lam ram, 'West Zoram' ti ila a fiah thei mai awm e.

Anni hi reunification duh an ni a, reunification an duh dan chu a dan a dang deuh a, an chenna thlangram, West Zoram kha Mizoram-a rin luh an duh ta a ni. Chu an duh thu chu Union Home Minister hnenah pawh ziakin an thlen tawh a, kan chhehvela kan unauhte reunification duh vete aiin an pen thui deuh a ni. Mizo mipuite leh sawrkar pawhin tha taka kan lo dawn sawn a tulin ka hria a. Hengte hi boruak thar, MNF sawrkar laia lo thleng a ni a, MNF pawh an vannei ka ti a, hma pawh an lak sak ngei ka beisei a.

Thlangram unauhte hi tunah Assam hnuaiiah awmin an chep em em a, an inngaih dan chuan second class citizen-a treat niin an inhria a. Henglaia thil harsa lo tak Aadhaar Card te, Pan Card te, Tribal Certificate te, Residencial Certificate lak te a harsa em em a, tin, hmasawna hian a thleng pha meuh lo a ni. Chumi anih a vang chuan an khawsak pawh a

hniam em em a, zirna inah te, hriselna chungchangah te Mizoram atangin Kohhran ten an zu hma tel thin a. Chunga vanga zia leh chhiar thiam te pawh an lo ni ve a, Zoram unaute an ngai em em a ni. Hmanni lawkah Mizoram-in Lockdown kan nei a, ramri a buai a, eitur kan harsat hlauin an mahni pawhin buhfai te khawnin Mizoram tan, Mizo mipuite tan chhawmdawl hna an thawk a ni. Thlangrama chengte, nichina hnam hrang hrang kan sawite khan pawl an indin a, 'Thlangram Indegenous People Movement' an inti a, an duh ber chu Mizoram-a beh a ni. Chu chu Mizoram Chief Minister hnen ah pawh March Ni 8, 2012 khan an lo thlen tawh a ni.

Tunhnaiah khan Thlangram hotute lo kalin sawrkar hotute, NGO hotute, Political Hruaitute pawh an rawn hmu a. An duhna hi kan hriatthiam pui a, thiam taka kan dawr a, an tana kan inpek te pawh a tul a ni tih kha ka sawi duh a ni.

Pu Deputy Speaker, a dawt leha ka sawi duh chu, Democracy rama awm kan ni a, kan inthlang thin a, thlantlin ten ro an rel thin a ni. MLA tuang takin kan inthlang a, M.P kan inthlang zo a, AMC te pawh kan inthlang a. Tichuan Local Council leh Village Council te pawh kan inthlang zo ta a. Village Council leh Local Council kan inthlanna chungchang kha tawi tein han sawi hlek ka duh a. Village Council kan inthlanna ah khan complain hi 240 a lut a ni. Local Council inthlanah khan engzat chiah nge lut ka hre lova, Election Tribunal-in ngun taka a ngaihtuah hnuin decision te a siam a, khaw thenkhatah re-count te neih a ni a, re-poll te neih a ni a, result danglam deuh te pawh a awm a ni. North Vanlaiphai-ah re-poll neih ani a, tlinga puan tawh sa kha a tla a, a tling loa kha tlinga puan leh a ngai ta a. Tawipui North-ah re-count a ni a, tlinga puan a tla a, tling loa kha a tling leh bawk a. Darlawn-ah re-poll neih a ni a, khatiang khan result a danglam bawk a. Ka bial chhung Aizawl District Selesih-ah re-count neih a ni a, Local Council Chairman chu a tla tawp mai a, a tling loa puana kha a tling leh a, khatiang kha a ni a. Bethlehem Vengthlang-ah Local Council kha vote difference 4 chiah kha re-count anih chuan vote 4 difference a lo ni leh a. Khatiang kha tun Village Council leh Local Council kan inthlanna hnuhma a ni a, fimkhur a ngai khawp mai a, MP, MLA leh AMC-ah chuan Electronic Voting Machine kan hman a, complain a awm vakin a hriatloh a ni. Amaherawhchu, Local Council leh Village Council inthlanah erawh chuan sawi leh sel hi a nasa khawp mai a, chuvangin a thawktute pawh an fimkhur a ngai khawp mai a. Election result puanna hmuna inthlanna vote an hmuh leh re-poll emaw, re-count an neihnaa vote an hmuh kha a danglam tlangpui deuh vek a ni. Chuvangin uluk a ngai viauin ka hria.

A dawt leha ka sawi duh chu, kan Governor-in House-a thu a rawn sawi khan, kawng laih, kawng thawmthat leh kawng enkawl kha a ngaihpawimawh thu a rawn sawi a, kan kawng chhiat zia a rawn hria ni ngei tur a ni. Kan kawng te hi a chhe em reng a, engnge a chhan ni ang le? Mizoram khua zawng zawng motor-in a pawh tawh a tun ah hian. PMGSY te a lo awm a, chu pawh chu kan thatpui viau, amaherawhchu, a chhe reng mai. Nikumah Road Fund Board hnuaiyah kawng chhe siamnan nuai 5,000 dah a ni a, khawilai nge an siam kan hre lo, kan kawng hi a chhe em em vek tlangpui a. He sawrkar lo pian tirh khan Congress

pawisa hman bang hmang khan kawng kha an han siam a, anmahni pawhin an hlimpui viau a. Amaherawh chu tunah chuan kawng chhia kan zawh tlang ta mai mai a, Congress ei bang chaw thing kan kang lum mai mai a ni tia an hlim viau kha a ni a. Mizoram-ah chuan kan contractor-te hi kan ngam lo ni ber hian ka hre mai a, restricted tender hmangin hna kan pe a, advance-ah dan palzut deuh reuhin pawisa kan pe leh a, pawisa an dawn tawh ber chuan hnathawh kha an ngaipawimawh tawh tlat lo a ni. Chumi anih avang chuan sawrkar te, NGO te kan mangang a, contractor hna thawk tura work order neia kha a hna thawk turin ngen te kha an ngai ta a ni; chu chu kan dinhmun hi a ni a. Heti em ema contractor an huangtau hi an laka tang hian pawisa hi kan la ve a ni lo maw ka ti hial a ni. YMA kan hnathlang a, kawng an siam a, a lawmawm em em a, amaherawhchu, sawrkar tan chuan a mualpho thlak deuhin ka hria. A enkawltu department te pawh an mangang a ni. Entirnan, GP Project chuan Zero Point atanga Meidum kawng siam tur an ni a, an siam duh lo a ni. PWD-in vawi 9 explanation an call hnu pawhin an ti tha duh lo; chung chu contractor-te dinhmun leh nih phung a ni. Sawrkar hian contract hnathawh reng reng insak a ni emaw, laih a ni emaw, supply a ni emaw dan zawm chungin strict takin kal pui se tih hi ka duh thu kan tarlang a ni.

Pu Deputy Speaker, ka tarlan leh duh chu, Mizote hi khawvelah kan la awm zela dam khawchhuah kan duh anih si chuan kan inenfiah a ngaiin ka hria. Kan population than dan hi a ngaihtat thlak ta lo a ni. 1981 atanga census zawng zawngah khan kan punna hi a tlahniam a... (*Hon. Speaker-in Chair a la*)

SPEAKER : Sawi chhonzawm rawh le.

PU VANLALHLANA : Ka lawm e, Pu Speaker. 1981-ah khan 45% velin kan pung a, 1991 a lo nih khan 39.70 % in, 2001-ah 28.82% in, 2011-ah 23.48% in kan pung a, kha kha decadent growth, kum 10 dan ah a ni a. Kumtin hian 2%, 3% velin kan pung emaw chauh a ni a, chu chu a thalo viau a ni. Kohhran an mangang ta a, Synod lampang pawhin tan an la viau a, Baptist lampangte pawhin TKP khawmpuiah te pawh kan pun theih dan turte an ngaihtuah ta hial a ni. Kohhran hi kumtinin uluk taka inchhiar an ni a, kan population than dan hi an Chiang a, an mangang ru pawh hi a awm viau a ni. Sawrkar pawhin heng hi ngaihtuaha ruahmanna te pawh a neih ve thain ka hria a. Kohhran thenkhatah chuan nau piang lawmna/enkawlpuina/lawmpuina tiin a cash ang te pawhin tanpuina an inpe tawh a ni.

Hemi ruala thil pakhat ka tarlan duh mai mai chu, Mizoram University-ah nikumah khan zirlai 818 an in admit a, chuta 524 chu hmeichhia an ni. 64% kha hmeichhia an ni a, mipa chu 294, chu chu 35% a ni. Hmeichhia kha mipa let deuh thawin zirlai an tam a ni. Kan society-ah hian hmeichhiate hi an active ta hle mai a, dawrah ni se, office-ah ni se khawi hmunah pawh hmeichhia an tam zel a, a society angin Mizote pawh hi kan inenfiah a tha lo maw tih kha kan tarlang duh a ni.

A dawt leha kan tarlan duh chu, Pu Speaker, kan Governor leh kan Chief Minister ngaih pawimawh inang lo lutuk hi a buaithlakin ka hria. Kan Governor hian House a rawn address khan a ngaih pawimawh chu chiang takin a rawn tarlang a, ei leh bara intodelh, food production ka ngai pawimawh ang a, a dawtah chuan kawng ka ngai pawimawh ang; kawng tha siam te, kawng enkawl te, improvement te a rawn ti a, a dawt leha chuan power generation a ti a, chung chu kan ramina kan mamawh ngawih ngawih hlawn kha a ni. Tichuan, Chief Minister hian budget speech a han siam ve leh a, chutah chuan a priority section a lo lang ve leh a, a ngaih pawimawh ber chu SEDP, a hmasa berah an awm a, a dawt leha chuan MNF chhawmdawlina, a dawt leha chuan MLA Area Development Fund chungchang te, Co-operative Society chungchang te, Local Body chungchang te a rawn tarlang leh ta a. ‘My Government’ titu chu Governor a ni a, chutih lai chuan chu ‘My Government’ atih phattu leh a Leader chu House Leader a ni bawk si a, priority hi a inang lo hle mai a. Kumthar thuchah ngaihnawm tak kan ngaithla a kan House Leader hnen atangin, ei leh bara intodelh kan ngai pawimawh ber ang, buh thar chhuah hi ka ngai pawimawh ber a ni, kan kham khawp hi kan thar chhuak thei, kan go-down zawng zawngah ramdanga thar buhfai a awm thup hi a dik lo, farming hi kan mechanize ang a, tan kan la tak tak dawn a ni a ti a, a nghahhlelh awm hle a ni. Power-ah lah potential kan nei tha em em bawk a, power siam chhuak tura tuikhuah kan tum der bawk si lo a, hengah te hian eng emaw chen chu kan la harsa zel dawn ni te pawhin a lang a ni.

Tichuan, ka sawi duh leh pakhat chu, ram kaihruainaah leader-te an pawimawh em em a, hotu ber atana kan duh dan hi a inang kher lo ang, kan duh dan a hrang vek ang. Ka rilrua thi theilo leh ram hruai tura ka rilrua ka la hriat reng hi chu 1986-a MNF lo haw te zinga tel ve tlangval hmeltha tak, sap tawng thiam tak, piang thar, Pathian thusawi pawh ngaihnawm thei tak, a tul chuan gas pawh mipui zinga nghak mai, cylinder pawh pu vu vu mai thei kha, kha kha ka rilruah hian a cham reng a, chu tlangval chu ka hmu leh ngai tawh lo, nupui a nei a a bo ta mai nge ni Mizoram politics-ah hian ka hmu leh ta lo a, amah chu ka mangphan fo mai a. Amah kha hmuh tur a awm ta lo rau rau anih chuan kan ram hruai tur hian Pu Lalduhoma hi ka duh ber mai a kei chu; a chhan chu, ram a hmangaih a ni. A chhan dik tak chu ram a hmangaih a, chu mai bakah a chhan dik tak kan hriat thiam ve phak miah lo avanga hek leh paih a ni a, politics takin a hnawksak a, a huphurhawm ta deuh a, hnuh hniam a ngai an ti ni hmiang maw ka ti mai a. Ka ngaihnan hi Serchhip constituency mipuite leh Mizoram mipuite hian min tawm chho mekin ka hre nghe nghe a ni. Pu Speaker, Congress sawrkar lai chuan *Bhavan List* a lar hle a, i hre vek a, MNF sawrkar chuan *Hnam Run List* a lar ve leh thung a, thil awm lo pawh a ni lo a, thil kalphung pangai ang te pawhin a ngaih theih e. Party office atangin Secretariat-ah recommendation a kal thin a, Minister-ten an lo dawng a, work order pawh, hnate pawh sawrkar officer kal tangin an sem thin a ni. Amaherawhchu, tuna kan kalphung hi a dang ta tlat a. Kan Chief Minister ngeiin Serchhip-ah khan engtin nge a tih kha, “Khai le, Minister-hoin hna kha Hnam Run-ah han vawm khawm rawh u ka ti a, an rawn vawm khawm ruih ruih a, chu chu Pu Zawma’n a sem thin a ni” a ti a. Hei hi thil thar a ni, ‘MLA in nih phei chuan Minister aiin hna sem tur a ngah leh zual ang’ te a la ti ta deuh deuh a, hei aia party induhsakna uchuak, kan duh loh em em

hi a awm thei dawn em ni, dan pawh a bawhchhe ngei ang. ‘Mitin huapzo, mipui sawrkar din ang u’ titu, manifesto-ah meuh pawh tarlangtute tan chuan a mawi lo, sim vat chi a ni, Pu Speaker. Tawk rawh se aw, ka hun a tawp chuan. Ka lawm e.

SPEAKER : I va ti hot lo ang reng ve. Tikhan kan sawi zo ta em ni le, Sawi tur kan la awm em? Kan House Leader wind up turin ka sawm tawh mai dawn em ni? Awle, tunah chuan member zahawm tak tak te’n ‘The Annual Budget for the year 2021-2022’ chu an lo sawiho zo ta a, kan Chief Minister zahawm tak, Finance changtu ni bawh tunah wind up turin ka sawm e.

PU ZORAMTHANGA, CHIEF MINISTER: Pu Speaker, ka lawm e. Member zahawm takten eng emaw zat an sawi tawh a, rei lutuk lo sawia han zawh hram pawh kan tum ang e. Budget discussion wind up-na kan han neih dawn hian kan budget chu sawi leh sawi hnu kan hre theuh a, Covid-in min tih buai avangin harsatna chi tam takin min tlak buak a. Mizoram budget/kan sawrkar budget hi a tibuai mai a ni lo, India ram pawh nasa takin a tibuai a, MP fund-te pawh cut sakin a buai nuaih mai a. Tin, khawvel ram hausa America meuh pawh a buai a, ram tin an buai a. Keini kil khawra ram te reuhte chu han buai lo chi pawh kan ni lo, a buai pawh kan buai na meuh reng a. Hemi karah hian ‘Sawrkar budget rawn present hi a chhe lutuk, financial management-ah in fail a ni’ an ti a, politics-a han inbeihnaah chuan han sawi awm pawh a ni zel tho a. Kan fail loh zia chu hei a lang tawh a, ti hian kan survive a, kan dam khaw chhuak a. Chu chauh ni loin kan budget buai karah buhfai-ah te, kan gas-ah te harsatna lian lutuk tawk lovin Covid kan fight-naah pawh tluang takin, entawn tlak India ram state zinga ti tha berah kan tang a, chuvangin kan kohhran-te, tawngtaina te a ni a, kan mipuite thuawihna leh co-operation na te a ni a, tin, sawrkarin theihtawp a beihna te pawh a ni a. Chuvangin heng zawng zawng kalkhawm hi eng ang pawhin han sawisel mah ila a, dik a, sawiselna tur chu a tam a, amaherawhchu fail tawp chu a ni lo hle a ni tih erawh chu kan hria a ni.

Mau tam kumah a vur kum a thleng a, Covid avanga kan harsat kumah gas leh buhfai-ah te chuan harsatna lian awm hauh loin heti hian kan kaltlang chho leh zel a, a lawmawm kan ti. Amaherawhchu, chuti chung chuan finance hrim hrimah chuan khawvel kan buai tlang a, tunhnaiah pawh kan han sawi ang khan petrol oil man pawh kan han ti a. Kan en thin a, litre-ah 80/- anih lai khan India ram khawpui thenkhatah chuan 90/- leh 100/- te pawh a awm chung khan keini chu ziaawm takin kan la kal thei zawk a. Tax kan lak san thar thut vang a ni hauh lo tih chu kan hre theuh mai a, India ramin a ken tel a ni a, a rate a lo sang lo thei lo a ni tih te kha kan hriat tlan a thain ka hria a.

Kan harsat tlan avangin India ram sawrkar pui ber pawhin kan dawn tur anga ngaih vaibelchhe 1185 zet mai 30% tling tep 29% vel kha kan han hmu lo ta a, keini ang state tea vaibelchhe 1,000 chuang zet mai kum khata a han tlahniam chu a namai lo khawp mai a, khata tang khan survive tumin kan han bei fat fat a ni a, chu chang ni loin special grant a vaibelchhe 546 min pek tura kan ngaih pawh kan han dawng lo leh a, heng dawn tura kan

beisei hmu lova a sang chuang bi fe a han kal chho ta kha keini tan pawh a a harsa a, budget han present leh turah pawh hian theih tawpin tan kan lak a va ngai em tih hei hian min hriattir a ni.

Pu Speaker, kan sawi leh duh chu, tax thar hi tam tham lak pawh kan tum lova kan tun dinhmunah, amaherawhchu, automatic-a lokal chho ve hrim hrim entirnan, electric bill chu a titu kan commission bikin state tana an tih lokal chho pangngai a awm ang a, tin, oil-ah te pawh kan hriat ang khan a rampumah a man a san avangin keini pawh a rawn sang a, a tax kan lak thar vang pawh a ni lova, khatiang kha a ni a. Amaherawhchu, chuti si kan budget-a receipt kan dawn turah hian tax hi in va han target lian ve maw le, in thei dawn emaw ni le, tax tih san vak mai in tum em ni, tih zawhna kha a awm a. A ni bawh lah tak a, chu question chu lokal tur pawh a ni a, amaherawhchu, tax tih san kha loh theih loh avanga lokal te chu a awm ang, pakhat mah a sang lovang tih theih chu a ni lo a, kan target ber chu, entirnan kohhran hian thawhlawm a hmuh thatna tur chuan a khawn taimak a ngai a, chutiang chiah chuan keini pawh kan tax lak kan in mobilise kim that tawh rih loh avanga kan lak loh hi vaibelchhe tam tak a awm a, chu a kim thei ang bera lain tax tisang chuang lo hian nasa takin kan tipung thei a ni tih hriain beihpui thlak pawh kan tum a, tax leh non-tax kan sum lak duhna tur a tana tihpun kan tumna bul pui ber pakhat pawh a ni bawh a ni.

Tin, SEDP chungchangah chuan cheng vaibelchhe 400 kha a hmanna, a break-up in siam lo an ti a, kan siam lo a, kan untied fund ve ber a ni a. SEDP tuna kan tih tuma chu, keimahniin a pawisa faiin sem chur chur dawn ila chu keini ang pawisa chuan a daihlo tih kan hria a. Kan tuma chu, central-ah theihtawpa project siamin, mipui ta tur kan zuk hnuk chhuak ang a, Agriculture-ah emaw, Horticulture-ah emaw, Vety-ah a ni emaw, Fishery-ah a ni emaw development dangah a ni emaw kan zuk hnuk chhuak dawn a ni. Amaherawhcu, kan state matching share ve tur a ngai ang a, chungah chuan kan lo inrinna ber chu SEDP hi a ni a, chuta kan matching share tur 10% emaw, chu lo deuh emaw chu kan SEDP kan matching share tur atan kan inrinna pakhat zinga mi, a break-up siam nghal ngawt theih loh chu chu a ni a, untied fund anga kal tur pawh a ni a, a tul ang zelin kha kha hman theih a ni bawh a ni.

Hemi thil a kan sawi leh duha chu, 'PAHOSS-ah khan engmah dah a ni lo' tih a ni a, a lo langlo reng lah tak a. PAHOSS-a kan pawisa dah hi a tirah 2019-2020 khan cheng nuai 7,002 kan dah a, chuta tang chuan kan hman tawh hi a chanve tling mang lo a ni a. Member zahawm tak te'n an han sawi parking house kan mamawhna ber lai hi a hmun rawn thawhtu ti zawngin sawi ta ila, Dawrpui phei a ni emaw, Chanmari phei a ni emaw, a nih loh leh Zarkawt a ni emaw khangah khan PAHOSS parking house atana an In rawn thawhtu awm lohna a ni a, an awm loh miao chuan tuin emaw a In kha parking house-ah in ti tur a ni a tih ngawt theih si lo a. A awm chu an awm bawh a, mahse In neitute'n parking house atana an rawn thawha hi kan duhna lai nen a inan loh chuan pawisa kha hman theih a ni lova. Tin, hmun tam takah an han tan a, kil khawr deuh takah pawh kan han pe a. Tuikual kilah te pawh kawng a lo te a, khangah te khan parking house hi a mamawh ber berte an lo

ni ve a, chu chu kan pe lo thei lo va. Chutiang chuan kan han pe zel a, chuti chung chuan an han sa a, tun kan Covid kum khat zet mai a han deng deuh dut mai hian min tibuai khawp mai a. Tunah hian kan PAHOSS pawisa dah kha a chanve kan la hmang lo tlat a ni, cheng 4137 lakh vel kan record hnunungah chuan. Amaherawchu nitina kal ve anih avangin a number tak hi chu a lo dik lo ve thei a, cheng 4,000 lakh chuang hi hman loh kan la nei tlat a ni. Chuvangin dah belh a ngai lo a ni. Keini pawhin in In hi parking house-ah in ti thei lawm ni, tiin kan nawr kan nawr ve tho a, kilkhawr deuh atangin kan tan ang a, a that zia an rawn hmu ve ang a, tichuan laili deuha In neite pawh khan an rawn phal ang chu maw te kan ti a ni. Chu chu tunah hian kan parking house chungchang thuah member zahawm tak te'n in han sawi kha ka chhanna a ni a. A chanve aia tam pawisa hman tur kan la nei a ni tih kha kan sawi duh a ni.

Tin, hmun pawimawha parking house tura tana In rawn thawh te awmna turin remruatna pawh a awm a, a hlawk zia, a that zia, sawrkarin In a sak sak tawp a, khata income 5% emaw kha sawrkarah chhun luh tur tih pawh a awm lo, a hlawkna zawng zawng 100% kha an nei nghal vek bawh dawn a ni. Kha kha chhun lamah parking house a ni ang a, zan lamah garage-ah a hman theih dawn a ni. A enkawl man a tlawm dawn bawh si a, tui leh electric, bathroom leh thil dangah problem a awm dawn bawh silo a, chuvangin hei hi chu theih tawpa kan tih tlan hi a ngai a. A neitute tan a hlawk a ni tih kha member-te hian kan campaign tlan a tulin ka hria a. A sum hi dah belh pawh ngai lo, tunah hian kan la nei teuh mai tih kha kan sawi duh a ni.

Tin, State leiba hi tlema mimawl zawkte kan inhrilh danah hian kan sawi sual ang tih ka hlau a. State budget-ah hian central-in bat tura a tih sa hi a awm hrim hrim a. Entirnan, NABARD loan te, NCTC loan te a lo awm a, hetah hian loan lak min rawn tuk tawp mai a ni. Chuvangin kan bat ngei ngei ngai a ni a, hei hi kum tin central atangin budget-ah hian a lo kal hrim hrim a ni. Chumi anih avang chuan a rullhna tur pawh central-in min rawn cut sak mai a. Kha kha a lo pung ve zel a, amaherawh chu 'ba in ngah em mai' tia central-in mi hauha han tih pawh a awm chuang lova. Hmanah pawh khan Mizoram state ina kan leiba kha vaibelchhe 3,000 a ni a, in tin insem ta ila chuti zatin kan ba a ni ti zawnga han sawi kha chuan a hlauhawm hmel ang reng khawp mai a. Amaherawhchu khata lamah kha chuan state ina central-a a bat ti zawng pawh khan kan zuk sawi thei ang a, kha kha chu chuti vakin a lo ngaipawimawh awmlo a, an mahni pawh khan hre reng chungin hei in bat leh tur a ni an ti a, min rawn tuk zel a. Amaherawhchu nichina kan member zahawm takte'n an sawi, mimal supplier-a kan bat te, contract-a kan bat te hi chu ngaihawimawh ngei ngei a ngai a. Heng hi chu saihlum anga ral theilo anih avangin nasa taka kan ti pawh a ngai a ni.

Tunah pawh kum 2020 record-ah khan Sikkim a ba tlem ber a, vaibelchhe 7,667/- a ni a, India ram pumah ba tlem ber a ni a, a dawtah Mizoram kan ni a, vaibelchhe 8,176/- kan ba a ni. A ba tam ber chu UP a ni a, vaibelchhe 6 lakh a ba a, Maharashtra-in vaibelchhe 5 lakh vel a ba bawh a, state dang pawhin an lo ba tam tin ten viau a ni tih kha kan hriat a tha a.

Tin, sum harsatna member-te sawi ang khan Post Devolution Revenue Deficit Grant phei kha chu a hmain State 14 ah min sem a, a zia awm viau a, tunah phei chuan 17 ah ngawt mai min sem dawn a kan chang tlem ta viau mai a, khang te khan harsatna tam tak min thlen a ni. Tichuan tuna kan budget-ah hian a hlawm lianah kan han hriat angin kan receipt side ah chuan central atanga kan tax share ve te, Post Devolution atana kan hmuh te, Grant hrang hrangte, loan anga min pek te, state atanga kan tax revenue kan lak te, non-tax revenue kan lak te leh khawi lai emawa miin loan an rulhna lo tling khawm zawng zawng kha a receipt side-ah a lo kal ta a. Kha bakah rinthu budget estimate, rinthu a ni bawk a, external aided project-a chuti zat vel chu kan hmu ang kan han ti a, kan han dah khawm a, chuta kan han dah chu vaibelchhe 11,000 chuang vel a ni a. A hmanna tur pawh kha surplus a ni emaw, deficit a ni emaw kha pawh tih a tha lo e, a hman zawh tur angin budget estimate na na chu ti phawt ang kan ti a, hman zawh turin kan han dah ta a. Mahse khami piah lama lokal tura chu ka rin dan in vaibelchhe 3,000 a tlem berah a bet ngei ngei ang. Tun tum supplementary-ah pawh a danglamna kha vaibelchhe chuang a ni a, kha pawh kha Covid kum chet theih miah lo kumah a ni. Kuminah hi chuan vaibelchhe 5,000 chu a tlem berah a belhna tur central atangin hnuh chhuahna tur project siam ila tih chu ka rilru te te a awm a ni a, tih ngei pawh kan tum ang. Amaherawhchu, tumna ani a, a theih chiah leh chiahloh chu thuhra vaibelchhe 5,000 tal hi chu kan hmuh chhuah theih ka ring a ni. Chu ber chu SEDP-a ram development-na atan kan hman tur, kawng siam nan kan hman tur a ni zawk a. Mahse heta SEDP-a tlem kan lo dah hi chu khami lo do letna tur atan a mamawh ve dawn avangin, kan indaih dan te theihtawpa lo siam remin tan kan lo la ve ang. Kan sawi fo ang khan central-ah vaibelchhe sang tel, nuai tel a awm a, amahin development-a hmanna tur a nei miah lo, Antam hmun tiat pawh development hmanna tur a nei lova, state leh UT a hman vek tur a ni.

Tin, eng emaw zat kha budgeting system chu minrawn pe a, kha kha matching share-ah arawn luh chhuah nan revenue expenditure-ah lo hmang ula, development pui tur chu central-a a lipui hi a ni. Khamirawn lakna atanrawn hmang ang che u tiha kha anih avangin tunah pawh hian chumi ni lo se central-ah te chuan enge an mamawhna tur. Chuvangin, State leh UT atan vaibelchhe nuai tel dahin a awm a, chu chu kan zuk la a kan hmang a ni. Chumi nen State budget kha inhnuk kual tur a ni a, chuti anih loh chuan heta a chi tur kan neih sa en vang vanga lungngai em em mai te emaw, tlem tea lawm thar thut te kha, a system kha a bangbo em mai. Budgeting system reng rengah chuan India ramah kan dinhmun chu central chawm hlawm kan ni kan han ti ngawt a, a dik viau tho va. Keini te chu buh tal kan la thar a lawm, thlai tal kan la thar chhuak a, ran tal kan la vulh alawm. Parliament zuk en ula buh tharna an nei teuh lo, thlai tharna an nei teuh lo. Khu aia chawmhlawm khu an awm lo reng reng, kan kekawr pakhata tax tling khawmte a sem rual dan an lo ngaihtuah ringawt a ni. Chu central nihna dik tak politics-ah chuan a ni.

Chu chu anih avangin huaisen takin khang kha a zu la chhuak a, dik tak leh taima taka mahni ram development-a hman turin a khurpuiah a tam a ni tih kan sawi fo thina hi, thildang a sawi theih a ni lo. Amaerawhchu, a zu hnuchhuah nan erawh chuan state matching

share kha a pawimawh tlat a ni. (**Pu ZODINTLUANGA RALTE:** *Pu Speaker, khami topic kha a kalsan hmam, nikum Budget Session-a UD&PA-a “US Dollar vaibelchhe zahnih leh” tih kha supplementary ah khan kan hmu tlat lo mai a, kha lai kha min hrilhfiah thei em le?*). A US Dollar zawng chuan a awm lo ang a, a crore zawngin a awm ang. Supplementary-ah chuan rupee veka lokal tur a ni zawng e. Kan budget kalphung chu chutiang chu a ni a, Nimin piah khan Nagaland chuan central atanga an lak ringawt hi vaibelchhe 3,000 a ni a, 5,000 lak leh an tum a nangni pawh rawn hmanhmawh ve rawh u an ti a, chuvangin kan phe char char a ni. Chumi anih avangin budgeting system-ah leh financial management-a tlem kan dah buaipui em em mai a kha a ni ber lova. Chu ai chuan kan neih ang ang kha a tul anga hman theih turin kan han dah ta a ni a, chumi hmang chuan a let engemaw zat kan zuk hnuk chhuak a, chumi hmang chuan hei tunah kan Sport Department ami pawh kha budget-ah chuan khawiah mah a awm reng reng lo, heta mi vek hi a ni.

Kan hnuk chhuah pawh hi a la tawh lova, min rawn tur reng a ni. Central project rawn theh thla thuai thuai rawh u, financial year a liam dawn an ti a, immediate-in tukin zingah pawh kan bei ve nasa a ni a. Tunah hemi ngaihtuah hian theihtawpa budget kan han present veah hian mizoram mipuite tana hlawk turin, hemi a budget ngo ngo, hemi ina a hnukchhuah tur tam zia kha thlir chungin, hetah hian tui a liam dur dur a ni tih thlir chungin, kan neihsa baltin pahnih/pathlum thleta kan tlalo palh ang ti a lek lek ni lovin, a tam zawng kan va hnukchhuah kha a pawimawh ber anih avangin, khami en chung khan tun tum kan budget pawh kan han en ang a, ‘heng hi chu a chi tur’ kan tiha hi a ni tak tak a ni. Anni pawhina an ngaih pawimawh chu, state te ho chuan nangmahni in in maintain-na tur in ngaihtuah ang a, amaherawh chu a matching share tur in hnukchhuahna tura pawh kha in ti ang a, chumi hmang chuan, heta mi pawh hi in rawn hnukchhuak ang a, development kalpui ula, chak rawh u, tih kha min duh a. India ram budget system hi a ni hrim hrim a ni tih hriain khami atan khan tuna kan budget pawh kan theihtawpin kan ti a, duhthu a samlo hle chung hian a tlem a tlem kan han chalai ang a. Kan Lalpa’n chhangper panga leh sangha pahnih pawh a han tih pun chuan mipui sang nga a hrai mai kha maw... Keini pawhin, kan budget hi a tam tawhlo kan tih pawhin theih tawpa tihpun kan han tum ang a, Zoram mipui tan thil tha a chhuah ngei ka beisei a ni. (**Pu C. NUNLIANCHUNGA:** *Pu Speaker, SEDP kha an sem thei dawn em le, khami atang khan? Kumin kum tir khan Sangau-ah ka han kal a, sawta MNF hotupa Pu Lalbuaipuia khan min zawng sak ngei teh a ti a, SEDP sem dawn leh sem dawn loh nangmahni hotu, in pawlthe khan an ti a, kan hotupa khan min han sawifiah sak thei se.*)

Pu Speaker, helaia bamboo project kan han kalpui chhinnaah pawh khan, in khatah nuai khat chuang kan pe tawh hlawn anih kha. In 230 vel kha nuai khat chuang... (**Pu. C. NGUNLIANCHUNGA:** *Pu Speaker, kha kha chu Bamboo Mission atangin a ni a, Supplementary Demand for Grant-ah khan Bamboo Mission hnuai atanga hmuh a ni lawm ni?*) Bamboo Mission pawh a ni a, a tam ber chu SEDP fund atang a ni. Chuvangin, kan neihsaah hian kan zuk hnukchhuak ang a, mipuia pawh a tam thei ang ber ina an hlawhtinpui turin, rahchhuah tur chia kalpui kan tum a ni. (Dr. VANLALTHLANA: Pu

Speaker, ka han zawhbelh duha chu, SEDP a chi tur a ni, tih kha a ni thin a. December thleng allocation kan neihah khan SEDP-ah crore 63 vel kan sem hmanin ka hria a, khatah khan state matching share a hman awm ka lo hmu miah lova, Supplementary Demand for Grant-ah hi chuan tlema zawng chu hman ve a ni a. Tin, 2019-20-ah pawh khan SEDP-ah dah a ni teuh mai a, a chi-ah khan kan la hmang chiah lo nge, kumin ami chu a chi-ah kan hmang tak tak dawn tih kha ka zawhbelhna a ni e.) E, hmang tehreng e, kan hmang em em ang a, amaherawh chu kan sawi belh ang khan development oriented a ni a SEDP hi, pawng sem ngawt, 'kha, nang sing chuti zah' tih ringawt a ni lo a, ar in vulh anga, vawk in vulh ang a, lei in let ang a, bamboo in ching anga kan tih, chumi tur atan chuan kan ti a, tam tak hi chu nuai 3 pawh in a daih kher lo ang, a mamawh ang zelin development oriented-a SEDP development connected-ah kha chuan kalpui tur a ni a. Amaherawh chu 'SEDP' tih hian a development oriented ngawr ngawr ni lovin thildang eizawna tam takah a kalpui dawn a, engkim huap tur atana han tih a ni e, hei hi chu.

Tichuan, Pu Speaker, khang khan windup-na chu ka han khar ang a. A eng pawh nisela, a pawimawh bera chu, kan budget hi duthusama tam chu a ni lo ngei mai, amaherawh chu a hnuhchhuahna hi a kawihsapira hmangin tam leh zual Mizoram tan hnuhchhuah kan in ring a ni. (**Pu LALCHHUANTHANGA:** *Pu Speaker, nichina ka zawhna, LPS Fight Night zana Title Fight-a chakte, an awmna veng MLA ten nuai khat an pek tur thu kha Sports Minister khan a sawi a, kha kha hriat chian ka duh khawp mai a, a chhan chu ka bial chhungah Lalhruaitluanga kha a chak ve si a, engtia tih tur nge ni ang? Khawia fund nge ni ang?*) Ngawi teh, Pu Speaker, kha kha chu a personal em mai a, budget wind-up naa, khalai kha chu (**Pu LALCHHUANTHANGA:** *Pu Speaker, Minister-ina a puan ve a ni a, kan ngaipawimawh khawp mai, kha kha chu.*) Anmahniin lo inzawt mai teh se a.

Aw le, Pu Speaker, kha kha ka wind-up-na ni sela, Member zahawm tak ten hriat duh an neih leh.... (**Pu C. NGUNLAINCHUNGA:** *Pu Speaker, SEDP chu an sem dawn nge dawn lo, nge, an sem tawh tihna zawk?*) Sem dawn teh reng e a, amaherawh chu kan sem dana kha pawng sem ngawt a nilo, development oriented-in kan sem dawn ka ti a ni. (**Pu C. NGUNLAINCHUNGA:** *Pu Speaker, kan mipuite'n an beisei si a, nuai 3 aia tlemlo in dawng ang tih kha chu sem lawk a ni dawn lo a ni maw?*) Kan sem dan tura chu development oriented-in, a semtu tur lamin uluk takin kan rawn siam dawn nia. Chuvangin, Pu Speaker, kan budget windup-na, ka rawn tlangkawmna chu kha kha ni se, amaherawh chu detail leh zuala nakinah demand-wise-a kan discuss hunah memberte'n an bial connected-ah pawh detail leh zualin an la zawt ang a, a aia chipchiar zawkin kan la en leh dawn nia. Chu chu ka han windup-na ni mai se. Ka lawm e.

SPEAKER : Kan House Leader, kan CM hi a rilru a zau a, kan zawt kilkhawr thei hle mai a, a lawmawm a. Tin, Speaker pawh hi a rawn zau viau a nia.

Awle, tunah chuan kan CM zahawm takin a rawn windup a, kan budget sawihona General Discussion chu kan zo ta a. Tichuan, vawiina kan business chu kan zo ta a, kan chawl rih ang a, naktuk March Ni 9, 2021 (Thawhlehi) zing dar 10:30 AM ah kan thukhawm leh dawn nia.

Sitting is adjourned (3:55 PM)